

## MAHTE é Gabú Danglù Laiká (The Gospel of Matthew)

*Yesuq É Byùxik Shap Kyô É Hkyô*

*Luk 3:23-38*

<sup>1</sup> Abraham é awut ashín, Dawiq é yhangzo yhangshu,\* Yesuq Hkrisduq é byùxik labaû gi, a-ô mâ é eq rajung za nghut lhê.

<sup>2</sup> Abraham gi, Isak lé hkû;  
Isak gi, Yakup lé hkû;  
Yakup gi, Yudaq eq yhanggu yhangmâng pé lé hku é nghut lhê;

<sup>3</sup> Yudaq gi, Hparet eq Zera lé hkû, haú nhik é yhângnu gi, Tamar nghut ri.

Hparet gi, Hesrun lé hkû;  
Hesrun gi, Ram lé hkû;

<sup>4</sup> Ram gi, Aminada lé hkû;  
Aminada gi, Nashon lé hkû;  
Nashon gi, Salamun lé hkû;

<sup>5</sup> Salamun gi, Buaq lé hkû;  
Buaq é yhângnu gi, Rahap nghut ri.  
Buaq gi, Obet lé hkû;  
Obet é yhângnu gi, Ruhtaq nghut ri.  
Obet gi, Yese lé hkû;

<sup>6</sup> Yese gi, Hkohkâm Dawiq lé hkû;  
Dawiq gi, Sholumon lé hkû; Sholumon é yhângnu gi, Uriaq yhangmyi dut wú sù nghut ri.

---

\* **1:1** Awut ashín eq yhangzo yhangshu gâ é lé, Chyúmdang ra-am má, "yhangzo" ga le bo tô lhê.

<sup>7</sup> Sholumon gi, Rehoboam lé hkû;

Rehoboam gi, Abiyag lé hkû;

Abiyag gi, Asa lé hkû;

<sup>8</sup> Asa gi, Yehoshaphat lé hkû;

Yehoshaphat gi, Yoram lé hkû;

Yoram gi, Uzi-aq lé hkû;

<sup>9</sup> Uzi-aq gi, Yohtam lé hkû;

Yohtam gi, Ahaza lé hkû;

Ahaza gi, Hezekiaq lé hkû;

<sup>10</sup> Hezekiaq gi, Manase lé hkû;

Manase gi, Amon lé hkû;

Amon gi, Yosiaq lé hkû;

<sup>11</sup> Yosiaq gi, Babelon má shúm dut huî é hkûn,  
Yehkoniaq eq yhanggu yhangmâng pé lé  
hku é nghut ri.

<sup>12</sup> Babelon má shúm dut huî é htâng má,

Yehkoniaq gi, Shalahtila lé hkû;

Shalahtila gi, Zerubabelaq lé hkû;

<sup>13</sup> Zerubabelaq gi, Abiut lé hkû;

Abiut gi, Eliakim lé hkû;

Eliakim gi, Azor lé hkû;

<sup>14</sup> Azor gi, Zaduk lé hkû;

Zaduk gi, Ahkim lé hkû;

Ahkim gi, Eliut lé hkû;

<sup>15</sup> Eliut gi, Eliaza lé hkû;

Eliaza gi, Mahtan lé hkû;

Mahtan gi, Yakup lé hkû;

<sup>16</sup> Yakup gi, Mariq é yhanglâng Yosep lé hku é  
nghut ri;

Mariq gi, Hkrisduq gâ é Yesuq lé hku é sù  
nghut ri.

17 Haû mù, Abraham é pyat mai Dawiq é pyat jé shoq gi, byùxik raxe myi xik; Dawiq pyat mai Babelon má shúm dut huí é hkûn jé shoq gi, byùxik raxe myi xik; shúm dut huí é hkûn mai Hkrisduq† é pyat jé shoq gi, byùxik raxe myi xik nghut ri.

*Yesuq Hku Lé Lo É Hkyô*

*Luk 2:1-7*

18 Yesuq Hkrisduq hku lé lo é hkyô gi, a-ô mâ é eq rajung za nghut ri: Yesuq é yhângnu Mariq gi, Yosep èq dúng tô é sù nghut ri; nghut kôlhang, yhangnhik a zùm shi má, yhang gi, Chyoiyúng Woi-nyí mai zogúng dut bê nghut ri. 19 Yhâng é yhumsîng hpó Yosep gi, dingmán sù nghut luí, yhang lé byu pê hí má hoq a kâm lhoq hpu nau é yanmai, tsik za lhoq kâng pyám râ dâ ri.

20 Nghut kôlhang, yhang haû su myit nyi é hkûn, yhupmoq má, haû Yhumsing é maumang lagyo gi, yhang lé, lé htoq shit luí, "Dawiq é yhangzo yhangshu Yosep ê, haû náng é yhumsîng myhí Mariq lé hâng yù râ hkyô lé, hkâ-myit chiq; haí mù gâ le, yhang wun tô é zoshâng gùng gi, Chyoiyúng Woi-nyí dông lo é nghut lhê. 21 Yhang gi, yuqzo rayuq hkû râ nghut luí, nàng gi, zoshâng haú lé, Yesuq nghû myìng myhíng byi ra râ nghut lhê; hkâsu mù gâ le, Yhang gi, Yhâng é byu pé lé, yhangmoq é yubak mara mai hkyi yù râ sù nghut lhê." ga taí ri.

22 Shí hkyô banshoq gi, Garai Gasâng èq, haû myiqhtoi dông taí é dang lé lhoq dik é nghut ri. 23 Myiqhtoi dang haû gi, "Haû zomyi gyíng gi,

---

† 1:17 Grik dong Hkrisduq gâ é gi, xù but hui Sù gâ é lichyúm nghut mù, Hebre dong Mesaia gâ é eq rajung za nghut lhê.

zogông dut luî, yuqzo rayuq hkû râ nghut lhê; Yhâng é myìng lé gi, Emanuelaq ga kó râ nghut lhê."✧ gâ ri. Hau é lichyúm gi, "Garai Gasang gi, nga-nhúng eq rahá nghut nyi lhê." gâ é nghut lhê.

<sup>24</sup> Yosep gi, yhup bûn lo é hkûn, haû Yhumsing é maumang lagyo taî é eq rajung za, Mariq lé, yhangmyi dông yhûm má shuí yù bè nghut ri. <sup>25</sup> Nghut kôlhang, yhang gi, yuqzo haû hku é hkûn jé shoq, Mariq eq gungsho a zùm nghut ri. Yuqzo haú lé, yhang gi, Yesuq ga myhíng byî ri.

## 2

### *Buihtoq Hkyam Mã É Hpaqchyî Bò Bang*

<sup>1</sup> Herut hkohkâm up nyi é u lé, Yuda mau mã é Betlehem wà má Yesuq lé hku é nghut ri. Hau htâng, buihtoq hkyam mã é hpaqchyî bò bang gi, Yerusalem wà mó má jé lé kômù, <sup>2</sup> "Haû hku lé lô bê Yudaq byu pè é Hkohkâm gi, hkâmá nghut lhê lhú? Yhâng é kyî lé, buihtoq hkyam má ngamoq myàng luî, Yhang lé noq râ matú jé lé é nghut lhê." ga luî, myî akô nghut ri.

<sup>3</sup> Herut hkohkâm gi, haú hkyô lé wó gyo jáng myit myô nyi ri; hau htoq agó, Yerusalem wà mó mã é lhunglhang bang le, myit myô bum akô nghut ri. <sup>4</sup> Haû mù luî, yhang gi, byu pè é hkyangjong agyi pé eq tarâ sará pé banshoq lé, ji tsíng yù mù, haû Hkrisduq hkâmá hku lé lô râ nghut é hkyô lé myî ri. <sup>5</sup> Haú hkûn, yhangmoq gi, "Yuda mau Betlehem wà má nghut lhê. Hkâsu mù gâ le, shí hkyô eq séng luî, haû myiqhtoi kê tô é má,

---

✧ **1:23** Esai 7:14

<sup>6</sup> 'Yudaq mau mâ é Betlehem wà ê, nàng gi, Yudaq mau mâ é wà pé má, je tiq sù a nghut; hkâsu mù gâ le, ngá é Israelaq byu pé lé upzúng rá Zau gi, náng chyáng mai htoq lô rá nghut lhê.<sup>✧</sup>

ga bo tô ri." ga tû taî akô.

<sup>7</sup> Hau htâng, Herut gi, haû hpaqchyî bò bang lé haq ji yù mù, kyî lé htoq shit é ahkyíng lé, yhangmoq chyáng mai hkyak wó myî sê yù bê nghut ri. <sup>8</sup> Haû mù, yhang gi, "Nungmoq, zoshâng haú lé rago ê ho wú keq. Ngò le, Yhang lé ê wó noq rá matú, Yhang lé nungmoq é myâng eq yhang, ngo lé lo shit kyo keq." ga taí luî, haû bang lé Betlehem wà shut nhang kat bê nghut ri.

<sup>9</sup> Yhangmoq gi, haû hkohkam é dang lé gyô yu é htâng má, htoq e ló bekô nghut ri. Haû buihtoq hkyam má yhangmoq myang é kyî gi, haû zonú nyi é ahtoq ang ang má ló nô é jé shoq, yhangmoq é hí má e ló byî ri. <sup>10</sup> Yhangmoq gi, kyî haú lé myàng jáng, gyai yhang gabú bum akô nghut ri. <sup>11</sup> Yhangmoq gi, haú yhûm má wang e ló kô é hkûn, zonú eq yhângnu Mariq lé myàng kômù, hkyihput htúq luî, haû zonú lé noqkuq akô; hau htâng, yhangmoq é sutdek pé lé le hpóng luî, hîng, namngón jung loban eq mura\* pé lé yù mù, Yhang lé chyunghuq byî akô nghut ri. <sup>12</sup> Yhangmoq gi, Herut chyáng a dum taû ló rá matú, yhupmoq má, yhangmoq lé sidiq byî é hui kômù, hkyô gó hkat dông yhangmoq é mau shut taû ló bekô nghut ri.

### *Egutúq Ming Shut Hpang E É Hkyô*

---

✧ **2:6** Mihka 5:2      \* **2:11** Mura gi, chi wó kut jung xù nghut lhê.

<sup>13</sup> Yhangmoq ló byuq é htâng má, haû Yhumsing é maumang lagyo rayuq gi, Yosep lé yhupmoq má htoq shit mù, "Toq aq! Haû zoshâng eq yhângnu lé, Egutuq ming shut shuî h pang ê aq. Ngò, nang lé dum ji yu é ahkyíng jé shoq, haû má nyi nyi keq. Haî mù gâ le, Herut gi, zoshâng haû lé sat râ matú, ho nyi bê nghut ri." ga taî ri.

<sup>14</sup> Haû mù, yhang gi, toq luî, myín lé yhang, zôshang me lé shuî chùng mù, Egutuq ming shut e ló bê nghut ri. <sup>15</sup> Yhangmoq gi, Herut shi é jé shoq, haû má nyi nyi akô. Haû gi, "Ngá zo lé, ngò, Egutuq ming mai wut htoq yû bê nghut lhê."✧ ga, haû Yhumsing eq myiqhtoi dông taî é dang lé lhoq dik é ru nghut lhê.

<sup>16</sup> Herut gi, yhang lé, hpaqchyî bò bâng eq mhaû pyâm tô é lé sé jáng, nhikmo-yo bê nghut ri; haû mù, yhang gi, haû hpaqchyî bò bâng chyáng mai wó sê yu é ahkyíng lé sôn wú mù, Bethlehem wà eq hau é awui ayâm mâ é wà pé má nyi é, í zân mai a-ô mâ é yuqzo pé banshoq lé, sat pyám nhang ri.

<sup>17</sup> Haû gi,  
"Ramaq gâ é jowò má, yón kuq é eq ngau garû é htê lé wó gyô ri;  
Rahkelaq gi, yhang zô pé a nyi byuq lo kô é yan-mai, ngau nyi é eq nhik a wó títg dut ri."✧  
ga luî, <sup>18</sup> myiqhtoi Yeremiaq dông taî tô é dang lé lhoq dik é nghut ri.

### *Nazaret Wà Má Dum Taû Lo É Hkyô*

<sup>19</sup> Herut shi byuq é htâng, Egutuq ming má, haû Yhumsing é maumang lagyo gi, Yosep chyáng

yhupmoq dông lé htoq shit mù, <sup>20</sup> "Toq aq, haû zôshang me lé shuí chûng mù, Israelaq ming má taû ló aq; hkâsu mù gâ le, haû zoshâng lé sat naû bang shi byuq bekô nghut ri." ga taî ri.

<sup>21</sup> Haû mù, Yosep gi, zôshang me lé shuí chûng mù, Israelaq ming shut taû ló bê nghut ri. <sup>22</sup> Nghut kôlhang, yhang gi, Yuda mau má, Arhkela-uq, yhângwa Herut é hkó má xoq up nyi é hkyô lé wó gyo jâng, haú má a wám ló lo nghut ri. Yhupmoq má sidiq byî é huí é eq rajung za, yhang gi, Galile mau shut e ló mù, <sup>23</sup> Nazaret gâ é wà má ló nyi nyi bê nghut ri. Haû mù, "Yhang lé, Nazaret wà byù ga râ nghut lhê." ga luí, haû myiqhtoî pé dông taî tô é dang lé lhoq dik é nghut ri.

### 3

#### *Wui-myhup Sará Yohan Shui Hen É Hkyô*

*Mrk 1:1-8; Luk 3:1-18; Yhn 1:19-28*

<sup>1</sup> Haú yoq má, Wui-myhup Sará Yohan htoq lô mù, Yuda mau mâ é yoso má hko kyô é gi, <sup>2</sup> "Myit lhîng keq; hkâsu mù gâ le, mauhkûng mingdán gi, chyâng lò bê\* nghut ri." gâ ri. <sup>3</sup> Haú yuq gi, "Haû yoso má, byù rayuq garû taî é htê gi, 'Haû Yhumsing é matú, hkyô hen to keq; Yhâng é matú, hkyô lhoq nyhang to keq.' gâ ri." <sup>✧</sup> ga myiqhtoî Esai-aq taî tô é sù yuq nghut ri.

<sup>4</sup> Yohan gi, gola-uq shomaú èq saí é mebu wut mù, yhâng é hpyidum má gi, shokuq hpyihit hit ri. Yhâng é zoshuq gi, dinggám eq yosô byo-î pé

\* **3:2** Mauhkûng mingdán gi, chyâng lò bê gâ é lichyúm gi, Garai up râ ahkýing chyâng lò bê gâ é nghut lhê. ✧ **3:3** Esai 40:3

nghut ri. <sup>5</sup> Yerusalem wà mó mâ é bang, Yuda mau banshoq mâ é bang eq Yodan làng awui ayàm lhunglhang mâ é bang gi, yhang chyáng htoq e bum akô. <sup>6</sup> Yhangmoq gi, yhumsing é mara lé yín yû kôluî, yhang chyáng mai Yodan làng má wui-myhup hkâm yu bum akô nghut ri.

<sup>7</sup> Nghut kôlhang, yhang gi, yhang wui-myhup hkám byî é jang má, Hparishe pé eq Saduke pé myo myo lé lo nyî kô é lé myàng jáng, yhangmoq lé taî é gi, "Duq htân lhangmuî amyû pé ê, jé lô râ yubak dam mai wó hpang lut kó sháng gaq ga, nungmoq lé ó yuq taî pûn é lú? <sup>8</sup> Myit lhîng hkyô eq gingdán é ashi pé zui keq. <sup>9</sup> 'Ngamoq gi, Abraham é yhangzo yhangshû pé nghut lhê.' nghû luî, yhumsing é i-myt unghkaû má hkâlum to kó. Hkâsu mù gâ le, ngò, nungmoq lé taî kyo kôlé, Garai Gasang gi, luqgok shí pé mai, Abraham é matú yhangzô pé wó hpan htoq kat lhê. <sup>10</sup> Ahkuî lhang, Garai Gasang gi, Yhang é wazung lé haû sikkâm wang pé má tô to bê nghut ri; haû mù, ge é ashi a zuî é agàm hkangmó lé gi, htuq lhêng pyám mù, myi má dú kat pyám râ nghut lhê.

<sup>11</sup> Ngò gi, nungmoq myit lhîng kó sháng gaq nghû, wui eq za wui-myhup hkám byî lhê. Nghut kôlhang, ngá htoq má wum-o a-tsam je bo é sù rayuq, ngá htâng má jé lé lô shirâ nghut luî, ngò gi, Yhang é hkyî-tsung chûng byi râ lhang a gingdán; Yhang gi, Chyoiyúng Woi-nyí má le, myi má le, nungmoq lé wui-myhup hkám byi râ nghut lhê. <sup>12</sup> Yhang gi, loq má byò chung to mù, guq chyarâng mâ é guq bùm lé hik sân pyám luî, já é guq cham lé gi, guqchyî má tsîng kat to mù, guqsôm lé kúm gi,



hkâ-nhám le shi byuq a sê é myî êq nyhê hkyô pyám râ nghut lhê." gâ ri.

*Yesuq, Wui-myhup Hkâm Yu É Hkyô*

*Mrk 1:9-11; Luk 3:21-22*

<sup>13</sup> Haú hkûn, Yesuq gi, Yohan chyáng wui-myhup hkâm yù râ ga, Galile mau mai Yodan làng má jé lé lo ri. <sup>14</sup> Nghut kôlhang, Yohan gi, "Ngò sheq Náng chyáng wui-myhup hkâm yù râ sù ru nghut lhê nhîng! Nàng sheq ngá chyáng lé lo lhê l hú?" ga luî, lhom taî hkûm ri.

<sup>15</sup> Haú hkûn, Yesuq gi, "Dingmán hkyô banshoq lé, nga-nhúng lhoq đik râ é yanmai, Ngo lé wui-myhup hkâm byi laq." ga tû taî ri. Haú mù, Yohan le, gyo byi bê nghut ri.

<sup>16</sup> Yesuq gi, wui-myhup hkâm yù eq yhang, wui mai htoq lo ri. Haú hkûn, mauhkûng bóng lô mù, Garai Gasâng é Woi-nyí gi, hpûngkyui gunghkyâng sù é đông mai, Yhâng ahtoq má lé gyó nô tô é lé, Yhang myang kat ri. <sup>17</sup> Haú hkûn, "Shí yuq gi, Ngò chyitdap é Ngá zo nghut lhê; Yhâng é ahtoq má Ngò gabú myit ngón nyi lhê." ga mauhkûng mai dangtê htoq lo ri.

## 4

*Yesuq, Gúnglaú Huî É Hkyô*

*Mrk 1:12-13; Luk 4:1-13*

<sup>1</sup> Hau htâng má, Chyoiyúng Woi-nyí gi, Yesuq lé, nat Tsadán êq gunglaú é hui nhâng râ matú, yoso shut shuî ê ri. <sup>2</sup> Yesuq gi, zoshuq gám é myi xê nyí myi xê myìn jé jáng, zòmut hui bê nghut ri. <sup>3</sup> Haú hkûn, gunglaú sù gi, Yhâng chyáng lé mù, "Nàng,

Garai Gasâng é Yhangzo nghut le gi, luqgok shí pé lé muk dut nhâng aq." ga taí ri.

<sup>4</sup> Haú jáng, Yesuq gi, "Byù gi, muk èq za asak duì râ a nghut; Garai Gasâng é nhut mai htoq lo é mungdang hkangmó èq sheq asak duì râ nghut lhê.'☆ ga luí, Chyúmdang má kâ tô ri." ga yhang lé tû taí ri.

<sup>5</sup> Haú hkûn, nat Tsadán gi, Yesuq lé, chyoiyúng myuq\* má shuí ê mù, noqkuq yhum je myhang é shúhtâng htoq má yap nhang to luí, <sup>6</sup> "Nàng, Garai Gasâng é Yhangzo nghut le gi, byam gyó kat wú aq. Hkâsu mù gâ le,

'Náng é matú, Garai Gasang gi, Yhâng é maumang lagyô pé lé taí to râ nghut mù,

luqgok má Náng é hkyî a ló htung shoq, yhangmoq é loq èq Nang lé lhom bún yû kó râ nghut lhê.'☆

ga luí, Chyúmdang má kâ tô ri." ga taí ri.

<sup>7</sup> Nghut kôlhang, Yesuq gi, "Haú Yhumsîng, nungmoq é Garai Gasang lé, wó chyam wú râ a nghut.'☆ ga luí le, Chyúmdang má kâ tô ri." ga, yhang lé tû taí ri.

<sup>8</sup> Nat Tsadán gi, Yesuq lé, gyai yhang myhang é bùm htoq má shuí doq ló mù, mingkan má joq é mingdán pé banshoq eq haú pê é hkikhkâm hkyô lé tûn shit ri. <sup>9</sup> Hau htâng, yhang gi, "Nàng hkyihput htuq mù, ngo lé noq é nghut jáng, shí pé banshoq, Nang lé ngò byi râ." ga, Yesuq lé taí ri.

<sup>10</sup> Haú hkûn, Yesuq gi, "Tsadán nàng, ló byuq aq! Hkâsu mù gâ le, 'Haú Yhumsîng nàng é Garai

---

☆ 4:4 Tarâ Pun 8:3 \* 4:5 chyoiyúng myuq gi, Yerusalem lé gâ lhê. ☆ 4:6 Hkya-on 91:11-12 ☆ 4:7 Tarâ Pun 6:16

Gasang lé za, nàng noqkuq dojaú ra râ nghut lhê. ☆  
ga luí, Chyúmdang má kê tô ri." ga, yhang lé taí ri.

<sup>11</sup> Haú mù, nat Tsadán gi, ló byuq bê nghut luí, maumang lagyô pé gi, Yesuq lé, lé dojaú nyi akô nghut ri.

*Yesuq Mungdang Hko Hi Ló É Hkyô*  
*Mrk 1:14-15; Luk 4:14-15*

<sup>12</sup> Yesuq gi, Wui-myhup Sará Yohan htóng gyó é hkyô lé wó gyo jáng, Galile mau shut dum taú ló bê nghut ri. <sup>13</sup> Yhang gi, Nazaret wà mai htoq ló mù, Zebulun eq Nahtali mau má é nhông yàm má joq é Kaperna-um wà má ló nyi nyi ri. <sup>14</sup> Haú gi, myiqhtoi Esai-aq laiká má,

<sup>15</sup> "Zebulun mau eq Nahtali mau, wuimau má é hkyô, Yodan làng yàm, tûngbàu pé nyi é Galile mau ê,

<sup>16</sup> mauchut hkaú má nyi nyi é bang, maubó mó lé myàng bê nghut ri;

shî wup hkaú má nyi to bâng é matú, maubó lô bê nghut ri." ☆

ga kê tô é dang lé lhoq dik râ matú nghut ri.

<sup>17</sup> Haú hkûn mai, Yesuq gi, "Myit lhîng keq! Mauhkûng mingdán gi, chyâng lò bê nghut ri." ga, mungdang hko hi e ló bê nghut ri.

*Yesuq É Chángzo Hí Dut Bang*

<sup>18</sup> Yesuq gi, Galile nhông yàm má hkyô sô wún é hkûn, Petruq gâ é Simun eq yhanggu Andre nhiktâng lé myang ri. Yhangnhik tâng gi, ngozo kóng zo su nhik nghut mù luí, nhông má gùn dù nyi akô nghut ri. <sup>19</sup> Haú mù, Yhang gi, haú nhiktâng

lé, "Ngá htâng cháng keq; Ngò, nungnhik lé, byù lé châng kóng su nhik dut nhâng râ nghut lhê." ga taí ri. <sup>20</sup> Haú hkûn, yhangnhik gi, radá dâm, gùn pé lé tô pyâm to luí, Yhang htâng cháng bekô nghut ri.

<sup>21</sup> Yesuq gi, jowò haú mai xoq sô e ló le, Zebedi é yhangzo, Yakuq eq yhanggu Yohan nhiktâng lé myang ri. Yhangnhik gi, yhangnhik é yhângwa Zebedi eq rahá, lhaí hkaú má gùn hpo nyi akô. Yhangnhik lé, Yesuq wut kat jáng, <sup>22</sup> yhangnhik gi, radá dâm, yhangnhik é yhângwa eq lhaí haú lé, tô pyâm to kôluí Yesuq htâng cháng bekô nghut ri.

*Nò Bang Lé, Yesuq Lhoq Gê Byí É Hkyô*  
*Luk 6:17-19*

<sup>23</sup> Yesuq gi, Galile mau ramau gón má htoq ê mù, tarajong pé má, mhoqshit luí, mauhkûng mingdán eq sêng é gabú danglù lé, hko kyo uchyang, byu pé chyáng mâ é nòhpyo ajung jung hui bang eq noli nojàng amyû myû dap bang lé, lhoq gê byí wún ri. <sup>24</sup> Yesuq eq sêng é hkyô ludang gi, Suriq ramau gón má byo myín ló mù, byu pé gi, awáng nòhpyo ajung jung huí é bang, hkê-nhô jamjaû nyí é bang, nat gang wang júng é bang, mhûngtuq tuq é bang, gùngjum shi é bang lé, shuí lé lô kôluí, Yhang gi, haú bang lé lhoq gê byí ri. <sup>25</sup> Galile mau, Dekapoli,† Yerusalem, Yuda mau eq, Yodan làng tû tap mâ é byù moq mó gi, Yesuq htâng châng bum akô nghut ri.

---

† 4:25 Dekapoli gâ é gi, Grik đông myuq raxê lé gâ lhê.

## 5

*Hkungsô Wó É Tarâ**Luk 6:20-23*

<sup>1</sup> Yesuq gi, byù moq mó lé myàng jáng, bùm má doq ló luí, ló zung tô ri. Háu hkûn, Yhâng é chángzô pé gi, Yhâng chyáng lé lô kôjáng, <sup>2</sup> Yhang nhut hkum hpóng luí, yhangmoq lé mhoqshit é gi:

<sup>3</sup> "Woi-nyí má, asho awui dut é bang gi, hkungsô wó nyi ri; hkâsu mù gâ le, mauhkûng mingdán gi, yhangmoq é mingdán nghut nyi ri.

<sup>4</sup> Myit iyon huí é bang gi, hkungsô wó nyi ri; hkâsu mù gâ le, yhangmoq gi, nhik lhoq tîng é hui kó râ nghut lhê.

<sup>5</sup> I-myit nú-nhâm é bang gi, hkungsô wó nyi ri; hkâsu mù gâ le, yhangmoq gi, mingkan lé wó sîng kó râ nghut lhê.

<sup>6</sup> Dingmán hkyô lé mut shit nyi é bang gi, hkungsô wó nyi ri; hkâsu mù gâ le, yhangmoq gi, nhik dik shoq myàng zo kó râ nghut lhê.

<sup>7</sup> Shogyo nhikmyin myit bo é bang gi, hkungsô wó nyi ri; hkâsu mù gâ le, yhangmoq gi, shogyo nhikmyîn yu é hui kó râ nghut lhê.

<sup>8</sup> Myit sansêng é bang gi, hkungsô wó nyi ri; hkâsu mù gâ le, yhangmoq gi, Garai Gasang lé myàng kó râ nghut lhê.

<sup>9</sup> Nguingón hkyô sô xoq byí é bang gi, hkungsô wó nyi ri; hkâsu mù gâ le, yhangmoq gi, Garai Gasang é yhangzô pé gâ é hui kó râ nghut lhê.

<sup>10</sup> Dingmán hkyo é yanmai zing-ri huí é bang gi, hkungsô wó nyi ri; hkâsu mù gâ le,

mauhkûng mingdán gi, yhangmoq é nghut nyi ri.

<sup>11</sup> Ngá é yanmai, byu pê èq, nungmoq lé rhoi é, zing-rî é, a teng a mán é dông agè ashop é dang amyû myû tai tso kô é hkûn, nungmoq hkungsô wó nyi ri. <sup>12</sup> Nguingón gabú nyî keq, hkâsu mù gâ le, nungmoq é matú kô é chyunghuq gi, mauhkûng mingdán má joq tô ri. Nungmoq é hí lhê é myiqh-toî pé lé le, yhangmoq gi, haú dông zing-rî lai lo wú bekô nghut ri.

### *Xo Eq Maubó*

*Mrk 9:50; Luk 14:34-35*

<sup>13</sup> Nungmoq gi, myidàm htoq mâ é xo nghut nyi lhê. Nghut kôhang, xo gi, mán kân byuq jáng, haú lé hai èq dum wó lhoq ngam yù râ lú? Shinggan shut dú pyám mù, byu pê èq nâng pyeq pyám é mai lai luî, hai akyû le bò râ a nghut lo.

<sup>14</sup> Nungmoq gi, mingkân é maubó nghut akô; bùm htoq mâ é myuq lé gi, wó nghop to râ a nghut.

<sup>15</sup> Myibung lé tap mù, mûng èq nghop tô é ó a kut wú kó; haú su kut râ malaî, yhúmhaû má lúng tô é bang yuq hkanmó myoq wó myâng râ matú, tsungjang má kúm tsung to râ nghut lhê. <sup>16</sup> Haú eq rajung za, byu pé gi, nungmoq é ge é muzó pé lé byu-myàng luî, mauhkûng htoq mâ é nungmoq é Îwa lé hkya-on kó sháng gaq, nungmoq é maubó lé yhangmoq é hí má duq nhang to keq.

### *Tarâ Lhoq Dik É Hkyô*

<sup>17</sup> Ngò gi, myiqhtoî pê é dang eq jep é tarâ lé lhoq hpyoq pyám râ matú, jé lé é nghut nhô hkâ-ngâm kó; haú pé lé lhoq dik râ matú sheq jé lé é

ru nghut lhê. <sup>18</sup> Ngò, nungmoq lé teng za tái kôlé, mauhkông eq myigùng byuq byuq le lhang, haú pé a ban lhoq dik dik gi, jep é tarâ mâ é tiq dik é dangjí eq myihkyet zo ralhüm lhang byuq byuq râ a nghut. <sup>19</sup> Jep é tarâ shí pé mâ é tiq dik é dang rahkùn lé lu lai lui, góbang lé le, haú su kut râ matú mhoq byi é sù ó yuq nghut kôle, mauhkông mingdán má tiq dik sù gâ é hui râ nghut lhê; nghut kôlhang, jep é tarâ shí pé lé châng kut lui, mhoq byi sù kúm gi, mauhkông mingdán má, hkik sù gâ é hui râ nghut lhê. <sup>20</sup> Ngò, nungmoq lé tái kôlé, nungmoq dingmán é hkyô má, haú Hparishe pé eq tarâ sará pé dingmán é htoq je a gyaú le gi, mauhkông mingdán má, nungmoq wó wâng kó râ a nghut.

### *Byù Hkâsat*

<sup>21</sup> 'Byù hkâsat, ☆ sat é sù gi, jéyáng é hui râ nghut lhê' ga, hí hpyang lhê é bang lé tái tô é dang, nungmoq wó gyô wú bê nghut lhê. <sup>22</sup> Nghut kôlhang, Ngò, nungmoq lé tái kôlé, gumang rayuq yuq lé nhikjum yô é sù gi, jéyáng é hui râ nghut lhê. Hau htoq agó, gumang hpó lé, 'Byù gang'\* ga tái é sù gi, Yudaq byìn tú wapdoq má jéyáng é hui râ nghut lhê; 'Byù bam ê' ga wut é sù gi, ngaraî myi eq gingdán nyi ri.

<sup>23</sup> Haú mù, hkungga gyap má, nàng hkungga nhông râ dâ é hkùn, náng é gumang rayuq yuq, nang lé mara hun é hkyô rajung jung joq é lé, myit bün kat é nghut jáng, <sup>24</sup> náng é hkungga lé, haú hkungga gyap hí má tô pyâm to mù, náng é gumang

---

☆ **5:21** Htoq Ló 20:13      \* **5:22** Byù gang gâ é lé, Grik đông "Raka" gâ lhê.

hpó haú yuq eq hí nguingón hkyô lô yû luî sheq, hkungga lé nhông byi aq.

<sup>25</sup> Nang lé yui tsuq sù gi, nang lé tarâ rûng má dé e lô é hkûn, hkyô má ru nghut nyi ashî u lé, yhang eq nguingón hkyô hí hân yù aq. Haû a nghut jáng, haú yuq gi, nang lé, tarâ agyi chyáng ê ap pyám mù, haû tarâ agyi gi, nang lé htóng hkyô pyám râ matú, htóng suwún hpô é loq má ap pyám râ nghut lhê. <sup>26</sup> Ngò, nang lé teng za taí lé, yuichyîn haû a ban xap xap gi, htóng haú mai nàng wó htoq lô râ a nghut.

### *Su-myi Sulàng Lú É Hkyô Eq Séng Luî Mhoqshit É Dang*

<sup>27</sup> 'Su-myi sulàng hkâlú'☆ gâ é dang lé, nungmoq wó gyo wú bê nghut lhê. <sup>28</sup> Nghut kôle, Ngò, nungmoq lé taí kôlé, myiwe rayuq lé shut nau é myit èq wú é sù gi, yhâng é myit hkaû má, myiwe haú yuq eq su-myi sulàng lú hkyô kut é sù nghut bê. <sup>29</sup> Haû mù, náng é loqyo myoq èq, nang lé mara kut shut nhang é nghut le gi, haú lé lap choq yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri. <sup>30</sup> Haû eq rajung za, náng é loqyo loq èq, nang lé mara kut shut nhang é nghut le gi, haú lé hpyit yû mù, dú pyám aq. Hkâsu mù gâ le, náng é ragùngdu gón ngaraî ming gyó râ htoq má, náng é gungsho rajung jung za htên byuq é nghut le gi, náng é matú je ge ri.

---

☆ 5:27 Htoq Lô 20:14



*Myi Làng Gâng É Hkyô Eq Séng Luî Mhoqshit É Hkyô*

*Mht 19:9; Mrk 10:11-12; Luk 16:18*

<sup>31</sup> 'Yhumsing é yhangmyi lé kâng é sù gi, lhoq kang laiká byi râ dut lhê.'<sup>☆</sup> gâ é dang joq lhê.  
<sup>32</sup> Nghut kôlhang, Ngò, nungmoq lé taí kôlé, myiwe dông mai làng shut é a nghut é za, yhumsing é yhangmyi lé kâng é sù gi, myiwe haú lé sulàng lú sù dut nhâng bê nghut ri; hau htoq agó, yhumsing yhanglâng eq gang bê myiwe lé hâng yu é sù le, su-myi lú é sù dut bê nghut ri.

*Danggidiq*

<sup>33</sup> Hau htoq agó, 'Danggidiq a zùng hkâmû; Yhumsing lé byi tô é danggidiq eq rajung za cháng aq.' ga luî, hí hpyang lhê é bang lé, taí tô é dang lé nungmoq wó gyô wú bê nghut lhê.  
<sup>34</sup> Nghut kôlhang, Ngò, nungmoq lé taí kôlé, hai èq le hkâdakâm kó: mauhkûng lé lang luî le, hkâdakâm kó; hkâsu mù gâ le, haú gi, Garai Gasâng é zùng tanghkuq nghut lhê; <sup>35</sup> myigùng lé lang luî le, hkâdakâm kó; hkâsu mù gâ le, haú gi, Garaí é hkyí nang jang nghut lhê; Yerusalem lé lang luî le, hkâdakâm kó; hkâsu mù gâ le, haú gi, Hkôhkâm mó é myuq nghut lhê. <sup>36</sup> Hau htoq agó, yhumsing é ulhûm èq le, hkâdakâm kó; hkâsu mù gâ le, xâm rahkat lé lhang hpyû shoq noq shoq, nàng wó kut é a nghut. <sup>37</sup> Náng é dang lé, 'nghut lhê' lé gi, 'nghut lhê' nghû, 'a nghut é' lé gi, 'a nghut' nghû, taí aq; haú mai lai é gi, haú agè ashop su chyáng mâ é nghut ri.

---

☆ 5:31 Tarâ Pun 24:1

*Lató Hpuq É Hkyô**Luk 6:29-30*

<sup>38</sup> 'Myoqjí matú myoqjí xap, zui matú zui xap'✧  
 gâ é dang lé, nungmoq wó gyô wú bê nghut lhê.  
<sup>39</sup> Nghut kôlhang, Ngò, nungmoq lé taí kôlé, agè  
 ashop kut é sù lé lató hkâhpuq. Náng é loqyo  
 bowâm má pyuq byi sù lé, loqpaî hkyam le hkâm  
 byi shi aq. <sup>40</sup> Byù rayuq yuq, nang lé mara tsuq mù,  
 náng é buzo lé yu pyám byí é nghut jáng, bumó lé le,  
 hkyut byi shi aq. <sup>41</sup> Byù rayuq yuq, nang lé zik mù,  
 radéng ê nhâng jáng, yhang eq rahá í dèng châng ê  
 byi aq. <sup>42</sup> Nang lé dung sù lé, byi aq; náng chyáng  
 mai chyí naû sù lé le, nunghtáng hkâlhik pyám.

*Gyè Lé Chyitdap Râ É Hkyô**Luk 6:27-28, 32-36*

<sup>43</sup> 'Náng é chyangnâm mâ é bang lé gi, chyitdap  
 mù, náng é gyè lé gi, a jú kut aq'✧ gâ é dang  
 lé, nungmoq wó gyô wú bê nghut lhê. <sup>44</sup> Nghut  
 kôlhang, Ngò, nungmoq lé taí kôlé, nungmoq gi,  
 mauhkûng htoq mâ é nungmoq é Îwâ é yhangzô pé  
 wó dut kó sháng gaq, nungmoq é gye pé lé chyitdap  
 mù, nungmoq lé zing-ri bâng é matú kyûdung byi  
 keq; <sup>45</sup> hkâsu mù gâ le, Yhang gi, agè ashop bâng  
 é ahtoq má le, gè bâng é ahtoq má le, bui tsô byi  
 nhâng mù, dingmán bâng é ahtoq má le, a dingmán  
 bâng é ahtoq má le, mau wô byi nhâng Sû nghut  
 ri. <sup>46</sup> Nungmoq lé chyitdap é bang lé za chyitdap  
 kô le gi, nungmoq é matú hai chyunghuq wó kó râ  
 lú? Kang guq bang lhang, haû su kut lhê a nghut  
 kó lú? <sup>47</sup> Hau htoq agó, nungmoq é gumang wui

---

✧ 5:38 Htoq Ló 21:24 ✧ 5:43 Nhong 19:18

lé za shi-kyám kô le gi, nungmoq kut é muzó gi, góbâng htoq má haî wá laklaî râ lhú? Tûngbaù pé lháng haû su kut lhê a nghut kó lhú? <sup>48</sup> Haû mù, mauhkûng htoq mâ é nungmoq é Îwa gumjup é su, nungmoq le gumjup nyî keq.

## 6

### *Alu Byî É Hkyô*

<sup>1</sup> Nungmoq dingmán é hkyô lé, byu pé myàng sháng gaq nghû, byu pé hí má a kut shit loshoq, sidiq nyî keq. Haû su kut é nghut jáng, mauhkûng htoq mâ é nungmoq é Îwâ chyáng mai, chyunghuq wó yû kó râ a nghut.

<sup>2</sup> Haû mù, haû gegùn labyoq kut bang gi, byu pé èq shigyaú é huî sháng gaq ga, tarajong pé hká, hkyô pé hká kut é su, nàng gi, alu byî é hkûn, tut htê su hkâhhoq htoq. Ngò, nungmoq lé teng za táí kôlé, haú bang gi, yhangmoq é chyunghuq lé hkúm shoq wó yû bekô nghut lhê. <sup>3</sup> Ra châ to bang lé nàng alu byî é hkûn, náng é loqyo loq kut é hkyô lé, loqpaî loq lé lháng hkâsé nhâng. <sup>4</sup> Haú hkûn, nàng alu byî é lé, ó a châng sé râ nghut lhê. Haú jáng sheq, ó a sé loshoq kut é hkyô lé myang é sù, náng é Îwa gi, nang lé chyunghuq shigyaú râ nghut lhê.

### *Kyûdûng É Hkyô*

#### *Luk 11:2-4*

<sup>5</sup> Nungmoq kyûdûng le, gegùn labyoq kut bang su hkâkut kó; hkâsu mù gâ le, yhangmoq gi, byu pé byu-myàng shoq ga, tarajong pé eq hkyô kang

pé má yap mù, kyûdung râ ô nau akô. Ngò, nungmoq lé teng za taí kôlé, haú bang gi, yhangmoq é chyunghuq lé wó yû bekô nghut ri. <sup>6</sup> Nghut kôlhang, nàng kyûdûng le, náng é gok hkaú má wang ló mù, hkum myhî pyám luî, a byu-myang é náng é Îwâ chyáng dung aq. Haú jáng, ó a byu-myang é lé myàng sù, náng é Îwa gi, nang lé jeju dum tau byi râ nghut lhê. <sup>7</sup> Haú mù, kyûdûng le, tungbàu pé su kut luî, dang puq hkâhtau kó; hkâsu mù gâ le, yhangmoq gi, dang hîng chín luî dung jáng sheq, gyo byi nhô ngam akô nghut ri. <sup>8</sup> Haú bang su hkâkut kó; hkâsu mù gâ le, nungmoq é Îwa gi, nungmoq râ é hkyô lé, nungmoq a dung shi mai sê to Sù nghut lhê.

<sup>9</sup> Haú mù, nungmoq kyûdûng le,

'Mauhkûng htoq tsáng myhâng mâ é ngamoq é Âwa ê,

Náng é myìng gi, chyoiyúng nyî sháng gaq,

<sup>10</sup> Náng é mingdán jé lô sháng gaq,

Nàng ô nau é hkyô, mauhkûng htoq má dik é su, myigùng htoq má le dik sháng gaq ô.

<sup>11</sup> Ngamoq nyí wuî râ é zoshuq lé, ngamoq lé hkû-nyí byi laq.

<sup>12</sup> Ngamoq lé shut é bâng é mara lé ngamoq hkyut pyám byî é su,

ngamoq é mara lé le hkyut pyám byi laq.

<sup>13</sup> Ngamoq lé, agúng alaú hkyô má a wàng nhang é za,

agè ashop jang mai hkyi yù laq ô.

(Hkâsu mù gâ le, kô dik é up sîng hkyô, a-tsam eq hpungwup shingkang gi, pyat dedu ahtum abyuq Náng chyáng ru joq nyi ri ô! Amen.)\*  
 nghû dung keq. <sup>14</sup> Supê èq, nungmoq lé kut shut é mara lé, nungmoq hkyut pyám byî é nghut le gi, mauhkûng htoq mâ é nungmoq é Îwa le, nungmoq lé mara hkyut pyám byi râ nghut lhê. <sup>15</sup> Nghut kôlhang, haú bâng é mara lé, nungmoq a hkyut pyám byî é nghut le gi, nungmoq é Îwa le, nungmoq é mara lé hkyut pyám byi râ a nghut.

### *Zoshuq Gám É Hkyô*

<sup>16</sup> Nungmoq gi, zoshuq gám é hkûn, gegùn labyoq kut bang su myoqdong hkâlhoq nyhui kó; hkâsu mù gâ le, haú bang gi, yhangmoq zoshuq gám é hkyô lé, tûn shit râ matú myoqdong lhoq nyhui shit akô nghut ri. Ngò, nungmoq lé teng za taí kôlé, haú bang gi, yhangmoq é chyunghuq wó yû bekô nghut ri. <sup>17</sup> Nungmoq kúm gi, zoshuq gám é hkûn, nungmoq zoshuq gám é hkyô lé, byu pê hí má de de a dut é za, nungmoq a byu-myang é Îwa za myàng sháng gaq, myoq chî pyám luî, u xû but keq; <sup>18</sup> haú jáng sheq, ó a sé loshoq kut é hkyô lé myang é Sû, nungmoq é Îwa gi, nungmoq lé chyunghuq shigyaú râ nghut lhê.

### *Mauhkûng Htoq Mâ É Sutzè*

#### *Luk 12:33-34*

<sup>19</sup> Jângkon, jogyik èq wó lhoq htên pyâm é eq hkaú su èq le wó wang hkaú yu pyám byî é myigùng htoq má, nungmoq é matú, sutzè lé hkâhkong to

\* **6:13** Chyúmlaíká ra-am má, shí túm a bo é nghut lhê.

kó. <sup>20</sup> Jàngkon, jogyik èq le a wó lhoq htên pyâm é eq, hkaú su èq le a wó wang hkaú yu pyâm byî é mauhkûng htoq má sheq, nungmoq é matú sutzè hkong to keq. <sup>21</sup> Hkâsu mù gà le, náng é sutzè joq jang má, náng é i-myt le jé nyi râ nghut lhê.

<sup>22</sup> Myoqjí gi, gungdû é myibung nghut nyi ri. Náng é myoqjí ge é nghut le gi, náng é gungdu gón má maubó byíng mui to râ nghut lhê. <sup>23</sup> Nghut kôlhang, náng é myoqjí a ge é nghut le gi, náng é gungdu gón gi, mauchut tuq dut nyi râ nghut lhê. Náng chyáng bo é maubó gi, mauchut byuq é nghut jáng, mauchut haú gi, hkâ-í yhang htû râ lhâ!

<sup>24</sup> Ó yuq nghut kôle, yhumsîng í yuq lé wó dojaú râ a nghut. Hkâsu mù gà le, yhang gi, rayuq lé a jú kut mù, rayuq lé gi, chyitdap râ nghut lhê; haú a nghut jáng, rayuq lé lhumzui mù, rayuq lé gi, hpau a tap kut râ nghut lhê. Nungmoq gi, Garai Gasang lé le, ngunzè lé le, radá dâm wó dojaú kó râ a nghut.

### *Hkâ-myt Chiq Kó*

#### *Luk 12:22-31*

<sup>25</sup> Haú mù luî, Ngò, nungmoq lé taí kôlé, nungmoq é asak matú haí zo haí shuq râ eq nungmoq é gungdû matú haí wut haí tsang râ lé, hkâ-myt chiq kó. Asak gi, zoshuq htoq má, gungdu gi, mebû htoq má, je ahkyak lhê a nghut kó l hú? <sup>26</sup> Maulat mâ é nghoqzô pé lé wú wú keq; yhangmoq gi, kyô hkyô kyô shu a kut é htoq agó, chyî pé má le haí a tsîng kat to kô é nghut le lháng, mauhkûng htoq mâ é nungmoq é Íwa gi, yhangmoq lé, byi tso byi huq nyi lhê. Nungmoq gi, nghoq haú pé htoq má je riyhang hpaudap nyi lhê a nghut kó

lhub? <sup>27</sup> Nungmoq má, ó yuq wá, myit chiq é èq, yhumsing é asak lé radúng kô wó jat yù kó râ lhub?

<sup>28</sup> Haû nghut le nhîng, haî mù, mebû matú myit chiq akô lhub? Myigùng má yuq tô é htutbó ban pé hkâsu kut kô lo é lé, myit wú keq. Haú pé gi, mù le a zui, hkyîng le a duì kó nghut ri. <sup>29</sup> Nghut kôlhang, Ngò, nungmoq lé taí kyo kôlé, hkohkâm Sholumon hpung kô dik u lé wut é mebu lhang, ban haû rabó lé a hkyit nghut ri. <sup>30</sup> Lumjîng myit tiq é bang ê, hkû-nyí joq mù, napmá myihkyóm má dú kat pyám hui râ nghut é yosô mhan pé lé za lhang, Garai Gasang haû su kut hut é nghut le gi, nungmoq lé je riyhang hut râ a nghut kó lhub? <sup>31</sup> Haû mù, 'Haî zo râ lhi?' 'Haî shuq râ lhi?' 'Haî wut râ lhi?' nghû hkâ-myit chiq myhîng kó. <sup>32</sup> Tûngbaù pé kúm gi, haú pé banshoq lé châng hkat ho nyi akô; nghut kôlhang, mauhkûng htoq mâ é nungmoq é Îwa gi, haú pé lé nungmoq râ é hkyô, sé byí nyi lhê. <sup>33</sup> Nghut kôlhang, Yhâng é mingdán eq dîngmán hkyô lé hí hô keq, haû jáng, haú pé banshoq, nungmoq lé puq byi râ nghut lhê. <sup>34</sup> Haû mù, napmá lhê é matú hkâ-myit chiq kó; hkâsu mù gâ le, napmá gi, yhâng é yhang myit chiq râ nghut lhê. Hkû-nyí é wuîhke hkyô gi, hkû-nyí é matú gé bê nghut ri.

## 7

### *A Jéyáng Râ Hkyô*

*Luk 6:37-38, 41-42*

<sup>1</sup> Nungmoq jéyáng é a hui kó sháng gaq, ó lé le, hkâjéyáng kó. <sup>2</sup> Hkâsu mù gâ le, nungmoq jéyáng é su, nungmoq le, jéyáng é hui kó râ nghut é htoq

agó, nungmoq lik byi é bung èq, nungmoq lé dum lik byi râ nghut lhê.

<sup>3</sup> Yhumsing myoq hkaû má lúng tô é siktúm lé lhang a myit wú é nhing, haî mù luî, nunggu nungmâng é myoqwàng lé myang lhê lhú?

<sup>4</sup> Yhumsing é myoq má siktúm lhùng to luî nhing, 'Náng myoq má lúng tô é myoqwàng lé, ngò choq pyám byi lé.' nghú luî, náng é gumang hpó lé hkâsu wó taí râ lhú? <sup>5</sup> Gegùn labyoq kut sù ê, náng é myoq má lúng tô é siktúm lé hí choq pyám aq. Haû jáng sheq, nunggu nungmâng é myoq má wang tô é myoqwàng choq pyám byi râ matú, nàng san za myàng râ nghut lhê.

<sup>6</sup> Hkuî pé lé, yunglhô é zê hkâbyi kó; waq pê hí má, nungmoq é palhé wuizo lé hkâdú byi kó. Haû su kut jáng, haú bang gi, zè haú pé lé nàng pyeq pyám mù, nungmoq lé dum taû ngat lò râ nghut lhê.

### *Dung Keq, Hô Keq, Hkum Má Kok Keq*

#### *Luk 11:9-13*

<sup>7</sup> Dung keq, haû jáng, nungmoq lé byi râ nghut lhê; hô keq, haû jáng, nungmoq myàng kó râ nghut lhê; hkum má kok keq, haû jáng, nungmoq lé hpóng byi râ nghut lhê. <sup>8</sup> Hkâsu mù gâ le, ó yuq nghut kôle, dung sù wó râ; hô sù myàng râ; hkum kok sù lé gi, hpóng byi râ nghut lhê.

<sup>9</sup> Nungmoq má, ó yuq wá, yhumsing yhangzo muk dúng le, luqgok byi kó râ lhú? <sup>10</sup> Ngozo dúng le, lhangmuì\* byi kó râ lhú? <sup>11</sup> Agè ashop é bang nungmoq lhang gi, nungmoq é zo wuî lé, ge é

\* **7:10** Garai Gasang gi, lhangmuì a zo râ matú, Yudaq byu pé lé hkunmó hkyô tô é nghut lhê.



chyunghuq dat byi kô le nhîng, mauhkûng htoq tsáng myhâng mâ é nungmoq é Îwa gi, Yhang lé dúng é bang lé, je riyhang ge é chyunghuq byi râ nghut lhê! <sup>12</sup> Haû mù, hai hkyô má nghut kôlhâng, nungmoq gi, yhumsîng ô nau é dông supé lé kut nhâng nau é su, yhangmoq lé le kut byi keq. Haî mù gâ le, haû gi, jep é tarâ eq myiqhtoî pê é dang lo jup tô é nghut ri.

*Chyap É Hkúmdong Eq Lam É Hkúmdong*

*Luk 13:24*

<sup>13</sup> Chyap é hkúmdong mai wàng keq. Hkâsu mù gâ le, lam é hkúmdong eq hkyô mó gi, htên byoq hkyô shut shuî e é nghut mù luî, haû dông wàng bang gi, myô akô nghut ri. <sup>14</sup> Chyap é hkúmdong eq hkyô zo kúm gi, asak hkyô shut shuî e é nghut mù luî, haû lé myang ho é bang gi, shaû akô nghut ri.

*Agàm Eq Ashi*

*Luk 6:43-45*

<sup>15</sup> Nungmoq chyáng jé lé lo é myiqhtoi pyoq pé lé, sidiq nyî keq; yhangmoq gi, sau-kuq wut mù, nungmoq chyáng jé lé kôlhâng, myaq zo myaq shuq nau é wamhkuî pé nghut akô. <sup>16</sup> Yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê. Zubyap mai tsibiyiq shi, zugâm mai maihpáng-shi wó yu wú akô lhú? <sup>17</sup> Ge é agàm gi, ge é ashi zui mù, a ge é agàm gi, a ge é ashi za dat zui ri. <sup>18</sup> Ge é agàm gi, a ge é ashi a wó zui, a ge é agàm le, ge é ashi a wó zui nghut ri. <sup>19</sup> Ge é ashi a zuî é shigâm hkangmó lé gi, htuq pyám mù, myi má dú kat pyám râ nghut lhê. <sup>20</sup> Haû mù, yhangmoq é muzó jizó lé wú mù, nungmoq gi, yhangmoq lé wú sé kó râ nghut lhê.

21 Ngo lé, 'Yhumsîng ê, Yhumsîng ê,' ga, wut é bang yuq hkanmó gi, mauhkûng mingdán má myang wàng kó râ a nghut; haû mauhkûng htoq mâ é Ngá Wa ô nau é đông kut sủ za sheq, myang wàng râ nghut lhê. 22 Haû buinyì má, byù myo myo gi, 'Yhumsîng ê, Yhumsîng ê, Náng é myìng mai, ngamoq gi, myiqhtoi le htoi bê; nat gang lé hkat htoq bê; laklaí kumlhá ajung jung lé, kut bê a nghut lú?' ga luí, Ngo lé myi kó râ nghut lhê. 23 Haû hkûn, Ngò gi, 'Nungmoq lé, Ngò hkâ-nhám le a sé; agè ashop hkyô kut é bang nungmoq, Ngá chyáng mai gâng ló byuq keq.' nghû, yhangmoq lé san za tũ taí kat râ nghut lhê.

### *Hpaqchyî Bò Sủ Eq Ngok Sủ*

#### *Luk 6:47-49*

24 Haû mù, Ngá é dang shí pé lé wó gyô yù luí, châng kut é sủ gi, hpaqchyî bò mù, lunghtân htoq má, yhûm saí é sủ eq wuí nyi ri. 25 Mau wô, wui je, laidun lò mù, yhûm haû lé lo htung kôlhang, yhûm haû gi, a htên byoq byuq râ nghut lhê; hkâsu mù gâ le, yhûm haû gi, lunghtân htoq má tsuq tô é yanmai nghut ri. 26 Nghut kôlhang, Ngá é dang lé, wó gyô yù mù, a cháng sủ gi, semuî-jàng má, yhûm saí é byù ngok eq wuí nyi râ nghut lhê. 27 Mau wô, wui je, laidun wò yup dut lò mù, yhûm haû lé lo htung jáng, yù whuî a mù loshoq htên byoq byuq râ nghut lhê." gâ ri.

28 Yesuq mungdang ban taí é hkûn, shiwa byu pé gi, Yhang mhoqshit é hkyô lé maúhong bum akô; 29 hkâsu mù gâ le, Yhang gi, yhangmoq é tarâ sará pé eq a pung é za, ahkáng ayá wó sủ rayuq su, mhoqshit é yanmai nghut ri.

## 8

*Manggâm Dap É Byù Rayuq**Mrk 1:40-45; Luk 5:12-16*

<sup>1</sup> Yesuq gi, bùm htoq mai gyó lo é hkûn, byù moq mó gi, Yhâng htâng châng bum akô nghut ri. <sup>2</sup> Haú hkûn, manggâm dap é byù rayuq gi, Yhâng é hí má, lé mù, hkyihput htuq luí, "Yhumsîng ê, Nàng dóng é nghut le gi, ngo lé Nàng wó lhoq sân-yúng byi râ nghut lhê." ga taí ri.

<sup>3</sup> Yesuq gi, loq lhâm kat mù, haú yuq lé ê záng luí, "Ngò dóng lhê, sân-yúng aq hkoi." ga taí kat ri. Haú hkûn jáng, haú yuq é manggâm gi, ge byuq bê nghut ri. <sup>4</sup> Haú hkûn, Yesuq gi, "Nàng, shí hkyô ó lé le hkâtaí kyo. Nghut kôlhang, náng é gungdu lé, hkyangjong hpô chyáng ló tûn shit mù, yhangmoq é matú saksé dut sháng gaq, Mosheq taí tô é eq rajung za, hkungga ló nhông byi aq." ga haú yuq lé taí kat ri.

*Gyezau Hpô É Lumjîng Myit**Luk 7:1-10; Yhn 4:43-54*

<sup>5</sup> Yesuq, Kaperna-um wà má wang e ló le, Romaq gyezau hpó rayuq gi, Yhâng chyáng lé jé mù, <sup>6</sup> "Yhumsîng ê, ngá é dui-nhâng zoshâng gi, gùngjum shi é htoq agó, yhûm má gyaí no jamjaú leq tô ri." ga garúm lé dung ri.

<sup>7</sup> Haú hkûn, Yesuq gi, yhang lé, "Ngò, lé lhoq gê byi râ." ga taí kat ri.

<sup>8</sup> Gyezau hpó haú, Yhang lé dum tû taí é gi, "Yhumsîng ê, Nàng, ngá é laishîn-htâng má, lé nang râ lhang ngò má a gingdán. Nàng, dang rahkun za taí kat laq; haú hkûn, ngá é dui-nhâng zoshâng ge ló râ nghut lhê. <sup>9</sup> Hkâsu mù gê le, ngò le ahkáng ayá

wó é zau rayuq é a-ô mâ é zau nghut lhê; ngá é a-ô má le gyezô pé nyi lhê; rayuq lé, 'Ê aq!' nghu le, yhang e ló lhê; góyuq lé, 'Lò aq!' nghu le, yhang lo lhê; ngá jûn lé le, 'Shî kut aq!' nghu le, yhang kut lhê." gâ ri.

<sup>10</sup> Yesuq gi, dang haú lé wó gyo jáng, maú byuq luí, Yhâng htâng cháng bang lé, "Ngò, nungmoq lé teng za taí kôlé, Israelaq amyû má lháng, shî í lumjínq é sù lé, Ngò, rayuq lé le a myàng wú é nghut lhê. <sup>11</sup> Ngò, nungmoq lé taí kôlé, buihtoq buiwàng hkyam mâ é byu pé myo myo gi, mauhkûng mingdán má, Abraham, Isak, Yakup pé eq rahá, zoshuq poi mó má myang zùng kó râ nghut lhê. <sup>12</sup> Nghut kôlhang, mingdán haú má wàng âng é bang kúm gi, shinggan mauchut hkaû shut dú pyâm é hui luí, haú jowò má ngaubyi ngaù nhap eq zùi kyik kyik shoq hpuzô nyi bùm bekô râ nghut lhê." ga taí ri.

<sup>13</sup> Hau htâng, Yesuq gi, gyezau lé, "Ló aq hkoi! Nàng lumjínq é eq rajung za, dut râ nghut lhê." ga taí ri. Haú-u má yhang, haú dui-nhâng zoshâng gi, ge byuq bê nghut ri.

*Byù Myo Myo Lé Lhoq Gê Byî É Hkyô*

*Mrk 1:29-34; Luk 4:38-41*

<sup>14</sup> Yesuq gi, Petruq é yhûm má jé wang e é hkûn, Petruq é yhâng-aumó gyai yhang no leq tô é lé, ê myang ri. <sup>15</sup> Yesuq gi, yhâng é loq má ê záng kat é hkûn, Petruq yhâng-aumó gi, nòhpyo ge byuq mù, toq luí, Yhang lé wó gaí tso gaí huq bê nghut ri.

<sup>16</sup> Myinhtâng mauchut lô jáng, nat gang wang júng nyi é bang myo myo lé, Yhâng chyáng shuî lé lo akô. Yhang gi, agè ashop é nat gâng pé lé dâng èq

hkat htoq pyám mù, nòhpyo huí é bang banshoq lé  
 lhoq gê byí ri. <sup>17</sup> Haú gi,  
 "Yhang gi, nga-nhùng é nolì nojàng lé yu pyám byi  
 mù, nga-nhùng é nolì nojàng lé, wùn waq  
 pyám byi bê nghut ri." ☆  
 ga, myiqhtoi Esai-aq taí tô é dang lhoq dik râ matú  
 nghut ri.

### *Yesuq Htâng Cháng Râ Bang*

*Luk 9:57-62*

<sup>18</sup> Yesuq gi, Yhâng é lhîngkhyuq má byù moq mó  
 zup míng nyi é lé myàng jáng, Yhâng é chángzô pé  
 lé, nhông hé hpoq shut gû dap ê sháng gâ ri. <sup>19</sup> Haú  
 hkûn, tarâ sará rayuq gi, lé lô mù, "Sará ê, ngò gi,  
 Nàng hká e le hká cháng râ nghut lê." ga Yhang lé  
 lé taí ri.

<sup>20</sup> Haú jáng, Yesuq gi, "Wamhkuí pé gi, hkyûng  
 wó akô; nghoq pé le, nghoqsut wó akô. Nghut  
 kôlhang, haú Byu Yhangzo gi, u nghê jowò lhang a  
 wó nghut ri." ga lhom taí kat ri.

<sup>21</sup> Haú hkûn, chángzo rayuq gi, "Yhumsîng ê, ngá  
 wa lé ló yhûm pyám râ ahkáng hí byi shilaq." ga taí  
 kat ri.

<sup>22</sup> Nghut kôlhang, Yesuq gi, "Shî bê bang gi, shî bê  
 bang yhangchang yhûm lhum kó sháng gaq, nàng  
 gi, Ngá htâng cháng aq." ga dum taú taí ri.

### *Laidun Lhoq Zîm É Hkyô*

*Mrk 4:35-41; Luk 8:22-25*

<sup>23</sup> Hau htâng, Yesuq lhaí hkaú má wàng mù,  
 Yhâng é chángzô pé le, Yhâng htâng châng wàng  
 bekô nghut ri. <sup>24</sup> Haú hkûn, nhông má byodan-htik  
 laidun mó lò mù, wuìlhêng pé gi, lhaí má bat ùm lò

---

☆ **8:17** Esai 53:4

bê nghut ri. Nghut kôlhang, Yesuq gi, yhup myhî tô ri. <sup>25</sup> Chángzô pé gi, Yhâng chyáng jé ê mù, Yhang lé nhaû pun luî, "Yhumsing ê, hkyi yù laq ô! Nganhúng myup ló nyi ri." ga taî akô.

<sup>26</sup> Yhang gi, "Lumjǐng myit shaû é bang ê! Haî mù, haû-í gyuq bum akô lú?" ga taî kat ri. Hau htâng, Yhang gi, toq luî, laidun eq wuìlhêng pé lé tân kat jǎng, banshoq zǐm byuq bê nghut ri.

<sup>27</sup> Byù haú bang gi, maúhong byuq kômù, "Shí yuq gi, hkasû é byù là? Làì eq wuìlhêng pé lǎng gi, Yhâng é dang lé gyo byî ri myhi-nhung!" ga luî, rayuq eq rayuq myí lǐm bum akô nghut ri.

*Nat Wang Júng Su Njik Lé, Lhoq Gê Byí É Hkyô*  
*Mrk 5:1-20; Luk 8:26-39*

<sup>28</sup> Yesuq gi, Gadara byu pé é mau hpoq má jé dap ló jǎng, nat gang wang júng é byù í yuq gi, lupdùng mai htoq lé lo kômù, Yhang lé lé huî akô. Haú njik gi, haú hkyô mai ó lǎng a wám lai loshoq wuî é su njik nghut akô. <sup>29</sup> Yhangnhik gi, Yesuq lé, "Garaî Yhangzo ê, Nàng, ngamoq eq haî sêng lǐhê lú? Ahkyíng a jé shimá, ngamoq lé zing-ri rǎ matú jé lé lo é nghut lǐhê lú?" ga taî garû akô.

<sup>30</sup> Haú mai a lǐm wê é jowò má, waq rajùm mó gi, myí dû but zô nyi bum akô nghut ri. <sup>31</sup> Nat gǎng pé gi, Yesuq lé, "Nàng, ngamoq lé hkat htoq rǎ nghut jǎng, hê waq pé chyáng wàng nhâng laq." ga dǔng akô.

<sup>32</sup> Yesuq gi, "Htoq ló keq!" ga taî kat ri. Haú mù, yhangmoq gi, htoq ló luî, waq pé chyáng wàng mù, waq haú jǐm gi, gampyoq mai nhông hkaû shut dǐn yǎn wang ló kôluî, wuì hkaû má myup shi byuq bekô nghut ri. <sup>33</sup> Waq zúng bang gi, myuq

hkaû shut hfang din wang ló kômù, dut laî lo é hkyô banshoq lé le, nat gang wang júng huí su nhik hkâsu dut é hkyô lé le, ló taí kyo akô nghut ri.  
<sup>34</sup> Haû mù, rawa bang gi, Yesuq lé hui râ matú htoq lé lo bùm kômù, Yhang lé myàng jáng, yhangmoq é mau mai htoq ló byuq râ matú, chôm dúng tôngbân akô nghut ri.

## 9

### *Gungjum Shî Sû Lé Lhoq Gê Byî É Hkyô*

*Mrk 2:1-12; Luk 5:17-26*

<sup>1</sup> Yesuq gi, lhaî má wàng mù, yhumsing é wà shut jî dap ló bê nghut ri. <sup>2</sup> Byù ra-am gi, gùngjum shî sù rayuq lé, taphkang mai Yhâng chyáng waq lé lo akô. Yesuq gi, yhangmoq é lumjínng myit lé byu-myàng jáng, haû gùngjum shî sù lé, "Ngá zo é, nhik hkâ-ngê; náng é yubak mara lé hkyut pyám byi bê." ga taí ri.

<sup>3</sup> Haú hkûn, tarâ sará pé ra-am gi, yhangmoq é i-myt hkaû má, "Byù shí yuq gi, Garai Gasang lé rhoî dang taí nyi ri." ga myit nyi bum akô nghut ri.

<sup>4</sup> Yesuq gi, yhangmoq myit nyi é hkyô lé sé mù, "Nungmoq é i-myt hkaû má, haû su agè ashop é dông haî mù myit nyi akô lhú? <sup>5</sup> 'Náng é yubak mara lé hkyut pyám byi bê.' nghû taí râ eq 'Toq luî, hkyô so aq.' nghû taí râ má, hká hkun je taí lui lhê lhú? <sup>6</sup> Nghut kôlhang, haû Byu Yhangzo gi, mingkan htoq má, mara hkyut byi râ ahkáng wó Sû nghut é lé, nungmoq lé sé nhâng nau lhê." ga taí lui, haû gùngjum shî sù lé, "Toq aq, náng é taphkang yu chûng lui, yhûm taû ló aq hkoi." ga taí kat ri.

<sup>7</sup> Haû mù, haú yuq gi, toq mù, yhûm shut ló byuq

bê nghut ri. <sup>8</sup> Byù hpông mó gi, haú hkyô lé myàng kôjáng, gyuq maú kômù, byu pé lé haú su é ahkáng ayá byi tô é Garai Gasang lé hkya-on kungton bum akô nghut ri.

*Mahte lé shuî yu é hkyô*

*Mrk 2:13-17; Luk 5:27-32*

<sup>9</sup> Yesuq gi, haú jowò mai sô e ló é hkûn, kang guq zúm má zung tô é Mahte ga sù lé myàng mù, "Ngá htâng cháng aq." ga tái jáng, haú yuq gi, toq luî, Yhâng htâng cháng bê nghut ri.

<sup>10</sup> Yesuq gi, Mahte é yhûm má myinzang zô nyi é hkûn, kang guq bang myo myo eq yubak dap bang myo myo lé jé kômù, Yhang eq Yhâng é chángzô pé eq rahá zo shuq bum akô. <sup>11</sup> Haú lé, Hparishe pé myàng kôjáng, Yhâng é chángzô pé lé, "Nungmoq é sará gi, haî mù luî, kang guq bang eq yubak dap bang eq rahá zo shuq nyi lhê lhú?" ga myî akô.

<sup>12</sup> Yesuq gi, haú su ga kô é lé wó gyo jáng, "Wángzán bang gi, chi sará a ra kó; nòhpyo hui bang za sheq ru râ lhê. <sup>13</sup> 'Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê.'\* gâ é lichyúm lé mhoq yû keq. Hkâsu mù gâ le, Ngò gi, dingmán bang lé wut yù râ matú jé lé é a nghut, yubak dap bang lé ji yù râ matú sheq jé lé é ru nghut lhê." ga tû tái kat ri.

*Zoshuq Gám É Eq Sêng É Hkyô*

*Mrk 2:18-22; Luk 5:33-39*

<sup>14</sup> Hau htâng, Wui-myhup Sará Yohan é chángzô pé gi, Yesuq chyáng jé lé kômù, "Ngamoq eq Hparishe pé gi, zoshuq gám gám kut lhê; nghut

---

\* **9:13** Hos 6:6



kôle, Náng é chángzô pé gi, haî mù a gám kô é lúhú?" ga luî, lé myî akô.

<sup>15</sup> Haû mù, Yesuq tû taî é gi, "Bíng pé gi, lusik eq rahá nghut nyi to ashî hkûn, hkâsu ge yón kó râ lúhú? Lusik lé, yhangmoq chyáng mai shuî yu pyâm é hkyíng jé râ nghut lhê; haú hkûn kúm gi, yhangmoq zoshuq gám kó râ nghut lhê.

<sup>16</sup> Ó yuq le, mebu xau má pán sik èq a lhaq hpo wú kó; hkâsu mù gâ le, pán sik kun byuq jáng, mebu xau le je lhoq cheq pyám râ nghut lhê. <sup>17</sup> Tsibiyiq wing asik lé le, shokuq htûng axau má ó a kat wú kó. Kat é nghut jáng, tsibiyiq wing asik soq htân luî, htûng buq goq byuq mù, tsibiyiq wing le yui shun byuq, htûng le htên byuq, dut râ nghut lhê. Haû mù, tsibiyiq wing asik lé, shokuq htûng sik má kat jáng sheq, haû í jûng é a hten râ nghut lhê." gâ ri.

*Shî Bê Myiwe Zo Eq No É Myiwe Myhí*

*Mrk 5:21-43; Luk 8:40-56*

<sup>18</sup> Yesuq haû su ga taî nyi é hkûn, suwún rayuq jé lé lô mù, Yhâng é hí má hkyihput htûq luî, "Ngá zo byizo gi, ahkuî za shi byuq bê. Nghut kôlhang, Nàng lé mù, yhâng é ahtoq má loq lé ke byi laq, haû jáng, yhang, asak dum dui lò râ nghut lhê." ga taî ri. <sup>19</sup> Yesuq gi, toq mù, Yhâng é chángzô pé eq rahá, haú yuq htâng châng e ló akô.

<sup>20</sup> Haú hkûn, raxe í zân yhang, suí yui nyi é myiwe myhí rayuq gi, Yhâng é nunghtáng má huî lé mù, Yhâng é bushi htâng má ê záng kat ri.

<sup>21</sup> Myiwe myhí haû gi, yhang gûng yhang, "Ngò, Yhâng é buhtâng má ê wó záng jáng gi, ge byuq râ nghut lhê." ga, wó myit é yanmai nghut ri.

<sup>22</sup> Yesuq gi, lhing wú kat luí, yhang lé myàng jáng, "Ngá zo ê, nhik hkâ-ngê, náng é lumjínng myit gi, nang lé lhoq gê byi bê nghut ri." ga taí ri. Haú hkún jáng yhang, myiwe myhí haú gi, ge byuq bê nghut ri.

<sup>23</sup> Yesuq gi, suwún hpô é yhûm má jé wang ló é hkún, sampyí mut bang eq garu garín dut nyi é bang lé, ê myâng mù, <sup>24</sup> yhangmoq lé, "Hui keq. Myiwe zo gi, shí byuq é a nghut, yhup myhí tô é sheq ru nghut lhê." ga taí jáng, yhangmoq gi, Yhang lé wuìzùi kut pyám byí akô. <sup>25</sup> Yesuq gi, byù hpûng lé, shinggan shut htoq ló nhâng mù, Yhang wang ê luí, myiwe zo haú lé loq eq zuí kat jáng, myiwe zo haú gi, dum dui toq lo ri. <sup>26</sup> Haú hkyo é danglù gi, ramau gón yhang jam ló byuq bê nghut ri.

*Myoqjit Í Yuq Eq Nhut Jit Sû Rayuq Lé, Lhoq Gê Byí É Hkyô*

<sup>27</sup> Yesuq gi, haú jowò mai xoq e ló nyi le, Yhâng é htâng má, myoqjit í yuq gi, châng dín uchyang, "Dawiq é Yhangzo ê, ngá-nhik lé shogyô yù laq ô!" ga wut taí akô.

<sup>28</sup> Yesuq gi, yhúmkaû má jé wang ló é hkún, myoqjit su nhik châng wang lò kômù, haú nhik lé, "Ngò wó kut byí é lé, nungnhik lumjínng akô luq?" ga myí ri.

Haú hkún, yhangnhik gi, "Lumjínng lhê ô, Yhumsîng ê." ga tû taí akô.

<sup>29</sup> Hau htâng, Yhang gi, haú nhik é myoqjí má é záng htung luí, "Nungnhik lumjínng é eq rajung za dut sháng gaq." ga taí ri. <sup>30</sup> Haú mù, yhangnhik gi, myoq wó myâng bekô nghut ri. Yesuq gi, "Shí hkyô,

ó lé le hkâsé nhâng kó." ga, yhangnhik lé htân htân sidiq byî ri. <sup>31</sup> Nghut kôlhang, yhangnhik gi, haú hkyô lé, haú mau ramau gón yhang taí pyo ló bekô nghut ri.

<sup>32</sup> Haú nhik htoq ló nyî kô é hkûn, nat gang wang júng luî, dang a wó nyô sù rayuq lé, Yesuq chyáng shuí lé lo akô. <sup>33</sup> Nat gang lé hkat htoq pyâm é hkûn, nhutjit sù haú gi, dang wó nyô bê nghut ri. Byù hpûng mó gi, haú lé wú maú byuq kômù, "Shî su dut é hkyô lé, Israelaq amyû má radàm lhang a myang wú." ga taí bum akô.

<sup>34</sup> Nghut kôlhang, Hparishe pé kúm gi, "Nat gâng pé é zaû é wum-o a-tsam eq za, nat gâng pé lé hkat htoq pyâm é nghut ri." ga taí bum akô nghut ri.

### *Mû Zui Byù Shaû Ri*

<sup>35</sup> Yesuq gi, myuq pé eq wà pé banshoq má wàng luî, haú pé mâ é tarajong pé má mhoqshit é eq, mauhkûng mingdán hkyô eq sêng é gabú danglù lé hko kyo uchyang, nòhpyo ajung jung eq noli nojàng hui bang yuq hkanmó lé, lhoq gê byî wún ri. <sup>36</sup> Yesuq gi, byù moq mó lé myàng jáng, wú shogyô nyi ri. Hkâsu mù gâ le, yhangmoq gi, sau zúng sù a nyi é sau pé su, awui ahke dut é eq byo myín bûm kô é yanmai nghut ri. <sup>37</sup> Haú mù, Yhang gi, Yhâng é chángzô pé lé, "Kyôshû yù râ myo shoq joq kôlhang, mù zui râ byù gi, shaû nyi ri. <sup>38</sup> Haú mù, haú kyô Yhumsing lé, Yhâng é kyô yô má, kyô shu byù myo myo nhâng byi râ matú, dung keq." ga taí ri.

# 10

## *Raxe Í Yuq Lé Nhang Htoq Kat É Hkyô*

*Mrk 3:13-19; 6:7-13; 9:41; 13:9-13; Luk 6:12-16; 9:1-6; 12:2-9, 51-53; 14:26-27; 21:12-17*

<sup>1</sup> Yesuq gi, Yhâng é chángzo raxe í yuq lé wut yù mù, agè ashop é nat pé lé wó hkat htoq râ eq, noli nojàng eq nõhpyo ajung jung lé wó lhoq gê râ ahko ahkáng yhangmoq lé byî ri.

<sup>2</sup> Haû lagyo raxe í yuq é myìng gi, (Petruq ga sù) Simun eq yhanggu Andre; Zebedi é yhangzô nhik-tang Yakuq eq yhanggu Yohan; <sup>3</sup> Hpilip eq Barhtol-ume; Htomaq eq kang guq sù Mahte; Alhpe é yhangzo Yakuq, Htade, <sup>4</sup> Zelutuq\* dut é Simun eq, Yesuq lé ap pyám râ sù, Yudaq Iskarut pé nghut akô.

<sup>5</sup> Yesuq gi, haû bang raxe í yuq lé dangsâng mù, nhang htoq kat ri. Yhang sang kat é dang gi, "Tûngbaù pé chyáng le hkâ-ê kó; Samariq wà rawà má le hkâwâng kó. <sup>6</sup> Haû byuq byuq é sau pé su nghut nyi é Israelaq byu pé chyáng sheq ê keq. <sup>7</sup> Nungmoq gi, é mù, 'Mauhkûng mingdán gi, chyáng lò bê nghut ri.' nghu é danglù lé hko kyo keq. <sup>8</sup> Nò bang lé lhoq gê byi, shî bê bang lé lhoq duì toq, manggâm dap bang lé lhoq san lhoq yúng byi, nat gâng pé lé hkat htoq pyám, kut keq. Láí láí wó é lé, láí láí byi keq. <sup>9</sup> Nungmoq é hpyihit má, hîng, ngùn eq gyi pé hkâkat chûng kó; <sup>10</sup> hkyowui é matú, etap, mebu htaí, hkyî-tsung eq dumbáng

---

\* **10:4** Zelutuq gâ é lichyúm gi, yhumsing zui saí é hkyô má gyai yhang myit lòm shirong é sù lé ga lhê. Haú u lé, Israelaq byu pé gi, mingdán luthkyô wó râ matú shikut nyi é hpúng bang lé, Zelutuq gâ lhê.

pé hkâyü chûng kó; hkâsu mù gâ le, mô zui sô gi, zoshuq wó gíng lhê.

<sup>11</sup> Hká wâ hká dum má jé wang ló le le, haú má é gíngdán é byù lé hô mù, haú mai htoq ló é hkûn jé shoq, haú yuq é yhûm má za nyi nyi keq. <sup>12</sup> Haú yhûm má wang é hkûn, shichyên yù keq. <sup>13</sup> Haú yhûm gi, gíngdán é nghut jáng, nungmoq shimân byi é hkyô, yhangmoq chyáng joq nyi sháng gaq; a gíngdán é nghut jáng, nungmoq chyáng dum taú lò sháng gaq. <sup>14</sup> Nungmoq lé a lhom hap yu é eq nungmoq é dang lé a lhom gyo byi kô é nghut jáng, haú yhûm haú wâ mai htoq ló é hkûn, nungmoq é hkyiwa má dap é hpuilhaú lé ko hkyô pyâm to keq. <sup>15</sup> Ngò, nungmoq lé teng za taí kôlé, tarâ jéyáng é buinyi má, haú wâ gi, Sodom eq Gomoraq myuq htoq má je hpuzo râ nghut lhê. <sup>16</sup> Wamhkuí hpúng má nhang hâng kat é sau pé lé su, Ngò, nungmoq lé nhang kat é nghut lhê. Haú mù, lhangmui su hpaqchyî bò luí, hpûngkyui su nú-nhâm nyi keq.

<sup>17</sup> Byu pé lé sidiq keq; hkâsu mù gâ le, yhangmoq gi, nungmoq lé, tarâ rûng pé má ê ap pyám kó râ nghut é htoq agó, yhangmoq é tarajong pé má, nungmoq lé nhuq bat kó râ nghut lhê. <sup>18</sup> Nungmoq gi, Ngá é yanmai, mauzau wui eq hkohkam pé é hí má shuí jé é hui luí, yhangmoq é hí má le, tungbaù pé é hí má le, saksé myang hkám kó râ nghut lhê. <sup>19</sup> Nghut kôhang, nungmoq lé ap pyám kô é hkûn, nungmoq hkâsu taí râ eq haí taí râ lé, hkâ-myit chíq kó. Haú hkûn taí râ dang, nungmoq wó kó râ nghut lhê. <sup>20</sup> Hkásu mù gâ le, haú gi, nungmoq é dang a nghut, nungmoq é Yhângwâ é Woi-nyí sheq, nungmoq dông taí râ ru nghut lhê.

21 Nhiktâng gi, nhiktâng yhangchang, îwa gi, yhangzo lé, shî shoq ap pyâm lhum kó râ nghut lhê; zo wuî gi, mó wuî lé gumlau toq mù, sat pyâm nhâng kó râ nghut lhê. 22 Byù lhunglhâng bang gi, Ngá é yanmai, nungmoq lé a nguì kut kó râ nghut lhê; nghut kôlhâng, jihtùm jé shoq wó hkam jân nyi é sù gi, hkyi yu é hui râ nghut lhê. 23 Rawò má zing-ri é hui jáng, rawò shut hphang ê keq. Ngò, nungmoq lé teng za taí kôlé, Israelaq byu pê é myuq pé má, nungmoq a ban wang ngap shimá, haù Byu Yhangzo jé râ nghut lhê.

24 Jongzo gi, sará htoq, dui-nhâng zoshâng gi, yhumsing htoq, gyaú râ a nghut. 25 Jongzo gi, yhâng é sará su, dui-nhâng zoshâng gi, yhâng é yhumsing su, wó dut jáng gé bê. Yhumsing hpó lé lháng Bezebulaq† ga kô le gi, Yhâng é yhumbyù wuî lé gi, je riyhang nghû kó râ a nghut lhú?

26 Haù mù, yhangmoq lé hkâgyuq kó. A byông htoq loshoq wó zaú nghop tô é haì le a joq râ nghut lhê; a sé loshoq wó haq tô é le, haì a joq râ nghut lhê. 27 Ngò, nungmoq lé mauchut hkaú má taí é hkyô lé, myoq myàng maubó má taí kyo keq; Ngò, nungmoq lé dangsoq soq kyo é hkyô lé, yhumhkông htoq mai taí pyô keq. 28 Gungdu lé za wó sat pyâm mù, woi-nyí lé a wó sat bang lé, hkâgyuq kó. Woi-nyí lé le, gungdu lé le, ngaraì ming má wó lhoq htên é Sù lé sheq, gyuq nyi keq. 29 Johkyáng í du lé, gyi htingchap rachap èq wó ûng pyâm lhê a nghut kó lhú? Nghut kôlhâng, haù radu lháng, nungmoq é Îwâ é myit èq a nghut jáng,

---

† 10:25 Bezebulaq gâ é gi, Tsadán é myíng rajà nghut lhê.

myigùng má wó byit gyó râ a nghut. <sup>30</sup> Nungmoq é ulhum mâ é xâm banshoq lé lhang, nghap to gù nghut lھے. <sup>31</sup> Haû mù, hkâgyuq kó; nungmoq gi, haû johkyáng myo myô htoq má lhang gù je bo é bang nghut lھے.

<sup>32</sup> Byu pê hí má, Ngo lé lhom yín yu é sũ ó yuq lé nghut kôle, mauhkùng htoq mâ é Ngá Wâ é hí má, Ngò lhom yín yû râ nghut lھے. <sup>33</sup> Byu pê é hí má, Ngo le he-ngik pyâm é sũ ó yuq lé nghut kôle, mauhkùng htoq mâ é Ngá Wâ é hí má, Ngò he-ngik pyám râ nghut lھے.

<sup>34</sup> Ngo lé, haû myidàm htoq má simsaq hkyô byi râ matú lé lo é sũ su hkâ-ngâm kó. Ngò gi, simsaq hkyô byi râ matú lé lo é a nghut, shâm byi râ matú sheq lé lo é ru nghut lھے.† <sup>35</sup> Hkâsu mù gâ le, 'Yuqzo gi, yhangwa eq, byizo gi, yhangnu eq, dumó gi, yhangmhoí eq, byoq lhum kó râ nghut lھے.

<sup>36</sup> Yhumsing é yhumbyù wuì gi, yhumsing é gyè taù dut râ nghut lھے.†☆  
gâ tô é matú sheq, Ngò jé lé é ru nghut lھے.

<sup>37</sup> Ngo lé chyt é htoq yhumsing é înu îwa lé je chyt é sũ ó yuq nghut kôle, Ngá é chángzo kut râ gingdán sũ a nghut; Ngo lé chyt é htoq yhumsing é zo wuì lé je chyt é sũ ó yuq nghut kôle, Ngá é chángzo kut râ gingdán sũ a nghut; <sup>38</sup> Yhumsing é tapzîng lé a waq é za, Ngá htâng châng é sũ ó yuq nghut kôle, Ngá é chángzo kut râ gingdán sũ a nghut. <sup>39</sup> Yhumsing é asak lé ha bûn é sũ ó yuq nghut kôle, asak sum râ nghut lھے; Ngá é yanmai,

---

† **10:34** Yesuq gi, simsaq hkyô byi sũ nghut lھے. Nghut kôlhang, Yhang é yanmai, byu pé mabyoq htoq râ nghut é hkyô lé sé mù, haû su ga taí é nghut lھے. ☆ **10:36** Mihka 7:6

yhumsing é asak sôm pyâm é sù ó yuq nghut kôle, asak wó râ nghut lhê.

<sup>40</sup> Nungmoq lé hap yù sù gi, Ngo lé hap yu é sù nghut bê; Ngo lé hap yù sù gi, haù Ngo lé nhang kat Sù lé hap yu é sù nghut bê. <sup>41</sup> Myiqhtoi rayuq lé, myiqhtoi dông lhom hap yu é sù ó yuq nghut kôle, myiqhtoi rayuq é chyunghuq lé wó yù râ nghut lhê; dingmán sù rayuq lé, dingmán sù dông lhom hap yu é sù ó yuq nghut kôle, dingmán sù rayuq é chyunghuq lé wó yù râ nghut lhê. <sup>42</sup> Shî, tiq bang mâ é rayuq yuq lé, Ngá é chángzo nghut é yanmai, uchyam ragóm byi huq é sù gi, Ngò, nungmoq lé teng za taí kôlé, yhâng é chyunghuq lé hkyak myang hkam yù râ za nghut lhê." gâ ri.

## 11

### *Yesuq Eq Wui-myhup Sará Yohan*

#### *Luk 7:18-35*

<sup>1</sup> Yesuq gi, Yhâng é chángzo raxe í yuq lé dang ban pying é htâng má, Galile mau mâ é wà pé má mhoqshit râ matú eq hko kyo râ matú, haù jowò mai htoq e ló bê nghut ri.

<sup>2</sup> Wui-myhup Sará Yohan gi, Hkrisduq kut nyi é hkyô lé, htóng hkaù má wó gyo jáng, <sup>3</sup> "Nàng gi, haù jé lé lô râ Sù nghut lhê lú? Haù a nghut jáng, ngamoq gi, góyuq lé lág ra shirâ lú?" ga, yhâng é chángzô pé lé myí nhang kat ri.

<sup>4</sup> Yesuq tâ é gi, "Nungmoq wó gyo wó myang é hkyô, Yohan lé ló taí kyo keq; <sup>5</sup> myoqjit bang, myoq wó myâng bekô; hkyî hten bang le, wó so bekô; manggâm dap bang le, lhoq gê byi é hui bekô; nojit bang le, wó gyo bekô; shî bê bang le, lhoq dui toq



é hui bekô; myùng bâng é matú, gabú danglù hko kyô nyi bê nghut lhê. <sup>6</sup> Ngá é yanmai, Ngo lé lum shut é hkyô a bò sù gi, hkungsô wó nyi ri." ga taí ri.

<sup>7</sup> Yohan é chángzô pé taú ló kô é u lé, Yohan eq séng luí, byù moq mó lé Yesuq taí é gi; "Nungmoq gi, haí lé hpuq wú râ matú, haú yoso shut e akô lhú? Lài èq hik nhún é jamgàm lé wú râ matú nghut akô lhú? <sup>8</sup> Haú a nghut jáng, haí lé wú râ matú e akô lhú? Nú-nhâm é mebu wut sù lé wú râ matú e akô lhú? A nghut. Nú-nhâm é mebu wut bang gi, hkohkâm-wâng pé má sheq rú nyi lhê. <sup>9</sup> Haú nghut lé gi, haí lé wú râ matú ê kô é lhú? Myiqhtoi rayuq lé lhú? Haú kúm nghut ri; Ngò, nungmoq lé taí kôlé, Yohan gi, myiqhtoi htoq lháng gyaú sù nghut lhê. <sup>10</sup> Haú yuq é hkyô lé, Chyúmdang má kâ tô é gi, 'Wú aq, Náng é hkyô lajang láng râ matú, Ngá é lagyo lé, Náng é hí má Ngò nhang kat râ nghut lhê.'<sup>✧</sup>

gâ ri. <sup>11</sup> Ngò, nungmoq lé teng za taí kôlé, myiwe wuì mai hku kat é bang má, Wui-myhup Sará Yohan htoq je kô é rayuq lháng a htoq wú shi; nghut kôlháng, Garai Gasâng é mauhkûng mingdán má je tiq dik sù gi, Yohan htoq je kô lhê. <sup>12</sup> Wui-myhup Sará Yohan é buinyì mai ahkuí jé shoq, mauhkûng mingdán gi, lú chyîn wang nyi é hui mù, sarhé pé gi, haú lé wó yú bekô nghut ri. <sup>13</sup> Hkâsu mù gâ le, Yohan é ahkyíng jé shoq, haú myiqhtoi pé banshoq eq tarâ gi, haú hkyô eq séng luí, myiqhtoi htoí to gù nghut lhê. <sup>14</sup> Nungmoq hap yù nau é nghut jáng, Yohan gi, haú jé lé lô râ ga sù Eliyaq nghut lhê.<sup>✧</sup> <sup>15</sup> Gyô yù râ nohkyap dap sù gi, gyô yù

sháng gaq.

<sup>16</sup> Shí ipyat lhê é byu pé lé, Ngò, hai eq taí kê wú râ lhú? <sup>17</sup> Yhangmoq gi,

'Nungmoq é matú, ngamoq sampyí mut byi kôlhang, nungmoq gi, a gó kó;

ngamoq, ngaù hkyangsâng kôlhang, nungmoq gi, a ngaù kó.'

ga luî, gai pé má zùng mù, góbang lé wut taí lhûm nyi é zoshâng wuì eq wuí akô. <sup>18</sup> Hkâsu mù gà

le, Yohan gi, jé lé mù, a zo a shuq kut jáng le, yhangmoq gi, yhang lé, 'Yhang gi, nat gang dap sù nghut ri.' ga taí akô. <sup>19</sup> Haù Byu Yhangzo jé

lé luî, zo mù shuq mù kut jáng le, 'Shí yuq gi, zo myoq shuq myoq noq sù eq, kang guq bang eq

yubak dap bâng é buinùm hpó nghut ri.' ga dum taí akô. Nghut kôlhang, hpaqchyí byéng-yá gi, yhâng é

muzó eq saksé tûn shit nyi ri." gà ri.

### *Myit A Lhîng É Wà Mó Pê Hkyô*

#### *Luk 10:13-15*

<sup>20</sup> Hau htâng, Yesuq gi, laklaí kumlhá pé je myo kut shit bê nghut kôlhang, myit a lhîng é myuq pé

lé tân é gi, <sup>21</sup> "Kurazin wà mó ê! Nàng dingnyé wó ri! Bet-saida wà mó ê! Nàng dingnyé wó ri!

Nungmoq chyáng lé kut shit é laklaí kumlhá pé lé, Turuq myuq eq Sidun myuq má kut shit é ru

nghut le gi, yhangmoq, noq noq mai myit lhîng mù, jimê tû wut lhê, myiwap kyaq gyûn lhê kut bekô râ

nghut lhê. <sup>22</sup> Ngò, nungmoq lé taí kôlé, tarâ jéyáng é buinyi má, nungmoq gi, Turuq myuq eq Sidun

myuq htoq má je hpuzo kó râ nghut lhê. <sup>23</sup> Dum mù, Kaperna-um wà nàng ê, nàng gi, mauhkûng jé

shoq waq toq é hui râ lhú? A nghut, mosumhkung

má sheq gyó râ nghut lhê. Náng chyáng kut shit é laklaí kumlhá lé, haû Sodom wà má kut shit é ru nghut le gi, myuq haû hkû-nyí jé shoq joq nyí râ nghut lhê. <sup>24</sup> Ngò, nungmoq lé taí kôlé, tarâ jéyáng é buinyi má, Sodom wà hpuzô é gi, náng htoq shau râ nghut lhê." gâ ri.

*Ngú Nyí Bâng É Matú Bánno Jang*

*Luk 10:21-22*

<sup>25</sup> Haú u lé, Yesuq taí é gi, "Mauhkûng eq myi-gung é Yhumsîng, Áwa ê, Nàng gi, haú pé lé, hpaqchyî byéng-yá bò bang eq myit hpaqchyî sé bâng é hí má nghop to luí, zoshâng wuì lé tân shit bê nghut é yanmai, Ngò, Nang lé hkya-on lhê ô.

<sup>26</sup> Nghut bê, Áwa ê, haû gi, Nàng ô nau é hkyô nghut ri.

<sup>27</sup> Ngá Wa gi, lhunglhang lé Ngá é loq má ap byí to bê. Haû Zo lé, Áwa mai lai luí ó le a sé; Áwa lé le, haû Zo eq haû Zo mai sé nhâng râ matú hkyin yu é bang mai lai luí ó a sé.

<sup>28</sup> Ngú é eq wòlai wun é lhunglhang bang ê, Ngá chyáng lé keq; Ngò, nungmoq lé bánno nhâng râ nghut lhê. <sup>29</sup> Ngò gi, myit nú-nhâm é eq myit lhoq nyhum é sù nghut é yanmai, Ngá é kandang lé waq keq; Ngá chyáng mai mhoq yû keq; haû hkûn, nungmoq é asak woi-nyí bánno kó râ nghut lhê.

<sup>30</sup> Haí mù gâ le, Ngá é kandang gi, waq lui é htoq agó, Ngá é wò le sôm lhê." gâ ri.

## 12

*Bánno Buinyi É Yhumsîng*

*Mrk 2:23-28; 3:1-6; Luk 6:1-5, 6-11*

<sup>1</sup> Haú yoq lhê é Bánno buinyì ra-nyí má, Yesuq gi, Yhâng é chángzô pé eq rahá yò hkaû mai sô lai ló nyi ri. Yhâng é chángzô pé gi, zòmut é yanmai, kyôshi ratsuí langshap yû mù, zô akô nghut ri.

<sup>2</sup> Hparishe pé gi, haú lé myàng kôjáng, "Wú aq! Náng é chángzô pé gi, Bánno buinyì má a ge kut jung lé kut nyi akô." ga taí kat akô.

<sup>3</sup> Haú hkûn, Yesuq tû taí é gi, "Dawiq lháng gi, yhâng htâng châng é bang eq rahá zòmut huí é hkûn hkâsu kut é hkyô lé, nungmoq a nghap wú kó lú?"

<sup>4</sup> Dawiq gi, Garai Gasâng é yhúmhaû má wang ê mù, hkyangjông pé mai lai lui, ó le a ge zô é, kyâng tô é muk lé, yhang eq yhâng htâng châng é bang yù zo kô é a nghut kó lú?

<sup>5</sup> Hau htoq agó, Bánno buinyì má, hkyangjông pé gi, noqkuq yhúmhaû má Bánno buinyi é tarâ lé shut kôhang mara a wó é lé, haú tarâ laiká má nungmoq a nghap wú kó lú? <sup>6</sup> Ngò, nungmoq lé taí kôlé, haú noqkuq yhúm htoq je ko sù gi, shí má nghut nyi lhê. <sup>7</sup> Ngò ô nau é gi, hkungga nhông hkyô a nghut, shogyo nhikmyin hkyô sheq ru nghut lhê'☆ gâ é lichyúm lé nungmoq sé kô é ru nghut le gi, mara a bò bang lé mara hùn kó râ a nghut. <sup>8</sup> Hkâsu mù gâ le, haú Byu Yhangzo gi, haú Bánno buinyi é Yhumsîng nghut lhê." gâ ri.

<sup>9</sup> Hau htâng, Yhang gi, haú jowò mai e ló mù, yhangmoq é tarajong má wang e ló ri. <sup>10</sup> Loq rahkyam ajum shi byuq é byù rayuq le, haú má nyi tô ri. Yhangmoq gi, Yesuq lé, "Bánno buinyì má, nòhpyo lhoq gê byi le, tarâ wang lhê lú?" ga myi é dông, Yhang lé mara hùn râ hkyô ho akô nghut ri.

<sup>11</sup> Haú hkûn, Yesuq gi, "Nungmoq chyáng mâ é

ó yuq wá, yhumsing é sau radu, Bánno buinyì má dong gyó tô le, a xe htoq yu é nyì kó râ lhú? <sup>12</sup> Byù gi, saù htoq má hpaudap dik é nghut lhê! Haù mù, Bánno buinyì má ge é hkyô kut le, tarâ wang lhê." ga yhangmoq lé tû taì ri.

<sup>13</sup> Hau htâng, Yhang gi, haù loq jum shî sù lé, "Náng é loq nyhang kat aq." ga taì kat jáng, haù yuq gi, loq nyhang kat jáng, loq haù gi, a no é loq su ge byuq bê nghut ri. <sup>14</sup> Hparishe pé kúm gi, htoq ló kômù, Yesuq lé hkâsu kut wó sat pyám râ hkyô lé, chôm hpyê lhùm bum akô nghut ri.

### *Garai Hkyin Tô É Dui-nhâng Zoshâng*

<sup>15</sup> Yesuq gi, haù hkyô lé sé jáng, haù jowò mai htoq ló bê nghut ri. Byù myo myo le, Yhâng htâng châng bùm kômù, Yhang gi, nòhpyo hui bang banshoq lé lhoq gê byi luì, <sup>16</sup> Yhang ó yuq nghut é hkyô lé, a taì byông htoq râ matú, yhangmoq lé taì hkùm tô ri. <sup>17</sup> Haù gi, myiqhtoi Esai-aq é nhut dông mai taì tô é dang lé lhoq dik râ matú nghut ri. Dang haù pé gi,

<sup>18</sup> "Shí yuq gi, Ngò chyt, Ngò myit nguì luì, hkyin tô é Ngá é dui-nhâng zoshâng nghut lhê;  
Ngò gi, Ngá é Woi-nyí, Yhang lé kat byi râ nghut mù,

Yhang gi, tarâ dingmán é hkyô lé byù myû ban-shoq pé má taì kyo râ nghut lhê.

<sup>19</sup> Yhang gi, haì a hpuq tû é htoq agó, a garu râ nghut lhê; Yhâng é htê lé, hkyô mó pé má wó gyo râ a nghut.

<sup>20</sup> Yhang gi, tarâ dingmán é hkyô lhoq ung é hkùn jé shoq,

nâng chap pyám bê jàm gàm lé le, lhoq hkyui râ a nghut, myihkau za htoq nyî bê myi lé le, lhoq sat pyám râ a nghut.

<sup>21</sup> Byù myù chângjup gi, Yhâng é myìng má myit myoqbyù kó râ nghut lhê."<sup>☆</sup>

gâ ri.

*Yesuq Eq Bezebulaq*

*Mrk 3:20-30; Luk 11:14-23; 12:10; 6:43-45*

<sup>22</sup> Hau htâng, agè ashop é nat gang wang júng luî, myoqjit nhutjit é byù rayuq lé, Yesuq chyáng shuí lé lô kôjáng, Yesuq gi, haú yuq lé lhom lhoq gê byî ri; haú mù, haú yuq gi, dang le wó nyô, myoq le wó myâng dut bê nghut ri. <sup>23</sup> Byù hpûng mó gi, haú lé wú maú byuq kômù, "Shí yuq, Dawiq é Yhangzo za gi, nghut lhê laq?" ga taî bum akô.

<sup>24</sup> Nghut kôlhang, Hparishe pé gi, haú lé wó gyo kôjáng, "Shí yuq gi, nat gâng pê é zau Bezebulaq\* é wum-o a-tsam êq za nat gâng pé lé wó hkat htoq é nghut ri." ga taî bum akô nghut ri.

<sup>25</sup> Yhangmoq myit nyi é hkyô lé Yesuq sé mù, yhangmoq lé taî é gi, "Hká mingdán nghut kôle, ahkaú má byoq gâng lhûm nyi kô é nghut jáng, htên byoq byuq râ za nghut lhê; haú eq rajung za, myuq ralhum nghut nghut, yhumhtu ralhum nghut nghut, yhangchang byoq lhûm nyi kô é nghut jáng, haú gi, wó gíng nyi râ a nghut. <sup>26</sup> Tsadán gi, Tsadán lé hkat htoq pyâm é nghut jáng, yhumsing gùng yhumsing lhoq hpyoq nyi gù bê nghut ri. Haú su nghut jáng, yhâng é mingdán gi, hkâsu kut wó gíng

<sup>☆</sup> **12:21** Esai 42:1-4      \* **12:24** Bezebulaq gâ é gi, Tsadán é myìng rajà nghut lhê.

to râ lúhú? <sup>27</sup> Haû mù luî, Ngò gi, Bezebulaq é wum-o a-tsam èq za nat gânq pé lé hkat htoq é nghut jáng, nungmoq é byu pé gi, ó yuq é wum-o a-tsam èq hkat htoq pyám kô é nghut lhê lúhú? Haû su nghut jáng, haú bang gi, nungmoq lé tarâ jéyáng bang dut kó râ nghut lhê. <sup>28</sup> Nghut kôlhang, Ngò gi, Garai Gasâng é Woi-nyí èq nat gânq pé lé hkat htoq pyám é nghut jáng, Garai Gasâng é mingdán gi, nungmoq chyáng jé bê nghut ri.

<sup>29</sup> Ó yuq nghut kôle, wum-o bò sù lé hí tuí zing pyám é a nghut le gi, yhâng é yhûm má lú wâng mù, yhâng é sutzè lé hkâsu wó lú yû râ lúhú? Haú yuq lé hí tuí zing pyám jáng sheq, yhâng é sutzè lé wó lú yû râ nghut lhê.

<sup>30</sup> Ngá hkyam shut a dap sù gi, Ngo lé gyè kut sù nghut lhê; Ngò eq rahá a shûm tsing sù gi, lhoq pyo pyám é sù nghut nyi ri. <sup>31</sup> Haû mù, Ngò, nungmoq lé taí kôlé, byu pé é yubak mara hkangmó eq Garai Gasang lé rhoi dang taí pyám é lhunglhang gi, mara hkyut byí é wó hui râ nghut lhê. Nghut kôlhang, haú Chyoiyúng Woi-nyí lé rhoi dang taí pyám é gi, mara hkyut byí é hui râ a nghut. <sup>32</sup> Haû Byu Yhangzo lé dang dông shut é sù gi, mara hkyut byí é wó hui râ nghut lhê; nghut kôlhang, haú Chyoiyúng Woi-nyí lé dang taí shut é sù gi, shí ipyat má le, htang pyat má le, mara hkyut byí é hui râ a nghut.

<sup>33</sup> Ashi lé wú luî, agàm lé sé râ nghut é yanmai, agàm lé lhoq gè jáng, ashí le gè râ nghut lhê; agàm lé a lhoq gè jáng, ashí le gè râ a nghut; <sup>34</sup> Duq htân lhangmuì amyû ê, nungmoq gi, agè ashop é bang nghut to kôluí nhîng, dang gè hkâsu wó taí kó râ

lhú? Hkâsu mù gâ le, i-myit unghkaû má byíng mui tô é lé za, nhut mai taí htoq lo é nghut lhê. <sup>35</sup> Ge é sù gi, yhumsing é i-myit unghkaû má é sutdò mai ge é zè pé lé lhoq htoq shit lhê. Agè ashop é sù gi, yhumsing é i-myit unghkaû má é agè ashop é sutdò mai, agè ashop é zè pé lé lhoq htoq shit lhê. <sup>36</sup> Ngò, nungmoq lé taí kôlé, byù gi, yhumsing taí kat é akyù a bo é dang pé é matú, tarâ jéyáng é buinyì má taí sân kyo ra kó râ nghut lhê. <sup>37</sup> Hkâsu mù gâ le, yhumsing mara lut râ le, ó le ó taí é dang pé mai; mara byí é hui râ le, ó le ó taí é dang pé mai, nghut râ nghut lhê." gâ ri.

*Limik Kumhá Lé Dung Kô É Hkyô*

*Mrk 8:11-12; Luk 11:29-32; 11:24-26*

<sup>38</sup> Hau htâng má, Hparishe pé eq tarâ sará pé ram gi, "Sarâ é, ngamoq gi, Nàng, limik kumhá kut shit râ lé myàng nau ri." ga Yhang lé dúng akô.

<sup>39</sup> Haù mù, Yhang tû taí é gi, "Agè ashop é eq lhum a zuí é ipyat shí gi, limik kumhá dung nyí ri myhi-nhung! Myiqhtoi Yonaq é kumhá mai lai luí, gotû haí le tûn shit râ a nghut. <sup>40</sup> Hkâsu mù gâ le, Yonaq gi, ngo mó é wamdau hkaû má sum nyí sum myín lúng é su, haù Byu Yhangzo le, myigùng káng má sum nyí sum myín lúng râ nghut lhê. <sup>41</sup> Ninewe wà byù wuì gi, Yonaq mungdang hko kyô é hkûn myit lhîng kô é nghut mù, tarâ jéyáng é buinyì má, ipyat shí má é bang eq rahá toq lò luí, ipyat shí má é bang lé mara hûn kó râ nghut lhê; haù Yonaq htoq ko sù gi, ahkuí shí má jé nyí to bê. <sup>42</sup> Maupyí má é hkohkâm myhí gi, maumyí ló htâng é mai lé lô mù, Sholumon é hpaqchyí dang lé, lé gyô yù bê nghut mù, haù tarâ jéyáng é buinyì má,



ipyat shí mâ é bang eq rahá toq lô luí, ipyat shí mâ é bang lé mara hûn râ nghut lhê; haú Sholumon htoq ko sù gi, ahkuí shí má jé nyi to bê.

<sup>43</sup> Haú agè ashop é nat gi, byù rayuq chyáng mai htoq ló mù, kyuq huí é jowò pé má sô yông e ló luí, no râ jowò hkat ho wú le, a myang hô nghut ri. <sup>44</sup> Haú hkûn, yhang gi, 'Ngò nyi laí lo é yhûm má dum taú ló wú râ.' ga taí ri. Yhang dum taú jé ló wú le, yhûm haú lé, ó le a sing yu hpyuq é htoq agó, san za rago dut to lánq é lé ló myang ri. <sup>45</sup> Haú jáng, yhang gi, dum taú ê mù, yhâng htoq je wuí é nat nyhit nat lé shuí lò luí, haú má lo wang nyi to bekô. Haú mù, haú yuq é nyi yap sâmlai gi, hí lhê htoq má je wuí lò bê nghut ri; agè ashop é ipyat shí le, haú eq rajung za dut râ nghut lhê." gâ ri.

*Yesuq É Yhângnu Eq Yhanggû Pé  
Mrk 3:31-35; Luk 8:19-21*

<sup>46</sup> Yesuq, shiwa byu pé lé dang rû nyo nyi ashí hkûn, yhângnu eq yhanggu pé gi, Yhang lé nyò naù kômù, shinggan má lé yap tô akô nghut ri. <sup>47</sup> Haú mù, Yesuq lé, "Náng nu eq nunggu pé gi, Nang lé nyò naù mù, shinggan má lánq yap bum akô." ga taí kyô akô.

<sup>48</sup> Haú hkûn, Yhang gi, "Ô pé gi, Ngá nu eq Ngá gu pé nghut akô lú?" ga tû taí kat ri. <sup>49</sup> Hau htâng, Yhang gi, Yhâng é chángzô pé lé loq tun luí, "Wú keq, shí bang gi, Ngá nu eq Ngá é gumang wui nghut bê. <sup>50</sup> Hkâsu mù gâ le, mauhkûng htoq mâ é Ngá Wa ô nau é hkyô châng é sù ó yuq nghut kôle, Ngá gu Ngá mang, Ngá gu Ngá nhá, Ngá nu chyat nghut bê." ga xoq taí ri.

# 13

## *Kyôshi Sân É Dangtú*

*Mrk 4:1-20; Luk 8:4-15*

<sup>1</sup> Haú nyí má yhang, Yesuq gi, yhúmkaû mai htoq lô mù, wuì nhông yàm má ê zung tô ri. <sup>2</sup> Byù hpûng mó gi, Yhâng é lhîngkhyuq má zup zîng lé bûm kê é yanmai, Yhang gi, lhaî hkaû má doq zûng tô ri. Shiwa byu pé kúm gi, gin-gau htoq má yap tô bum akô. <sup>3</sup> Hau htâng, Yhang gi, haú bang lé, dangtú pé dông myo myo taî é má, "Kyô hkyó sù rayuq gi, kyôshi san râ ga htoq e lô ri. <sup>4</sup> Yhang, kyôshi sân kat é hkûn, ra-am gi, hkyô má gyó ang mù, nghoq pê èq lé hte zô pyám ri. <sup>5</sup> Ra-am gi, myi-tse a htu é luqgok yò pé má gyó ang mù, myi-tse a htu é yanmai, luì za yuq htoq lô kêle, <sup>6</sup> amyit a wó chîn hing é nghut mù, buì htoq lô jáng, lhap kyuq pyám bê nghut ri. <sup>7</sup> Dum ra-am gi, zugyóm hkaû má gyó ang luì, zubyap haú pé kê lô mù, wup pyám ri. <sup>8</sup> Ra-am dum nghut jáng, myìhpún bo é jang má gyó ang luì, ashi zuì lo é gi, sân kat é htoq rashô tú, hkyuq xê tú, sum xê tú, myô jat lo é nghut ri. <sup>9</sup> Gyô yù râ nohkyap dap sù gi, gyô yù sháng gaq." ga le taî ri.

<sup>10</sup> Haú hkûn, chángzô pé gi, Yhâng chyáng lé mù, "Nàng gi, haî mù, shí bang lé, dangtú dông taî lhê lhú?" ga myì akô.

<sup>11</sup> Haú jáng, Yhang tû taî é gi, "Mauhkûng mingdán eq sêng é sê gyo wuì é hkyô pé lé sê gyo râ ahko ahkáng, nungmoq lé byí to bê, nghut kôlháng, yhangmoq lé gi, a byi shí é nghut lhê. <sup>12</sup> Wó to sù lé gi, yhang agùn agó wó râ matú, jat byi shirâ nghut lhê. A wó su chyáng mai kúm gi, yhang wó tô é lé

lhang yu pyám byi shirâ nghut lhê. <sup>13</sup> Yhangmoq gi, wú to kôlhang, a myàng kó; gyô nyi kôlhang, a wó gyo, a sê gyo kó nghut é yanmai, yhangmoq lé Ngò dangtú dông taí râ é nghut lhê. <sup>14</sup> Haú gi,

'Nungmoq gi, wó gyô tô nyi kôlhang, sê gyo kó râ a nghut;

myang tô nyi kôlhang, wú sé kó râ a nghut.

<sup>15</sup> Hkâsu mù gâ le, byù shí bang gi, myit nhikshi jit byuq bê;

yhangmoq é nohkyap gi, a wó gyo kó,

myoqjí le chûm byuq bekô nghut ri.

Haú su a nghut le gi, yhangmoq, myoq myàng no gyo mù,

i-myt bun bóng luí, lhîng lò kômù,

Ngò, yhangmoq lé yâ gè byi berâ nghut lhê.<sup>☆</sup>

gâ é, Esai-aq é myiqhtoi dang lé lhoq dik é nghut ri.

<sup>16</sup> Nghut kôlhang, nungmoq é myoq gi, wó myâng

mù, nungmoq é nohkyap gi, wó gyô é yanmai,

nungmoq gi, hkungsô wó nyi ri. <sup>17</sup> Hkâsu mù gâ

le, Ngò, nungmoq lé teng za taí kôlé, nungmoq wó

myâng, wó gyô é pé lé, myiqhtoi pé eq dingmán

bang myo myo gi, myàng nau gyo nau kôlhang, a

wó myâng, a wó gyo kó nghut ri.

<sup>18</sup> Ahkuí, kyôshi san sù eq sêng é dangtú é

lichyúm lé rago gyô wú keq; <sup>19</sup> Hkyô má gyó âng é

kyôshi gi, mauhkûng mingdán eq sêng é danglù lé

wó gyo kôlhang, a sê gyô é yanmai, haú agè ashop

sù lé lô mù, yhâng é i-myt hkaú má san kat tô

é kyôshi lé, lé yu pyám byi é hui sù lé gá nau é

nghut lhê. <sup>20</sup> Luqgok yò pé má gyó âng é kyôshi

gi, mungdang lé wó gyo jáng, radá dâm gabú myit

☆ 13:15 Esai 6:9-10

èq hap yù kôlhang, <sup>21</sup> amyit a wó chîn é yanmai, razup zo za yuq mù, mungdâng é yanmai, wuîhkê é eq zing-rî é hui kôjáng, hân hân htak ló byuq é sù lé gá nau é nghut lhê. <sup>22</sup> Zugyóm má gyó âng é kyôshi gi, haû mungdang lé wó gyô yù kôlhang, shí ipyat lhê é myit wui myit hke hkyô pé eq hkyô shuí nghoq jung ngùn hîng zèhkoq èq hup pyâm é yanmai, ashi a wó zuí é sù lé gá nau é nghut lhê. <sup>23</sup> Nghut kôlhang, myìhpún bo é jang má gyó âng é kyôshi kúm gi, mungdang lé wó gyo mù, sê gyô yu é sù lé gá nau é nghut lhê. Haú yuq ashi zuí é gi, san kat é htoq rashô tú, hkyuq xê tú, sum xê tú, myô jat lo é nghut ri.

### *Myoqgàm Dangtú*

<sup>24</sup> Yesuq, yhangmoq lé dangtú dông xoq taí kyô é gi, "Mauhkûng mingdán gi, ge é kyôshi lé, yò má san kat sù rayuq eq du ri. <sup>25</sup> Byu pé yhup myhî tô bum é u lé, yhâng é gyè gi, lé jé mù, guq gàm gyoro má, myoqshi lé sân to hkó luí, taû ló byuq bê nghut ri. <sup>26</sup> Guq gàm yuq lò mù, guq nhâm htoq lo é hkûn, myoqgàm le bo yuq htoq lo ri.

<sup>27</sup> Yhumsîng hpô é dui-nhâng zoshâng wuì gi, yhâng chyáng lé jé mù, 'Yhumsîng ê, ge é kyôshi lé za yò má sân tô é a nghut lhú? Myoqgàm pé gi, hkâmai htoq lo é lhú?' ga myi kôjáng, <sup>28</sup> haû yhumsîng hpó gi, 'Gumlau gye èq kut é nghut ri.' ga tû taí ri.

Haú jáng, dui-nhâng zoshâng wuì gi, 'Ngamoq, myoq haú pé lé ê nut pyám râ lé, nàng ô nau ri lhú?' ga myí akô.

<sup>29</sup> Haú hkûn, yhang gi, 'Hká nut pyám kó; hkâsu mù gâ le, nungmoq, myoq haú pé lé nut é hkûn,

guq gàm pé lé le bo záng nut pyám kó râ nghut lhê.  
<sup>30</sup> Kyôshu yoqjé shoq rahá yuq to kó sháng gaq; haú hkûn, myoqgàm pé lé hí hkyin tsing yù mù, nyhé hkyô pyám râ matú hkyom dîng to luî, guq lé kúm gi, shû yù mù, ngá é chyî má tsing kat to râ matú, kyô shu bang lé ngò tái râ nghut lhê.' ga tù tái ri." gâ ri.

*Angshi Cham Eq Múnchi Dangtú*

*Mrk 4:30-34; Luk 13:18-21*

<sup>31</sup> Hau htâng, Yesuq gi, yhangmoq lé gotû dangtú ralhum dum xoq tái é gi; "Mauhkûng mingdán gi, byù rayuq èq, yhâng hkyâm má hô tô é angshi cham eq wuí ri. <sup>32</sup> Angshi cham haú gi, kyômyui jí banshoq htoq má je tiq é nghut kôle, yuq kô lò jáng, hkyâm má hô é mhan-haq hpoqnoq gàm banshoq htoq má je kô é agàm dut lò mù, akoq pé má, maulat nghoq zô pé lé wó zung nô bum lhê." gâ ri.

<sup>33</sup> Yhang, gotû dangtú dum xoq tái é gi, "Mauhkûng mingdán gi, myiwe rayuq èq sungso mún sum bûng má yu nyhó luî, haú pé banshoq lé wó lhoq dau nhang é múnchi eq wuí ri." gâ ri.

<sup>34</sup> Yesuq gi, byù moq mó lé, haú pé banshoq dangtú dông mai chyat tái ri; yhangmoq lé, dangtú a bo é haî lháng a tái wú nghut ri. <sup>35</sup> Haú gi, "Ngá nhut lé hpóng mù, dangtú dông mai tái râ; mingkan lé sâng-hi hpan é mai zaú tô é hkyô pé lé tái sân kyo râ nghut lhê."✧  
 ga, myiqhtoi dông tái tô é dang lo dik é nghut ri.

*Myoqgàm Dangtú Lé Tái Sân Kyô É Hkyô*

<sup>36</sup> Hau htâng má, Yesuq gi, byù moq mó mai htoq ló mù, yhúmhkaû má wang ló ri. Haú hkûn, Yhâng é chángzô pé gi, Yhâng chyáng lé lô kômù, "Yò mã é myoqgàm dangtú eq sêng é hkyô lé tai sân kyo laq." ga tai akô.

<sup>37</sup> Haú jáng, Yhang tú tai é gi, "Ge é kyôshi san sù gi, haú Byu Yhangzo nghut ri. <sup>38</sup> Yò gi, mingkan nghut ri; ge é kyôshi gi, mauhkûng mingdán é yhangzô pé nghut akô. Myoqgàm pé kúm gi, haú Tsadán é yhangzô pé nghut akô; <sup>39</sup> haú lé châng hkat sân é gumlau gyè gi, nat Tsadán nghut ri. Kyôshu yoq gi, mingkan htûm é ahkyíng nghut ri; kyô shu bang gi, maumang lagyô pé nghut akô.

<sup>40</sup> Haú myoqgàm pé lé, nut yù mù, myi má nyhê pyâm é su, haú mingkan htûm é ahkyíng má dut râ nghut lhê. <sup>41</sup> Haú Byu Yhangzo gi, Yhâng é maumang lagyô pé lé nhâng râ nghut lhê; haú mù, haú bang gi, hkyô lhoq nghoq nhang é bang banshoq eq agè ashop hkyô kut é bang lhunglhang lé, Yhâng é mingdán mai hkyin she htoq yù mù, <sup>42</sup> gyúng nyi é myibung hkyûng hkaû má dú kat pyám kó râ nghut lhê; hau má, ngaubyi ngaù nhap eq zuì kyik kyik shoq hpuzô nyi kó râ nghut lhê. <sup>43</sup> Haú hkûn, dingmán bang gi, yhangmoq Yhângwâ é mingdán má bui su duqbó nyi kó râ nghut lhê. Nohkyap dap sù gi, gyô yù sháng gaq.

### *Haq Tô É Sutzè Dangtú*

<sup>44</sup> Mauhkûng mingdán gi, yò mã haq tô é sutzè eq wuí ri. Sutzè haú lé myang é sù gi, haú lé sai haq to mù, gabú myit eq taú ló luí, yhang wó é banshoq lé ûng pyám mù, yò haú lé wui yu ri.

<sup>45</sup> Dum, mauhkûng mingdán gi, réng é palhé lé châng ho wún é hpugá hpó eq wuí ri. <sup>46</sup> Yhang gi, gyai hpaû é palhé lé myàng jáng, yhang wó é banshoq lé ló ûng pyám mù, haú lé wui yu ri.

### *Gùn Lé Dangtú Yu É Hkyô*

<sup>47</sup> Mauhkûng mingdán gi, nhông má, ngozo ajà jà lé wó dú nghop yu é gùn eq le wuí ri. <sup>48</sup> Gùn haú má ngozo byíng jáng, ngo kóng bang gi, wui yàm má she htoq yû mù, zung to luí, ge é pé lé gi, ngo-pyap má guq kat yû luí, a ge é pé lé gi, dú pyám akô. <sup>49</sup> Haú eq rajung za, mingkan htûm é ahkyíng má le, maumang lagyô pé gi, gyó lé lô mù, agè ashop é bang lé, dingmán bâng chyáng mai gam htoq yû luí, <sup>50</sup> ngaubyi ngaù nhap eq zuì kyik kyik shoq hpuzô nyì râ nghut é, gyúng nyì é myibung hkyûng hkaû má dú kat pyám kó râ nghut lhê.

<sup>51</sup> Shí hkyô banshoq lé nungmoq sê gyo bekô lhú?" gâ ri.

Haú hkûn, yhangmoq gi, "Sê gyo bê." ga tû taí akô nghut ri.

<sup>52</sup> Hau htâng, Yesuq gi, yhangmoq lé, "Mauhkûng mingdán eq séng luí mhoq yû bê é tarâ sará ó nghut kôle, yhang mhoq é hkyô gi, yhumsing é sut-púnglhúng hkaû mai zè sik zè xau lé yu htoq é yhumsîng hpó rayuq eq wuí ri." ga dum taí ri.

### *Myiqhtoi, Myoqdong A Wó Dut É Jang*

*Mrk 6:1-6; Luk 4:16-30*

<sup>53</sup> Yesuq gi, dangtú haú pé lé ban taí jáng, haú jowò mai htoq e ló bê nghut ri. <sup>54</sup> Yhang gi, Yhâng é yhummau má jé ló jáng, byu pé lé, yhangmoq é tarajong má mhoqshit ri; haú hkûn, yhangmoq

gi, gyô maú byuq kôluí, "Byù shí yuq gi, hpaqchyí byéng-yá shí eq hpungwup a-tsam mó shí pé lé, hkâmai wó yu é nghut lhê lhà? <sup>55</sup> Yhang gi, laksîma hpô é yhangzo a nghut lhú? Yhângnû é mying gi, Mariq gâ lhê a nghut lhú? Yhanggû pé gi, Yakuq, Yosep, Simun eq Yudaq gâ é bang a nghut kó lhú? <sup>56</sup> Yhâng nhammó pé le, nga-nhúng eq rahá nghut nyi lhê a nghut kó lhú? Haú su nghut le nhing, haú pé banshoq lé, Yhang hkâmai wó yu é nghut lhê lhà?" ga myí bùm kômù, <sup>57</sup> Yesuq lé myit a ngón dut bùm bekô nghut ri.

Yesuq kúm gi, yhangmoq lé, "Myiqhtoi rayuq gi, yhumsing é yhummau eq yhumsing é yhúm má za, myoqdong a lhaq wó wú é nghut lhê." ga tú taí kat ri.

<sup>58</sup> Yhangmoq lumjínq myit a bò kô é yanmai, Yesuq gi, haú má, laklaí kumlhá myo myo a kut shit lo nghut ri.

## 14

*Wui-myhup Sará Yohan Shi Byuq É Hkyô*

*Mrk 6:14-29; Luk 9:7-9*

<sup>1</sup> Haú hkûn, mauzau Herut gi, Yesuq eq sêng é ludang lé wó gyo jáng, <sup>2</sup>yhâng a-ô mâ é bang lé, "Shí yuq gi, Wui-myhup Sará Yohan nghut ri-nhung; Yhang gi, shi é mai dum dui toq lo é nghut mù, hpungwup a-tsam haú pé lé wó kut é nghut ri." ga taí ri.

<sup>3</sup> Herut haú su gâ é gi, yhanggu Hpilip é yhangmyi Herudiaq é yanmai, Yohan lé chyup tuí yù mù, htóng hkyô pyâm é yanmai nghut ri.

<sup>4</sup> Hkâsu mù gâ le, Yohan gi, yhang lé, "Nàng, myiwe haú lé hâng yu é gi, tarâ a wang é nghut lhê." ga taí



byî nyi é yanmai nghut ri. <sup>5</sup> Herut gi, Yohan lé sat pyám naû kôlhang, mingbyû wuì lé gyuq é yanmai, a wám sat nghut ri; haî mù gâ le, yhangmoq gi, Yohan lé myiqhtoi tsuq nyî kô é yanmai nghut ri.

<sup>6</sup> Nghut kôlhang, Herut é hkû ladu hkyúm buinyî má, Herudiaq é yhangzo byizo gi, yhangmoq é hí má gó shit é lé, Herut gi, gyai yhang wú myit nguì mù, <sup>7</sup> byizo haú lé, yhang haî dung le haî byi râ ga dakam é danggidiq byî ri. <sup>8</sup> Byizo haû gi, yhangnu hpaqchyî byî é lé gyô yù mù, "Shî, bó má, Wui-myhup Sará Yohan é ulhum lé, kat byi laq." ga, Herut lé dúng ri. <sup>9</sup> Mauzau hpó gi, myit a ngón dut byuq kôlhang, yhang dakam tô é danggidiq é yanmai le, bíng pé é myoqdong lé tê nau é yanmai le, yhang dúng é lé, byi râ matú, <sup>10</sup> htóng hkaû má lúng tô é Yohan é ulhum lé hpyit râ hkunmó hkyô kat bê nghut ri. <sup>11</sup> Yohan é ulhum lé bó má kat luî, myiwe zo haú lé byi jáng, myiwe zo haû gi, haú lé yhangnú chyáng yu lô byî ri. <sup>12</sup> Haû mù, Yohan é chángzô pé gi, yhang é màng lé lé yû luî, myhup pyám bekô nghut ri. Hau htâng, yhangmoq gi, Yesuq lé lô tâi kyô akô nghut ri.

*Byù Ngo Hkyîng Lé Byi Tsô É Hkyô*

*Mrk 6:30-44; Luk 9:10-17; Yhn 6:1-14*

<sup>13</sup> Yesuq gi, haú hkyô lé wó gyo jáng, haû mai lhaî ji mù, tsím tsâm é jowò shut Yhang baú e lô ri. Haú lé, byu pé wó gyô bùm kôjáng, wà mó pé mai htoq lé lô kômù, hkyî hkyô Yhâng htâng châng e lô akô nghut ri. <sup>14</sup> Yesuq gi, lhaî mai gyó dap lô é hkûn, byù moq mó nyi to lánng é lé myàng jáng, yhangmoq lé wú shogyo luî, nò bang lé lhoq gê byî ri.

<sup>15</sup> Myinhâng jé lô jáng, haû chángzô pé gi, Yhâng chyáng lé kômù, "Shí má gi, tsím tsâm é jowò nghut é htoq agó, bui le gym ló bê nghut mù, shiwa byu pé gi, wà pé shut ló luí, yhangmoq é matú zôjung ló wó wuî kó sháng gaq, yhangmoq lé nhang kat aq hkoi." ga taí akô.

<sup>16</sup> Haú hkûn, Yesuq gi, "Yhangmoq ló a ra. Nungmoq, yhangmoq lé rajung jung byi tso keq." ga tû taí kat ri.

<sup>17</sup> Haû su ga jáng, yhangmoq gi, "Muk ngo long eq ngozo í du za ru wó lhê." ga dum tû taí akô.

<sup>18</sup> Haû jáng, Yesuq gi, "Yu lò keq." ga tû taí mù, <sup>19</sup> shiwa byu pé lé, wàhu yò má zùng nhang ri. Hau htâng, Yhang gi, haû muk ngo long eq ngozo í du lé yù mù, mauhkûng shut tu wú to luí, jeju ban hkya-on jáng, muk lé hpê gàm mù, chángzô pé lé byí ri. Haû chángzô pé gi, shiwa byu pé lé gàm byí akô nghut ri. <sup>20</sup> Yhangmoq banshoq bang zô gyí bùm kô é htâng má, haû chángzô pé gi, zô myhit tô é pé lé, raxe í mung byíng shoq wó guq tsíng yu ashî kô nghut ri. <sup>21</sup> Haú má zô é bang gi, myiwe wuî eq zoshâng wuî lé a nghap lhôm é za, yuqgè baú ngo hkyíng kô bo ri.

### *Yesuq, Wuî Htoq Má Sô É Hkyô*

*Mrk 6:45-56; Yhn 6:15-21*

<sup>22</sup> Yesuq gi, haû shiwa byu pé lé byo ló nhang nyi é hkûn jáng, chángzô pé lé lhai má wang ji nhâng mù, tû tap shut dap ló lánng nhâng ri. <sup>23</sup> Shiwa byu pé lé nhang pyâm é htâng má, Yhang gi, kyûdung râ ga, Yhang baú bùm shut doq e ló ri. Myinhâng chutshúm zó jé shoq, Yhang baú haú má nyi nyi ri.

<sup>24</sup> Haú u lé, lhai gi, gin-gau mai tsómra wê é jowò

má jé é hkûn, laì tau mut é yanmai, wuìheng èq gyai yhang lo bat nhûn é hui zô ri.

<sup>25</sup> Htang napsûn maubó zó sum hkyíng eq hkyuq hkyíng gyoro má, Yesuq gi, nhông htoq má so mù, yhangmoq chyáng lé lo ri. <sup>26</sup> Haû mù, chángzô pé gi, Yesuq nhông htoq má sô nyi é lé myàng kôjáng, gyuq dân kômù, "Sobyô ô!" ga gyuq nán é èq taì garú akô nghut ri.

<sup>27</sup> Haû jáng yhang, Yesuq gi, yhangmoq lé, "Hkâgyuq kó! Ngò ru nghut lhê; myit wum lhoq kíng keq." ga nyo kat ri.

<sup>28</sup> Haú hkûn, Petruq gi, "Yhumsîng ê, Nàng yhang ru nghut le gi, ngo lé, wuì htoq mai sô lé lô nhâng laq." ga taì kat ri.

<sup>29</sup> Haû jáng, Yesuq gi, "Lé lô aq." ga tû taì kat ri.

Haû mù, Petruq gi, lhaì mai gyó mù, wuì htoq mai Yesuq chyáng sô e ló ri. <sup>30</sup> Nghut kôlhang, yhang gi, laidun htan é lé myang kat jáng, wú gyuq luì, wuì má nop ló nyi mù, "Yhumsîng ê, ngo lé hkyi yù laq." ga wut garú kat ri.

<sup>31</sup> Yesuq gi, radá dâm yhâng é loq lhâm kat luì, Petruq lé lêng zing to mù, "Lumjîng myit shau sù ê, nàng haì mù úng-âng lhê lhú?" ga taì ri.

<sup>32</sup> Yhangnhik, lhaì má wàng kôjáng, laidun le zîm byuq bê nghut ri. <sup>33</sup> Hau htâng, haû lhaì má lúng tô é bang gi, Yhang lé paì gop mù, "Nàng gi, gè gè yhang, Garai Gasâng é Yhangzo nghut bê." ga taì akô nghut ri.

<sup>34</sup> Yhangmoq gi, gû dap ló kômù, Genesarat mau má jé wang ló bekô nghut ri. <sup>35</sup> Haú mau mâ é bang gi, Yesuq lé wú sé kôjáng, awui ayàm mâ é bang banshoq lé kyô kat akô. Haû mù, byu pé gi, nòhpyo

hui bang lhunglhang lé, shuí lé lô kômù, <sup>36</sup> nòhpyo hui bang lé, Yhâng é bushi htâng má za lhang záng nhâng rà matú dùng tôngbán akô; Yhang lé záng é lhunglhang bang gi, lhoq gê byi é huí bekô nghut ri.

## 15

### *Sansêng É Hkyô Eq A Sansêng É Hkyô*

#### *Mrk 7:1-23*

<sup>1</sup> Hau htâng má, Hparishe pé eq tarâ sará pé ram gi, Yerusalem wà mó mai Yesuq chyáng jé lé lô kômù, <sup>2</sup> "Náng é chángzô pé gi, haí mù luí, íchýí îwa pé é htungli lé a cháng kut akô lú? Yhangmoq gi, loq hí a chí é zang zô akô nghut ri." ga, lé taí akô.

<sup>3</sup> Haú jáng, Yesuq tù taí é gi, "Nungmoq gi, haí mù, nungmoq é htunglí é yanmai, Garai Gasâng é hkunmó lé a cháng kô é lú? <sup>4</sup> Hkâsu mù gâ le, Garai Gasang gi, 'Nungmoq é înu îwa lé, hkungga keq.' ✧ ga le, 'Înu îwa lé, nhîng é sù ó yuq nghut kôle, sat pyâm é hui râ lhê.' ✧ ga le, taí tô é nghut lhê. <sup>5</sup> Nghut kôlhang, nungmoq taí é gi, 'byù rayuq yuq, yhumsing é yhângnu yhângwa lé byi âng é zè lé, Garai Gasang lé byi râ chyunghuq nghut lhê ga taí é nghut jáng, <sup>6</sup> haú yuq gi, yhângwa lé hkungga nó a ra.' gâ akô nghut ri. Haú dông mai, nungmoq gi, nungmoq é htunglí é yanmai, Garai Gasâng é mungdang lé he-ngik pyâm akô nghut ri. <sup>7</sup> Gegùn labyoq kut bang ê! Nungmoq eq séng luí, myiqhtoi Esai-aq htoí tô é dang gi, têng ri. <sup>8</sup> Myiqhtoi dang haú gi,

✧ 15:4 Htoq Ló 20:12 ✧ 15:4 Htoq Ló 21:17

'Byù shí bang gi, nhut htoq mai za Ngo lé hkunggâ akô;

yangmoq é myit nhiklhum gi, Ngò eq wê gâng nyi akô.

<sup>9</sup> Yhangmoq, Ngo lé noqkuq nyi kô é gi, akôm má za nghut nyi ri;

hkâsu mù gâ le, yangmoq é mhoqshit hkyô pé gi, byù dông mai mhoqshit é hkyô pé za nghut nyi ri. ✧

gâ é nghut lhê." gâ ri.

<sup>10</sup> Hau htâng, Yesuq gi, shiwa byu pé lé, Yhâng chyáng wut yù luí, "Gyô yù mù, sé lo keq. <sup>11</sup> Nhut má wang lo é hái jung le, byù lé a sanséng dut nhang é a nghut, nhut mai htoq lo é pé sheq, byù lé a sanséng dut nhang é ru nghut lhê." ga tái ri.

<sup>12</sup> Haú hkûn, haú chángzô pé gi, Yhâng chyáng lé lô kôluí, "Hparishe pé gi, shí hkyô lé wó gyo mù, nhik-yô nyi bùm kô é lé, Nàng sê lhê lhu?" ga myi kôjáng,

<sup>13</sup> Yhang gi, "Mauhkûng htoq tsáng myhâng mâ é Ngá Wa a hô tô é agàm hkangmó gi, apùn eq roq nut pyâm é hui râ nghut lhê. <sup>14</sup> Yhangmoq é yanmai, myit hkâ-myó kó; yangmoq gi, myoqjit bang nghut kôle, myoqjit é bang lé hkyô-u she é bang nghut akô. Myoqjit yangchang hkyô-u she lhâm é nghut le gi, í yuq é yang donghkong má byit gyó kó râ za nghut lhê." ga tû tái ri.

<sup>15</sup> Haú hkûn, Petruq gi, "Ngamoq lé, dangtú hau é lichyúm tái sân kyo laq." ga tái jáng, <sup>16</sup> Yesuq gi, "Nungmoq, ahkuí le haú-í yang go nyi ashí kô luq? <sup>17</sup> Nhut má wang lo é hái jung le, wam dau

hkaû má jé wang ló mù, gungdu mai dum htoq ló é nghut lhê. <sup>18</sup> Nghut kôlhang, nhut mai htoq lo é gi, myit nhiklhum mai htoq lo é nghut mù, byù lé a sanséng dut nhang ri. <sup>19</sup> Hkâsu mù gâ le, myit nhiklhum mai htoq lo é gi, agè ashop é dông myit é hkyô pé, byù sat é hkyô, su-myi sulàng lú hkyô, ashop é dông gungsho zùm yap é hkyô, hkaû é hkyô, a tengmán é saksé hkâm é hkyô, lumù gansang é hkyô pé nghut ri. <sup>20</sup> Haû pé gi, byù lé a sanséng dut nhang é hkyô pé nghut ri; loq a chí e za zo shuq é gi, byù lé a sanséng a dut nhang é nghut lhê." ga taí ri.

*Hkanan Myiwe Myhí Rayuq É Lumjǐng Myit*

*Mrk 7:24-30*

<sup>21</sup> Haû htâng, Yesuq gi, haû mai Turuq eq Sidun mau shut htoq e ló bê nghut ri. <sup>22</sup> Haû hkûn, haû mau má nyi é Hkanan myiwe myhí rayuq gi, Yhâng chyáng lé jé mù, "Dawiq é Yhangzo, Yhumsîng ê, ngo lé shogyô yù laq ô! Ngá byizo gi, nat gang wang júng mù, gyai yhang nò gyîn nyi ri." ga taí garû ri.

<sup>23</sup> Nghut kôlhang, Yesuq gi, dang rahkun le a tû taí nghut ri. Haû mù, Yhâng é chángzô pé gi, Yhâng chyáng lé jé kômù, "Myiwe myhí haû lé ló nhang pyám aq; haû mù gâ le, yhang gi, nga-nhûng é htâng má châng garû nyi ri." ga taí akô.

<sup>24</sup> Yesuq gi, "Byuq byuq é sau pé su nghut nyi é Israelaq byu pé chyáng sheq, Ngo lé nhang kat é ru nghut lhê." ga taí ri.

<sup>25</sup> Haû hkûn, myiwe myhí haû gi, Yhâng é hí má lé mù hkyihput htuq luî, "Yhumsîng ê, ngo lé garúm yù laq ô!" ga taí ri.

26 Yesuq gi, "Zô wui chyáng mâ é zoshuq lé yù mù, hkuî pé lé byi tsô é jung a nghut." ga tù tái jáng, 27 myiwe myhí haû gi, "Yhumsíng ê, haû kúm nghut ri; nghut kôlhang, hkuî pé lhang, yhumsíng hpô é zohpoq mai gyó é zang cham zang htâng lé, zô akô mhaî." ga dum tái ri.

28 Haû mù, Yesuq gi, "Myiwe zo ê, náng é lumjíng myit gi, kô nyi ri! Náng dúng é hkyô lé gyo byi bê nghut lhê." ga tù tái ri. Haû hkûn jáng, myiwe myhí hau é byizo le ge byuq bê nghut ri.

*Byù Myi Hkyîng Lé Byi Tsô É Hkyô*  
*Mrk 8:1-10*

29 Yesuq gi, haû mai htoq ló luî, Galile nhông yàm má ê jé mù, bùm shut doq ló luî, ló zung nyi ri. 30 Haû hkûn, byù moq mó gi, hkyî hten bang, myoqjit bang, gung-yùn bang, nhut jit bang eq nò bang gotû myo myo lé shuí lé lô kômù, Yhâng é hkyî wang má lé nyhi to kô é nghut luî, Yhang gi, haû bang lé lhoq gê byi ri. 31 Haû shiwa byu pé gi, nhut jit bang dang wó nyò kô é lé le, gung-yùn bang ge byuq é le le, hkyî hten bang hkyô wó sô é lé le, myoqjit bang myoq wó myang é lé le, myàng kôjáng, wú maú kômù, Israelaq é Garai Gasang lé hkya-ôn bum akô nghut ri.

32 Yesuq gi, Yhâng é chángzô pé lé wut yù mù, "Ngò, shí bang lé wú shogyô ri; yhangmoq gi, Ngò eq rahá nghut nyi é sum nyí bò bê, haî le a myàng zo kó nghut ri. Yhangmoq, hkyolat má mut yut ló yut kó abe, yhangmoq zòmut to gû lé, Ngò a nhang kat naù." ga tái ri.

<sup>33</sup> Haú hkûn, Yhâng é chángzô pé gi, "Isû é yoso má nhîng, byù shî myhò bang lé luq shoq byi tso râ zoshuq gi, hkarâ é wó râ l hú?" ga myî akô.

<sup>34</sup> Yhang gi, "Nungmoq, muk hkâ-myhó long wó akô l hú?" ga tau myi jáng, yhangmoq gi, "Muk nyhit long eq ngo-nú zo ratsuí wó lhê." ga tû tâ akô.

<sup>35</sup> Haú mù, Yhang gi, byù hpûng lé, myigùng htoq má zùng nhang ri. <sup>36</sup> Hau htâng, Yhang gi, haú muk nyhit long eq ngozo lé yù mù, jeju ban hkya-on jáng, myhik hpé luî, haú chángzô pé lé byi jáng, yhangmoq gi, byù hpûng lé gàm byî akô nghut ri. <sup>37</sup> Yhangmoq lhunglhâng bang zô gyî bùm kô é htâng má, haú chángzô pé gi, amyit ahtâng lé nyhit mung byíng shoq wó guq tsíng yu ashî kô nghut ri. <sup>38</sup> Haú hkûn zô é bang má, myiwe wuì eq zoshâng wuì lé a nghap lhôm é za, yuqgè wuì baú myi hkyíng yuq bo ri. <sup>39</sup> Yesuq gi, byù hpûng lé ló nhang pyâm é htâng má, lhaî má wang ji mù, Magadan mau shut dap e ló bê nghut ri.

## 16

### *Kumhá Dung Kô É Hkyô*

#### *Mrk 8:11-13; Luk 12:54-56*

<sup>1</sup> Hparishe pé eq Saduke pé gi, Yesuq chyáng lé jé kômù, Yhang lé chyam wú é dông, mauhkûng mã é kumhá kut shit rá matú, dúng akô.

<sup>2</sup> Haú mù, Yhang gi, yhangmoq lé, "Nungmoq gi, myinhtâng jé jáng, 'Mau hpong rá nghut lhê, hkâsu mù gâ le, mauhkûng ne ri.' ga le, <sup>3</sup> napkyó lé nghut jáng, 'Hkû-nyí laidun lò râ nghut lhê, hkâsu mù gâ le, mauhkûng nè mù, noq ri.' ga le, lhaq tâ akô.



Nungmoq gi, mauhkung é isâm lé wú mù sê gam hkoq yû kô é nghut kôlhang, shí ipyat lê é kumlhá lé gi, a sê gam hkoq yû kó nghut ri. <sup>4</sup> Agè ashop é eq lhum a zuí é ipyat shí gi, limik kumlhá lé ho nyi akô; nghut kôlhang, Yonaq é kumlhá mai lai luí, gotû haí le tûn shit râ a nghut." ga taí ri. Hau htâng, Yesuq gi, yhangmoq chyáng mai htoq ló bê nghut ri.

*Hparishe Pé Eq Saduke Pé É Múnchi*

*Mrk 8:14-21*

<sup>5</sup> Yhangmoq, nhông hé hpoq shut gû dap ló kô é hkûn, haú chángzô pé gi, muk yu chûng râ lé tô-myhí pyâm akô. <sup>6</sup> Haú hkûn, Yesuq gi, "Hparishe pé eq Saduke pé é múnchi lé, sidiq luí, koi pyâm nyi keq." ga, yhangmoq lé taí kat ri.

<sup>7</sup> Yhangmoq gi, "Nga-nhúng, muk a yu chung é yanmai, haú su ga taí é nghut ri." ga luí, taí lhum bum akô nghut ri.

<sup>8</sup> Yhangmoq haú su taí lhûm nyi kô é lé Yesuq sé jáng, yhangmoq lé, "Lumjúng myit shaú é bang ê, muk a bo é hkyô lé, haí mù taí lhûm nyi akô lú?"

<sup>9</sup> Ahkuí jé shoq, nungmoq gi, a sê gyo shi kó lú? Muk ngo lông èq byù ngo hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, <sup>10</sup> muk nyhit lông èq byu myi hkyîng lé byi tsô é htâng, nungmoq hkâ-myhó mung wó dum guq tsîng yù kô é lé le, nungmoq a myit bun kó lú? <sup>11</sup> Ngò gi, muk eq séng luí taí é a nghut é lé, nungmoq, hkâsu mù a sê gyo kô é lú? Hparishe pé eq Saduke pé é múnchi lé koi pyám keq nghû taí é ru nghut lê." ga taí ri. <sup>12</sup> Haú hkûn sheq, Yhang taí é gi, muk má chung é múnchi lé koi pyám râ

matú taí é a nghut e za, Hparishe pé eq Saduke pé é mhoqshit hkyô lé koi pyám râ matú taí é ru nghut é lé, yhangmoq sê gyô akô nghut ri.

*Yesuq Lé, Petruq Yín Yu É Hkyô*

*Mrk 8:27-30; Luk 9:18-21*

<sup>13</sup> Yesuq gi, Kesare-Hpilipi wà mó nâm mâ é mau má jé é hkûn, Yhâng é chángzô pé lé, "Haû Byu Yhangzo gi, ó yuq nghut lhê ga, byu pé taí akô lú?" ga myî ri.

<sup>14</sup> Haû hkûn, yhangmoq gi, "Ra-am gi, Wui-myhup Sará Yohan ga, góbang gi, Eliyaq ga, dum ra-am gi, Yeremiaq, a nghut jáng, gotû myiqhtoi rayuq yuq nghut ri ga, taí akô." ga tû taí kôjáng,

<sup>15</sup> Yhang gi, "Haû jáng, nungmoq gi, Ngo lé ó yuq nghut lhê nghu akô lú?" ga, yhangmoq lé xoq myî ri.

<sup>16</sup> Haû hkûn, Simun Petruq gi, "Nàng gi, rû dui nyi é Garai Gasâng é Yhangzo, Hkrisduq nghut ri." ga tû taí ri.

<sup>17</sup> Haû mù, Yesuq tû taí é gi, "Yonaq é yhangzo Simun ê, nàng gi, hkungsô wó nyi ri; hkâsu mù gâ le, nang lé haû hkyô tûn shit é gi, byù mai a nghut, mauhkûng htoq má nyi é Ngá é Íwa mai tûn shit é ru nghut lhê. <sup>18</sup> Ngò, nang lé taí lé, nàng gi, Petruq\* nghut luî, luqgok shî má, Ngò, Ngá é noqkuq hpúng lé xuq to râ nghut mù, haû moming hkúmdong pé gi, hpúng haû lé wó ûng râ a nghut.

<sup>19</sup> Mauhkûng mingdán é zoqshi pé lé, Ngò, nang lé ap byi râ nghut lhê; myigùng htoq má, nàng tuî to má tuî to lé, mauhkûng htoq má le, tuî to râ nghut

---

\* **16:18** Grik đông Petruq gâ é gi, luqgok lé gâ é nghut lhê.

lhê; myigùng htoq má, nàng lhoq lhut má lhoq lhut lé, mauhkúng htoq má le, lhoq lhut byi râ nghut lhê." gâ ri. <sup>20</sup> Hau htâng, Yhang Hkrisduq nghut é hkyô lé, ó lé le a taî kyo râ matú, Yhâng é chángzô pé lé taî hkùm kat ri.

*Yesuq Gi, Yhang Shî Râ Lé Hí Te Taî É Hkyô*  
*Mrk 8:31—9:1; Luk 9:22-27*

<sup>21</sup> Yesuq gi, Yhang Yerusalem wà mó má ló mù, suwún wuí, hkyangjong agyi pé eq tarâ sará pé é loq má, zing-rí é myo myo hui zo luí, sat pyâm é hui ra râ nghut kôle, sum nyí nghû râ buinyì má, lhoq toq yu é hui râ nghut é hkyô lé, haú hkùn mai, Yhâng é chángzô pé lé taî kyo hi ló bê nghut ri.

<sup>22</sup> Haú mù, Petruq gi, Yhang lé rahkyam shut shuí htoq yú mù, "Yhumsîng ê, haú hkyô Náng chyáng hkâ-nhám le a dut sháng gaq." ga Yhang lé tân ri.

<sup>23</sup> Yesuq gi, lhing wú kat mù, Petruq lé, "Tsadán nàng, Ngá chyáng mai hpâng aq! Nàng gi, Garai Gasang eq sêng é hkyô lé a myit e za, byù eq sêng é hkyô lé za myit é sù nghut mù, Ngá é matú myit leqbat jowò nghut ri." ga taî ri.

<sup>24</sup> Hau htâng, Yhang gi, Yhâng é chángzô pé lé, "Ngá htâng cháng naú sù ó yuq nghut kôle, yhum-sîng gùng yhumsîng he-ngik pyâm mù, yhumsîng é tapzîng lé waq chùng luí, cháng ra râ nghut lhê.

<sup>25</sup> Hkâsu mù gâ le, yhumsîng é asak lé hkyi yù naú sù ó yuq nghut kôle, asak sum râ nghut lhê; nghut kôlhang, Ngá é yanmai, yhumsîng é asak sùm pyâm é sù kúm gi, asak wó yú râ nghut lhê. <sup>26</sup> Byù gi, mingkan gón lé wó sing to kôlhang, yhumsîng é asak woi-nyí sùm byuq é nghut le gi, yhang é

matú, hai akyû bò râ l hú? Byù gi, yhumsing é asak woi-nyí lé, hai èq wó htaí yù râ l hú? <sup>27</sup> Haù Byu Yhangzo gi, Yhâng Wâ é hpungwup shingkang bo é èq, Yhâng Wâ é maumang l agyô pé eq rahá jé lé lô râ nghut l hê; haù hkûn, Yhang gi, yuq hkanmó lé, yhumsîng kut lai bê eq rajung za akyû byi râ nghut l hê. <sup>28</sup> Ngò, nungmoq lé teng za taí kôlé, ahkuí shí má yap to bang ra-am gi, haù Byu Yhangzo, Yhâng é mingdán eq jé lé lo é lé, a myang é za shí kó râ a nghut." ga taí ri.

## 17

### *Yesuq, Isâm Htaí Lo É Hkyô*

*Mrk 9:2-13; Luk 9:28-36*

<sup>1</sup> Hkyuq nyí lai htâng má, Yesuq gi, Petruq lé le, Yakuq eq yhanggu Yohan nhiktâng lé le, shuí chûng mù, yhangmoq baú myhang é bùm ralhum má doq ló akô. <sup>2</sup> Haù má, yhangmoq é myoq hí tê má, Yesuq é ihpyô isâm htaí byuq mù, Yhâng é myoqdong gi, bui su duqbó tô é eq, Yhâng é mebu gi, maubó su hpyu zan tô ri. <sup>3</sup> Haù hkûn jáng, Mosheq eq Eliyaq gi, yhangmoq é hí má htoq shit mù, Yesuq eq dâng nyo lhûm nyí akô.

<sup>4</sup> Haù mù, Petruq gi, Yesuq lé, "Yhumsîng ê, shí jowò má nga-nhúng nyi le ge ri. Nâng ô nau é nghut le gi, Nâng é matú ralhum, Mosheq é matú ralhum, Eliyaq é matú ralhum kut, ngò zúm sùm lhum saí bá." ga taí ri.

<sup>5</sup> Petruq dang ru taí nyi ashî le, duqbó é mhut gi, yhangmoq lé htup zíng lô mù, mhut hkaû mai htoq lo é hte gi, "Shí yuq gi, Ngò chyitdap é Ngá Zo nghut

lhê; Yhang má Ngò myit dik nyi lhê. Yhâng é dang gyo keq." gâ ri.

<sup>6</sup> Haû su gâ é htê lé, chángzô pé wó gyo kôjáng, yhangmoq gi, gyuq nán mù, myigùng má gop bùm bekô nghut ri. <sup>7</sup> Nghut kôlhang, Yesuq gi, yhangmoq chyáng jé lé lô mù, yhangmoq lé loq èq záng kat luí, "Toq keq, hkâgyuq kó." ga taí ri. <sup>8</sup> Yhangmoq tu wú kat kô le, Yesuq mai lai luí, ó lé le a myàng lo kó nghut ri.

<sup>9</sup> Bùm mai taû gyó lô kô é hkûn, Yesuq gi, "Ahkuí nungmoq myang é hkyô lé, haû Byu Yhangzo shi é mai lhoq dui toq yu é a hui hui gi, ó lé le hkâtaí kyo kó." ga, yhangmoq lé taí hkûm tô ri.

<sup>10</sup> Haû jáng, chángzô pé gi, "Eliyaq hí lé ra râ nghut lhê ga, tarâ sará pé haí mù taí kô é lhú?" ga, Yesuq lé myí akô.

<sup>11</sup> Haû hkûn, Yesuq gi, "Eliyaq hí lé luí, lhunglhang lé hen lajâng to râ gâ é gi, têng lhê. <sup>12</sup> Nghut kôlhang, Ngò, nungmoq lé taí kôlé, Eliyaq gi, jé lé bê nghut lhê; nghut kôle, yhangmoq gi, yhang lé a lhom wú sé kômù, yhangmoq ô nau é dông banshoq kut bekô nghut ri. Haû eq rajung za, haû Byu Yhangzo le, yhangmoq é loq má hpuzo râ nghut lhê." ga tû taí ri. <sup>13</sup> Haû hkûn sheq, Yhang taí nyi é gi, Wui-myhup Sará Yohan eq sêng é hkyô nghut é lé, haû chángzô pé sê gyô akô nghut ri.

### *Nat Wang Júng Sû Lé Lhoq Gê Byí É Hkyô*

*Mrk 9:14-32; Luk 9:37-45*

<sup>14</sup> Yhangmoq, byù moq mó pé chyáng dum taû jé lô kô é hkûn, byù rayuq gi, Yesuq chyáng lé jé mù, hkyihput htuq luí, <sup>15</sup> "Yhumsîng ê, ngá é yuqzo lé shogyô yù laq; yhang gi, mhûngtuq tuq

luî, gyai yhang jamjaû nyi ri. Myihkyóm má le, wuì má le, anum num lêng wàng wàng dut nyi ri. <sup>16</sup> Yhang lé, Náng é chángzô pé chyáng shuí é kôlhang, yhangmoq a wó lhoq gê byi kó nghut ri." ga taî ri.

<sup>17</sup> Haû mù, Yesuq gi, "Lumjínq myit a bo é eq agè ashop é amyû pé ê, Ngò gi, hkâ-myháng jé shoq nungmoq eq rahá nyi mù, wó jân nyi râ lhú? Yuqgè zo haú lé, Ngá chyáng shuí lé lô keq." ga tû taî kat ri. <sup>18</sup> Yesuq gi, nat gang lé tân kat jáng, nat gang haû gi, yuqgè zo haú yuq chyáng mai htoq ló byuq bê nghut mù, haú hkûn jáng, yuqgè zo haû gi, ge byuq bê nghut ri.

<sup>19</sup> Hau htâng, chángzô pé gi, ó a nyi é u má, Yesuq chyáng lé lô kômù, "Ngamoq gi, haî mù, nat haú lé a wó hkat htoq é lhú?" ga, lé myi kôjáng, <sup>20</sup> Yhang gi, "Nungmoq é lumjínq myit shaú é yanmai nghut ri. Ngò, nungmoq lé teng za taî kôlé, nungmoq é lumjínq myit angshi cham í za hkâlháng bò kô é nghut le gi, bùm shî lé, 'Hé shut htot ló aq.' ga taî le, htot râ nghut lhê. Nungmoq a wó kut é haî lháng joq râ a nghut. <sup>21</sup> Shí jung gi, kyûdung é eq zoshuq gám é dông za a nghut jáng, a htoq ló é nghut lhê. \*" ga dum tû taî ri.

<sup>22</sup> Yhangmoq, Galile mau má rahá zup nyi kô é hkûn, Yesuq gi, yhangmoq lé, "Haû Byu Yhangzo gi, byu pé é loq má ap pyâm é hui zo râ nghut lhê. <sup>23</sup> Haú bang gi, Yhang lé sat pyám kó râ nghut lhê; nghut kôlhang, Yhang gi, shi é htâng sum nyí nghû râ nyí má lhoq dui toq é hui râ nghut lhê." ga taî ri.

---

\* **17:21** Chyúmbun shî gi, chyúmding myo myo má a bo é nghut lhê.

Haû mù, haû chángzô pé gi, gyai yhang gyô yón nyí bekô nghut ri.

*Noqkuq Yhûm Hkansê Kat É Hkyô*

<sup>24</sup> Yesuq eq Yhâng é chángzô pé gi, Kaperna-um wà má jé kô é hkûn, noqkuq yhûm hkansê hkyuî bang gi, Petruq chyáng lé jé kômù, "Nungmoq é sará gi, noqkuq yhûm hkansê a kat l hú?" ga myí akô.

<sup>25</sup> Petruq gi, "Kat lhê." ga tû taí ri.

Hau htâng, Petruq yhúmhaû má wang ló le, Yesuq hí lhom taí é gi, "Simun ê, mingkan hkohkam pé gi, kang eq hkansê pé lé, ô pê chyáng mai guq yu akô l hú? Yhumsing byu pé chyáng mai l hú? Haû a nghut jáng, góbâng chyáng mai l hú? Nàng, hkâsu wó myit lhê l hú?" gâ ri.

<sup>26</sup> Haû mù, Petruq gi, "Góbâng chyáng mai nghut ri." ga tû taí jáng, Yesuq gi, "Haû su nghut le gi, yhumsing byu pé gi, lut akô nghut ri. <sup>27</sup> Nghut kôlhang, yhangmoq é i-myit a ngón a dut kó sháng gaq, nhông má ê mù, ngo-nhe ê hkyó aq. Sâng-hi wó nhê yu é ngozô é nhut lé lêng há kat jáng, ngùn htingchap rachap lé myàng râ nghut lhê. Haú lé yù mù, Ngá é matú eq náng é matú, yhangmoq lé ló byi aq." ga taí ri.

## 18

*Kô Dik Sû Gi, Ó Yuq Nghut Lhê L hú?*

*Mrk 9:33-37, 42-48; Luk 9:46-48; 17:1-2*

<sup>1</sup> Haú hkûn, haû chángzô pé gi, Yesuq chyáng lé jé kômù, "Mauhkûng mingdán má, kô dik sû gi, ó yuq nghut lhê l hú?" ga myí akô.

<sup>2</sup> Yesuq gi, zoshâng zo rayuq lé wut yù mù, yhangmoq é gung gûng má shap to luî, <sup>3</sup> taí é gi, "Ngò, nungmoq lé teng za taí kôlé, nungmoq gi, myit htaî lhik luî, zoshâng zo wuî su dut kô é za a nghut jáng, mauhkûng mingdán má hkâ-nhám le wó wâng kó râ a nghut. <sup>4</sup> Haû mù, zoshâng zo shí yuq su, yhumsing é i-myt wó lhoq nyhum é sù ó yuq nghut kôle, mauhkûng mingdán má, kô dik sù nghut ri.

<sup>5</sup> Shí sù é zoshâng lé, Ngá é myìng mai hap yu é sù ó yuq nghut kôle, Ngo lé hap yu é sù nghut bê. <sup>6</sup> Nghut kôlhang, Ngo lé lumjìng é zoshâng wuì mâ é rayuq yuq lé, mara kut shut nhang é sù gi, yhâng é lingzing má luqluí long mó tuî hut byi luî, nik é wuimau má, dú hkyô pyâm é huî é nghut le gi, yhâng é matú je gè râ nghut lhê.

<sup>7</sup> Haû mingkan gi, byu pé lé mara kut shut nhâng jang joq é yanmai, dingnyé wó ri. Haû mara kut shut nhâng hkyô gi, htoq lugù bê; nghut kôlhang, haú lé lhoq htoq sù gi, dingnyé wó ri. <sup>8</sup> Náng é loq èq, a nghut jáng, náng é hkyi èq, nang lé mara kut shut nhang é nghut le gi, haú lé hpyit dú pyám aq. Ahtum abyuq é myi má, hkyî hkúm loq hkúm gû dú hkyô pyâm é hui râ htoq má, hkyî loq a hkúm é za, asak wó yu é nghut le gi, náng é matú je ge ri. <sup>9</sup> Náng é myoqjí èq, nang lé mara kut shut nhang é nghut le gi, haú lé lap choq yù mù, dú pyám aq; myoqjí í jí dap gû ngaraî myi má dú hkyô pyâm é hui râ htoq má, myoq rají eq za, asak wó yu é nghut le gi, náng é matú je ge ri.

*Byuq Byuq É Sau*  
*Luk 15:3-7*



<sup>10</sup> Shî sù é zoshâng zo wuî mâ é rayuq lé lháng a wú tiq râ matú, sidiq nyi keq. Hkâsu mù gâ le, Ngò, nungmoq lé taí kôlé, mauhkûng mâ é yhangmoq é maumang lagyô pé gi, mauhkûng htoq mâ é Ngá Wâ é myoqdong lé, hkâ-nhám le myang nyi akô. <sup>11</sup> (Hkâsu mù gâ le, haû Byu Yhangzo gi, byuq byuq bê bang lé hkyi yù râ matú, jé lé é nghut lhê.)\*

<sup>12</sup> Byù rayuq gi, sau rashô du wó é nghû sháng, sau haú gû mâ é radu byuq byuq é nghut jáng, haû gaú xe gaú du lé, bùm pé má nyhi pyâm to luî, byuq byuq é sau lé a châng ho é nyi râ lú? Haú lé, nungmoq hkâsu wó myit ngam akô lú? <sup>13</sup> Ngò, nungmoq lé teng za taí kôlé, yhang gi, haû byuq byuq é sau haú lé myang ho é hkûn, a lám byuq é sau gaú xe gaú dû é matú gabú é htoq má, haú dû matú je riyhang gabú ri. <sup>14</sup> Haú eq rajung za, mauhkûng htoq mâ é nungmoq é Îwa gi, shî tiq bang mâ é rayuq htên byoq byuq râ lé lháng, ô nau é a nghut.

### *Mara Kut Shut É Gumang Hpó Lé Hkâsu Kut Râ Hkyô*

<sup>15</sup> Náng é gumang hpó, nang lé mara kut shut é nghut jáng, yhâng chyáng ê mù, nungnhik baú za nghut é hkûn, yhâng é mara lé tûn shit aq. Yhang, náng é dang lé gyô é nghut jáng, nàng gi, gumang rayuq dum wó bê nghut ri. <sup>16</sup> Nghut kôlhâng, yhang, náng é dang lé a gyô é nghut jáng, 'Mara hun é hkyô hkangmó lé, saksé í yuq sum yuq lòm jáng, wó lhoq teng sháng gaq.'\* gâ tô é eq rajung za,

\* **18:11** Bun zo shí gi, chyúmding myo myo má a bo é nghut lhê.

✧ **18:16** Tarâ Pun 19:15

nàng, gotû byù ra-í yuq lé shuí chûng aq. <sup>17</sup> Yhang gi, haú bâng é dang lé le a lhom yu é nghut jáng, haú hkyô lé, noqkuq hpúng má shít kyo aq; hpúng é dang lé le a gyô é nghut jáng, yhang lé, a lumjúng é byù rayuq dông le, kang guq sù rayuq dông le sôn pyám aq.

<sup>18</sup> Ngò, nungmoq lé teng za taí kôlé, myigùng htoq má, nungmoq tuí to má tuí to lé, mauhkùng htoq má le, tuí to râ nghut lhê; myigùng htoq má, nungmoq lhoq lhut má lhoq lhut lé, mauhkùng htoq má le, lhoq lhut byi râ nghut lhê.

<sup>19</sup> Ngò, nungmoq lé dum taí kôlé, myigùng htoq má, nungmoq mâ é í yuq myit hui luí, haí lé dung kôlhang, mauhkùng htoq mâ é Ngá Wa gi, haú nhik lé gyo byi râ nghut lhê. <sup>20</sup> Hkâsu mù gâ le, Ngá myíng lé lang luí, í yuq sum yuq zup zîng é jang hkâmá nghut kôlhang, haú bâng é gyoro má Ngò nyi lhê." gâ ri.

### *Shogyo Nhkmyin A Sê É Jùn Hpô É Dangtú*

<sup>21</sup> Haú hkûn, Petruq gi, Yesuq chyáng huí ê mù, "Yhumsîng ê, ngá é gumang, ngo lé mara kut shut é nghut le, yhang lé hkâ-myhó dâm mara hkyut byi ra râ l hú? Nyhit dâm jé shoq hkyut byi ra râ l hí?" ga myí ri.

<sup>22</sup> Haú jáng, Yesuq tû taí é gi, "Ngò, nang lé taí lé, nyhit dâm za a nghut, nyhit xe nyhit tú dâm hkyut byi râ lhê.

<sup>23</sup> Mauhkùng mingdán gi, yhumsîng é dui-nhâng zoshâng wui é jihpán lé jep nau é hkohkâm rayuq eq du ri. <sup>24</sup> Yhang gi, jihpán lé jep hi ló é u lé, yhâng chyáng ngùn wan myo myo chyîn dap to sù lé shuí lé lo akô. <sup>25</sup> Haú yhumsîng hpó gi, haú yuq chyîn

a wó xap é yanmai, chyîn wó yû râ matú, yhang lé le, yhangmyi lé le, yhangzo banshoq eq yhang wó é zèhkoq banshoq lé le, ûng pyám râ hkunmó hkyô kat ri.

<sup>26</sup> Haû mù, dui-nhâng zoshâng haú yuq gi, yhâng é hí má hkyihput htuq luî, 'Ngo lé myit hîng byi shi laq; banshoq lé, ngò xap râ.' ga dúng tôngbán ri.

<sup>27</sup> Haû dui-nhâng zôshang é yhumsîng hpó gi, haú yuq lé wú shogyo luî, chyîn banshoq lhut pyám byi mù, nhang kat ri.

<sup>28</sup> Nghut kôlhang, dui-nhâng zoshâng haû gi, htoq ló mù, yhang lé, denari† rashô chyîn dap tô é dui-nhâng zoshâng luzúm rayuq lé myàng jáng, haú yuq é lingzing má gyaq myhik zing to mù, 'Ngo lé dap tô é chyîn hân xap aq!' ga taî ri.

<sup>29</sup> Haú hkûn, yhâng é luzúm dui-nhâng zoshâng haû gi, yhâng é hí má hkyihput htuq luî, 'Ngo lé myit hîng byi shi laq; ngò xap râ.' ga dúng tôngbán ri.

<sup>30</sup> Nghut kôlhang, yhang gi, a gyo byi e za, yhâng é chyîn dum wó xap é hkûn jé shoq, haú yuq lé htóng hkyô pyám nhâng ri. <sup>31</sup> Gotû dui-nhâng zoshâng wuî gi, haú hkyô lé myàng kôjáng, i-myit wú nô kôluî, yhangmoq é yhumsîng hpó lé, haú hkyô banshoq ló taî kyô akô.

<sup>32</sup> Haû mù, haû yhumsîng hpó gi, dui-nhâng zoshâng haú lé wut hâng yù mù, 'Agè ashop é dui-nhâng zoshâng ê, nàng, ngo lé dúng tôngbán é yanmai, nàng, ngo lé dap é chyîn banshoq lé, ngò lhut pyám byi bê nghut lhê mhaî. <sup>33</sup> Haû su é nhîng,

---

† 18:28 Denari rachap gi, ra-nyí lhê é byù rayuq é zuihpau eq wui ri.

ngò, nang lé shogyô yu é su, náng é luzúm dui-nhâng zoshâng lé, nàng ge shogyô yu lhê a nghut lú?' ga táí luí, <sup>34</sup> yhang gi, nhikjum yo mù, yhâng é chyín ban xap é hkùn jé shoq, jamjau hui zo râ matú, yhang lé, htóng suwún pê chyáng ap byí pyám bê nghut ri.

<sup>35</sup> Nungmoq é gumang wuì lé, nungmoq é myit mai mara a wó hkyut byi kô é nghut jáng, mauhkûng htoq tsáng myhâng mâ é Ngá Wa le, nungmoq lé haú dông kut râ nghut lhê." gâ ri.

## 19

### *Myi Làng Gâng É Hkyô*

#### *Mrk 10:1-12*

<sup>1</sup> Yesuq gi, mhoqshit é dang haú pé lé ban táí jáng, Galile mau mai htoq ló mù, Yodan làng tû tap mâ é Yuda mau má ê jé ri. <sup>2</sup> Byù moq mó gi, Yhâng htâng cháng kô é nghut mù, Yhang gi, haú bang mâ é nòhpyo hui bang lé, haú má lhoq gê byí ri.

<sup>3</sup> Haú hkùn, Hparishe pé ra-am gi, Yhâng chyáng lé jé kômù, Yhang lé chyam wú é dông, "Byù rayuq gi, hai hkyô mai nghut nghut, yhumsing é yhangmyi lé lhoq kâng pyâm le, tarâ wang lhê lú?" ga myí akô.

<sup>4</sup> Haú jáng, Yhang tû taí é gi, "A-nham sâng-hi lé, Hpân Sû, 'byu hpan é hkùn, yuqgè eq myiwe lé hpan é nghut lhê.'<sup>✧</sup> <sup>5</sup> 'Hau é yanmai, yuqgè gi, yhumsing é înu îwâ chyáng mai htoq luí, yhangmyi eq rahá rading ralhum za kut nyí mù, yhangnhik gi, gungsho ralhum za dut byuq kó râ nghut lhê.'<sup>✧</sup> ga kâ tô é lé, nungmoq a nghap wú kó lú? <sup>6</sup> Haú

✧ 19:4 Apûn 1:27 ✧ 19:5 Apûn 2:24

mù luí, yhangnhik gi, í yuq a nghut lô e za, rayuq za dut bê nghut ri. Haú mù luí, Garai Gasang lhoq tsûm tô é lé, byù gi, a lhoq kang sháng gaq." gâ ri.

<sup>7</sup> Haú hkûn, yhangmoq gi, "Haú lé nhîng, yuqgè rayuq gi, lhoq kang laiká za ká byi mù, yhangmyi lé wó nhang pyâm lhê ga, haí mù, Mosheq, hkunmó hkyô tô lhê l hú?" ga, Yhang lé dum taú myi akô.

<sup>8</sup> Haú mù, Yesuq gi, "A-nham sâng-hi mai gi, haú dông a nghut. Nghut kôlhang, nungmoq é myit nhiklum htân kô é yanmai, nungmoq é yhangmyi pé lé lhoq kang râ ahkáng, Mosheq byi tô é ru nghut lhê. <sup>9</sup> Ngò, nungmoq lé taí kôlé, sulàng lú é za a nghut jáng, yhumsing é yhangmyi lé kâng pyám mù, myiwe gotû dum hâng yu é sù ó yuq nghut kôle, su-myi lú é sù dut bê." ga, yhangmoq lé dum tû taí ri.

<sup>10</sup> Haú hkûn, haú chángzô pé gi, "Myi làng hkyô má haú dông ru nghut le gi, a yu le l háng je ge nyo ri." ga taí akô.

<sup>11</sup> Haú mù, Yesuq gi, "Yuq hkangmó gi, dang haú lé wó hap yu é a nghut, wó hkâm râ jeju wó é bang za sheq, wó hap yu é nghut lhê. <sup>12</sup> Byù ra-am gi, înú unghkaú mai yhang, yuqgè a jé gû hku lé lo é bang nghut akô; ra-am gi, góbâng èq kut é yanmai, yuqgè a jé dut byuq akô; ra-am nghut jáng, mauhkûng mingdán é matú, yuqgè a jé râ dông kut yu pyâm akô nghut ri. Shí hkyô lé wó hap yù sù gi, hap yù sháng gaq." ga dum taí ri.

*Zoshâng Wuì Eq Yesuq  
Mrk 10:13-16; Luk 18:15-17*

13 Hau htâng, Yesuq mai zoshâng wui htoq má loq ke mù, shimân byi sháng gaq ga, zoshâng wui lé Yhâng chyáng shuí lé lo akô. Haú chángzô pé kúm gi, haú shuí lé lô bang lé lhom tân hkûm akô nghut ri.

14 Nghut kôlhang, Yesuq gi, "Haú zoshâng wui lé, Ngá chyáng lé nhâng keq; yhangmoq lé hkâhkûm zing to kó; hkâsu mù gâ le, mauhkûng mingdán gi, haú sù é bâng é mingdán ru nghut lhê." ga taí kat ri. 15 Yhang gi, zoshâng wui htoq má loq ke shimân byi mù, haú jowò mai htoq ló bê nghut ri.

*Sùt Wó É Zorâm Rayuq É Hkyô*

*Mrk 10:17-31; Luk 18:18-30*

16 Byù rayuq gi, Yesuq chyáng lé jé mù, "Sarâ ê, ahtum abyuq é asak wó yû râ matú, ge é muzó haí kut ra râ lú?" ga myí ri.

17 Haú jáng, Yesuq gi, "Ge é hkyô eq séng luí, haí mù Ngo lé myí lhê lú? Ge é Sù gi, rayuq za nyi lhê. Nàng, asak dui é má wàng nau é nghut le gi, jep é tarâ pé lé cháng aq." ga tû taí ri.

18 Haú yuq gi, "Hká gû lé lú?" ga dum myi jáng, Yesuq gi, "'Byù hkâsat, su-myi hkâlú, hkâhkau, a teng a mán é saksé hkâhkám, 19 nángnu nángwa lé hkungga aq, ✧ ga le, 'náng gûng lé nàng chyitdap e su, náng é chyangnâm mà é bang lé le chyitdap aq. ✧ ga le bo tô ri." ga taí kat ri.

20 Haú hkûn, zorâm hpó haú gi, "Haú pé banshoq lé, ngò cháng bê nghut lhê; haí kut râ ashí lú?" ga dum taú myí ri.

---

✧ 19:19 Htoq Ló 20:12-16; Tarâ Pun 5:16-20 ✧ 19:19 Nhung 19:18

21 Yesuq gi, "Nàng, gumjup sù dut nau le gi, ló mù, nàng wó é sutzè pé lé ùng pyám luî, myùng bang lé byî pyám aq; haû jáng, nàng, mauhkùng htoq má sutzè wó râ nghut lhê; haû mù, Ngá htâng lé cháng aq." ga tâi ri.

22 Zorâm hpó haû gi, sutzè gyai wó sù nghut é yanmai, dang haû lé wó gyo jáng, gyai yhang myit a ngón é èq ló byuq bê nghut ri.

23 Hau htâng, Yesuq gi, Yhâng é chángzô pé lé, "Ngò, nungmoq lé teng za táí kôlé, sutzè wó bang gi, mauhkùng mingdán wó wâng râ gyai yhang wuî ri. 24 Hau htoq agó, Ngò, nungmoq lé táí kôlé, sutzè wó sù rayuq, Garai Gasâng é mingdán má wó wâng râ htoq, gola-uq radu âpno mai wó wang lai râ gi, je lui râ nghut lhê." ga tâi ri.

25 Haû chángzô pé gi, haû su gâ é lé wó gyo kôjáng, haû ru nghut le gi, ó yuq za hkyi yu é hui râ nghut lhê lú?" ga Yhang lé myî akô nghut ri.

26 Haú hkûn, Yesuq gi, yhangmoq lé wú kat mù, "Haú hkyô lé byù mai gi, wó kut râ a nghut; nghut kôlhang, Garai Gasang gi, lhunglhang lé wó kut é Sù nghut lhê." ga tâi ri.

27 Haú hkûn, Petruq gi, Yhang lé, "Ngamoq gi, wó é gû lhunglhang lé tô pyâm to luî, Náng htâng cháng bê nghut lhê. Ngamoq, haî wá wó râ nghut lhê lú?" ga myî kat ri.

28 Haû mù, Yesuq tâi táí é gi, "Ngò, nungmoq lé teng za táí kôlé, lhunglhang lé asik dum saî dut nhang é má, haû Byu Yhangzo gi, Yhâng é hpung-wup bo é hkohkâm-tanghkuq má zùng tô é hkûn,

Ngá htâng châng é bang nungmoq le, hkohkâm-tanghkuq raxe í lhûm htoq má zùng to kômù, Israe-laq amyû raxe í hú lé jéyáng kó râ nghut lhê. <sup>29</sup> Ngá é yanmai, yhumsing é yhûm, nhiktâng wuì, înu îwa, zo dù wuì eq yò pé rajung jung lé tô pyâm tô é sù ó yuq nghut kôle, rashô tú akyû myo jat shoq wó râ nghut é htoq agó, ahtum abyuq é asak le, wó yû râ nghut lhê. <sup>30</sup> Nghut kôlhang, hí nghut nyi é bang myo myo gi, htâng gyó byuq kó râ nghut mù, htâng gyó nyi bang yuq gi, hí bekô râ nghut lhê.

## 20

### *Tsibiyiq Hkyâm Mû Zui Bang Lé Dangtú Yu É Hkyô*

<sup>1</sup> Hkâsu mù gâ le, mauhkûng mingdán gi, yhumsing é tsibiyiq hkyâm má mû zui nhâng râ langchyang ê lûng râ ga, napsûn noq le htoq e ló é hkyâm yhumsing eq du ri. <sup>2</sup> Yhang gi, ra-nyí é matú denari rachap byi râ dông, haú bang eq myit huí yù mù, yhangmoq lé, yhâng é tsibiyiq hkyâm má nhang hâng kat ri.

<sup>3</sup> Napkyó gau hkyíng\* kô má, yhang gi, htoq e ló le, hai mú le a kut é za, gài má yap tô é bang ra-am lé ê myang ri. <sup>4</sup> Haú mù, yhang gi, haú bang lé, 'Nungmoq le, ngá é hkyâm má mû ê zui keq; byi âng é ahpau, ngò, nungmoq lé byi râ nghut lhê.' ga tái jáng, yhangmoq gi, e ló bekô nghut ri.

<sup>5</sup> Hau htâng, yhang gi, raxe í hkyíng má le, myin-htâng sum hkyíng kô má le, dum htoq ê mù, haú eq

---

\* **20:3** Chyúmdang ra-am má, sum hkyíng ga chung tô é gi, Yudaq byu pé é ahkyíng nghut lhê. Yudaq byu pé é ahkyíng gi, napkyó hkyuq hkyíng mai nghap hi lhê.



rajung za langchyâng pé ê lung kat ri. <sup>6</sup> Myinhtâng ngo hkyíng kô má, yhang dum htoq e ló wú le, góbang ra-am le yap tô bum é lé, ê myâng mù, haú bang lé, 'Nungmoq gi, haí le a kut é za, ra-nyí buí haí mù shí má yap tô bum akô lú?' ga myí jáng, <sup>7</sup> haú bang gi, 'Ngamoq lé, ó yuq èq le a lùng kô é yanmai nghut lhê.' ga tũ taí akô.

Haú hkũn, yhang gi, 'Nungmoq le, ngá é hkyâm má mù ê zui keq.' ga taí ri.

<sup>8</sup> Myinhtâng jé jáng, tsibiyiq hkyâm yhumsîng gi, yhâng é mù shuí u sũ lé, 'Haú langchyâng pé lé jì yù mù, je htâng má lung yu é bang mai hí luí, sâng-hí lung yu é bang jé shoq, mù zui hpau byi aq.' ga taí ri.

<sup>9</sup> Myinhtâng ngo hkyíng má mù wàng bang le, denari rachap chap wó yu bum akô. <sup>10</sup> Haú mù, je hí má mù wàng bang gi, yhangmoq je myo wó nhô ngam akô. Nghut kôlhang, yhangmoq le, rayuq denari rachap chap za wó akô nghut ri. <sup>11</sup> Yhangmoq gi, haú myhó za wó yu bùm kô é yanmai, haú hkyâm yhumsîng lé, <sup>12</sup> 'Shí bang gi, je htâng má mù lé wâng mù, nayí rahkum za mù zui kôlhang, nàng gi, ra-nyí buigyùm chap buí htân yò má mù zui é bang ngamoq eq rajung za byí ri.' ga mara hũn dang taí akô.

<sup>13</sup> Nghut kôlhang, haú hkyâm yhumsîng gi, haú bang mâ é rayuq lé, 'Buinùm hpó ê, ngò, nang lé a tará é dông kut é a nghut. Denari rachap byí râ nghú, nàng eq ngò myit huí to bê a nghut lú?' <sup>14</sup> Nàng wó âng é lé yu chũng mù, ló aq. Je htâng má mù lé wang é sũ lé le, nang lé byí é myhó, ngò byí

nau ri. <sup>15</sup> Ngá é ngùn lé, ngò kut nau é su a ge kut lhu? Ngò, ge é kut le, nàng manôn ri lhu?" ga tâ ri.

<sup>16</sup> Haû mù luî, htâng gyó nyî bang gi, hí bekô râ nghut mù, hí nghut nyî bang gi, htâng gyó byuq kó râ nghut lhê." gâ ri.

*Yesuq Gi, Yhang Shî Râ Hkyô Lé Dum Taî Ri*  
*Mrk 10:32-34; Luk 18:31-34*

<sup>17</sup> Ahkuî, Yesuq gi, Yerusalem wà mó shut doq ló nyi é u lé, haû chángzo raxe í yuq lé, gotû kut wut yù mù, <sup>18</sup> "Nga-nhúng gi, Yerusalem wà mó shut doq ló nyi lhê; haû Byu Yhangzo gi, hkyangjong agyi pé eq tará sará pé é loq má ap byî pyâm é hui râ nghut lhê; haû bang gi, Yhang lé, shî râ mara byi kó râ nghut é htoq agó, <sup>19</sup> jóng pyâm é, nhuq bat é eq tapzîng má jén sat pyâm é hui râ matú, haû tûngbaù pé é loq má ap pyám kó râ nghut lhê. Nghut kôlhang, Yhang gi, sum nyî nghû râ buinyî má, lhoq dui toq é dum hui râ nghut lhê." ga tâ ri.

*Zô Nhik Matú Înu Êq Dung Byî É Hkyô*  
*Mrk 10:35-45*

<sup>20</sup> Hau htâng má, Zebedi é yhangzô nhiktang é yhângnu gi, yhangzô nhik eq rahá jé lé lô kômù, rajung dung râ matú, Yesuq é hí má hkyihput htug nyi ri.

<sup>21</sup> Haû mù, Yesuq gi, "Nàng, haî ô nau ri lhu?" ga yhang lé myi jáng, yhang gi, "Náng é mingdán má, shî ngá zô nhiktang lé, Náng é loqyò hkyam má rayuq, loqpaî hkyam má rayuq kut, zùng râ ahkáng byi laq." ga tâ ri.

<sup>22</sup> Haú hkûn, Yesuq gi, "Nungnhik haí dúng nyi é lé, nungnhik a sé kó nghut ri. Ngò shuq râ góm† lé, nungnhik wó shuq kó râ l hú?" ga myi jáng, yhangnhik tâng gi, "Wó shuq lhê." ga tâ taí akô nghut ri.

<sup>23</sup> Haú mù, Yesuq gi, yhangnhik lé, "Ngò shuq râ góm lé, nungnhik shuq ra kó râ za nghut lhê. Nghut kôlhang, Ngá é loqyò, loqpaí hkyam má zùng râ ahkáng lé gi, Ngò byi jung a nghut. Jowò haú pé gi, Ngá Wa hen to byi bâng é matú za ru nghut lhê." ga tâ ri.

<sup>24</sup> Gotû chángzo raxê yuq gi, haú hkyô lé wó gyo kôjáng, haú nhiktâng lé nhik-yô akô nghut ri. <sup>25</sup> Haú mù, Yesuq gi, yhangmoq banshoq bang lé wut tsíng yù luí, "Túngbaù pé lé uphkan é ga bang gi, túngbaù pé lé up zô nyi kô é hkyô lé le, haú eq rajung za, yhangmoq é ming up suwún wuí le, yhumsing é ahkáng ayá lé chùng mù, up zô nyi kô é hkyô lé le, nungmoq sê lhê. <sup>26</sup> Nungmoq chyáng gi, haú su a dut kó sháng gaq; haú Byu Yhangzo lháng gi, dojaú é lé hkam yù râ matú jé lé é a nghut é za, dojaú râ matú eq byù myo myô é matú, shíhtaí gunglik hkungga dông, Yhâng é asak lé byi pyám râ matú sheq, jé lé é ru nghut é su, <sup>27</sup> nungmoq má, byù mó dut naù sù ó yuq nghut kôle, nungmoq é dui-nhâng zoshâng dut ra râ nghut lhê. <sup>28</sup> Hau htoq agó, nungmoq má ushuq dut naù sù ó yuq nghut kôle, nungmoq é jùn dut ra râ nghut lhê." ga tâ ri.

*Myoqjit Í Yuq Myoq Dum Myang É Hkyô  
Mrk 10:46-52; Luk 18:35-43*

† **20:22** Góm gà é gi, Yesuq, jamjau hui râ hkyô eq shí râ hkyô lé, taí nau é nghut lhê.

<sup>29</sup> Yesuq eq Yhâng é chángzô pé gi, Yerihko myuq mai htoq ló nyî kô é hkûn, byù moq mó gi, yhangmoq é htâng má châng e ló bum akô. <sup>30</sup> Haú hkyô yàm má zung tô é myoqjit í yuq gi, Yesuq laî ló nyi é hkyô lé wó gyo kôjáng, "Dawiq é Yhangzo, Yhumsîng ê, ngá-nhik lé shogyô yù laq ô!" ga, wut garû kat akô nghut ri.

<sup>31</sup> Byù moq mó gi, yhangnhik zîm byuq râ matú tân hkúm kôlhang, yhangnhik gi, "Dawiq é Yhangzo, Yhumsîng ê, ngá-nhik lé shogyô yù laq ô!" ga, je riyhang htê mó èq wut garû kat akô nghut ri.

<sup>32</sup> Haú mù, Yesuq gi, yap kat mù, "Ngò, nungnhik lé haî kut byi râ ô nau akô l hú?" ga, yhangnhik lé wut myî kat ri.

<sup>33</sup> Haú hkûn, yhangnhik gi, "Yhumsîng ê, ngá-nhik myoq myâng nau ri." ga tú taî akô.

<sup>34</sup> Yesuq gi, yhangnhik lé wú shogyo luî, yhangnhik é myoqjí má ê záng byî ri. Haú hkûn jáng, yhangnhik gi, myoq wó myâng kômù, Yhâng htâng cháng bekô nghut ri.

## 21

*Yesuq, Yerusalem Wà Mó Má Wang E Ló É Hkyô  
Mrk 11:1-11; Luk 19:28-38; Yhn 12:12-19*

<sup>1</sup> Yesuq eq Yhâng é chángzô pé gi, Yerusalem wà mó eq chyâng lo nyî kô é hkûn, Tsanlun Bùm mâ é Bethpage wà má jé ló kôjáng, Yesuq gi, chángzo í yuq lé, <sup>2</sup> "Nungnhik, hí mâ é wà má è keq; wà haú má, logúng zîng radu lé, logúng zo eq rahá tuî to lánq é lé, ê myâng kó râ nghut lhê; haú lé hpyi yù mù, Ngá chyáng she lò keq. <sup>3</sup> Byù rayuq yuq, nungnhik lé rajung jung gâ lò jáng, 'Shî í du lé, haú

Yhumsîng chûng râ ri.' gâ nghû tû taí keq; haû jáng, yhang, radá dâm nhâng byi râ nghut lhê." ga Yesuq taí luí, nhang kat ri.

<sup>4</sup> Haû gi, myiqhtoi dang lhoq dik râ matú dut lo é nghut ri. <sup>5</sup> Myiqhtoi dang haû gi,

"Zi-un byizo\* lé, shî su nghû keq; 'Wú aq, náng é hkohkâm gi, nú-nhâm é myit eq logúng htoq má ji mù, nghut bê, logúng zo htoq má ji mù, náng chyáng lé lô bê nghut ri.'"☆

gâ ri.

<sup>6</sup> Haû chángzô nhik gi, e ló mù, Yesuq taí kat é eq rajung za ê kut bekô nghut ri. <sup>7</sup> Yhangnhik gi, logúng me lé she lò mù, yhangnhik é buhîng pé lé, haû logúng mê é htoq má ke byi kôjáng, Yesuq gi, doq jî ri. <sup>8</sup> Byù moq mó mâ é myo myo gi, yhangmoq é buhîng lé, hkyô má hkyut hkang byi akô; ra-am gi, mhandíng pé lé zân hkyô yù mù, hkyô má hkang byi akô nghut ri. <sup>9</sup> Yhâng é hí má htâng má châng sô nyi bum é bang gi,

"Dawiq é Yhangzo gi, hosana† nghut nyi sháng gaq ô!"

"Haû Yhumsing é myìng mai jé lé lô Sû gi, hkungsô wó nyi sháng gaq ô!"☆

"Htoq tsáng myhâng má, hosana nghut nyi sháng gaq ô!"

ga luí, taí garû bum akô nghut ri.

---

\* **21:5** Zi-un byizo gâ é lichyúm gi, Yerusalem byu pé gâ é nghut lhê. ☆ **21:5** Zhk 9:9 † **21:9** Hebre dang má, hosana gâ é gi, "ahkuí hkyi yù laq" gâ é nghut lhê. Nghut kôlhang, bun zo 9 má gi, hkyá-on dang đông chung é nghut lhê. ☆ **21:9** Hkyá-on 118:26

10 Yesuq, Yerusalem wà mó má wang ló é hkûn, rawà gón é bang gi, gabyông lo bùm kômù, "Shí yuq gi, ó wá nghut lhê lhà?" ga luí, myi lhùm bum akô.

11 Haú hkûn, byù moq mó gi, "Shí yuq gi, Galile mau, Nazaret wà byù Yesuq gâ é myiqhtoi nghut lhê." ga taí akô nghut ri.

*Yesuq, Noqkuq Yhùm Lé Lhoq Sansêng Pyâm É Hkyô*

*Mrk 11:15-19; Luk 19:45-48; Yhn 2:13-22*

12 Yesuq gi, noqkuq yhùm má wang ê mù, haú mâ é zè ung zè wuì kut nyi é bang banshoq lé, hkat htoq pyám luí, ngùn htaí zo bâng é siboí pé eq hpûngkyui ung zo bâng é tanghkuq pé lé, tu mhuc pyám byí ri. 13 Haú hkûn, Yhang gi, "'Ngá yhùm gi, kyûdung yhùm ga râ nghut lhê.' ✧ ga kê to kôlhang, nungmoq gi, jowò shí lé 'damaq hkyûng' ✧ kut nyi akô." ga, yhangmoq lé taí ri.

14 Yesuq, noqkuq yhùm má nyi tô é hkûn, my-oqjit bang eq hkyí hten bang Yhâng chyáng lé lô kômù, Yhang gi, haú bang lé lhom lhoq gê byí ri.

15 Nghut kôlhang, hkyangjong agyi pé eq tarâ sará pé gi, Yhang kut é mauhpo muzó pé lé le, "Dawiq é Yhangzo gi, hosana nghut sháng gaq." ga, noqkuq yhùm má zoshâng wuì garû nyi bùm kô é lé le, myàng kôjáng, wú nhik-yô bum akô nghut ri.

16 Haú mù, yhangmoq gi, "Zoshâng shí bang haí taí nyi kô é lé, Nàng wó gyô lhê lhú?" ga, Yesuq lé myi kôjáng, Yhang gi, "Wó gyô ri. Nungmoq gi,

'Zoshâng wuì eq nyheqnú pê é nhut mai hkya-on kungtôn râ matú, nàng lajâng to bê nghut ri.'<sup>☆</sup>

ga kê tô é lé, Chyúmdang má a nghap wú kó l hú?" ga yhangmoq lé tái ri.

<sup>17</sup> Hau htâng má, Yhang gi, haú bang lé nyhi to luí, wà hkaú mai htoq ló mù, Behtani wà má ê jé luí, haú myîn, haú má bíng yu ri.

*Maihpáng Gâm Nyhuí Kyuq Shi Byuq É Hkyô*  
*Mrk 11:12-14, 20-24*

<sup>18</sup> Yhang gi, htang napkyó noq le, Yerusalem wà mó shut dum taú ló é hkûn, hkyô má zòmut hui bê nghut ri. <sup>19</sup> Haú mù, Yhang gi, hkyô yàm má yuq tô é maihpáng gâm lé myang kat mù, chyâng e wú le, ahaq mai lai luí, haí lé le a myàng nghut ri. Haú mù, Yhang gi, shigâm haú lé, "Nàng má, hkâ-nhám le ashi a zui sháng gaq." ga tái kat ri. Haú hkûn jáng, agàm haú gi, nyhuí kyuq shi ló byuq bê nghut ri.

<sup>20</sup> Haú chángzô pé gi, haú lé myàng kôjáng, maú byuq kômù, "Maihpáng gâm shî gi, haí mù haú-í hân nyhuí kyuq shi ló l hê l hâ?" ga myí akô.

<sup>21</sup> Yesuq gi, "Ngò, nungmoq lé teng za tái kôlé, nungmoq, úng-âng é myit a bo é za, lumjíng kô é nghut le gi, maihpáng gâm má Ngò kut é muzó lé, nungmoq wó kut kó râ nghut é htoq agó, bùm shî lé, 'Htot mù, wuimau má ló gyó wâng aq.' ga tái jáng, tái é eq rajung za dut râ nghut l hê. <sup>22</sup> Nungmoq, lumjíng myit èq dung kô é nghut jáng, haí dúng le le wó yú kó râ nghut l hê." ga tũ tái ri.

---

<sup>☆</sup> **21:16** Hkya-on 8:2

*Yesuq É Ahkáng Ayá Lé Myî Chyam É Hkyô*

*Mrk 11:27-33; Luk 20:1-8*

<sup>23</sup> Yesuq gi, noqkuq yhûm wàng hkaû má wang ê mù, mhoqshit nyi é hkûn, hkyangjong agyi pé eq mingbyu é suwún wuî gi, Yhâng chyáng lé jé kômù, "Hai ahko ahkâng èq, Nàng, shí pé lé kut nyi lê lhu? Ahko ahkáng shî, Nang lé ó yuq byî é lhu?" ga myî akô.

<sup>24</sup> Haú hkûn, Yesuq gi, "Ngò le, nungmoq lé rajung myî wú kôlé, nungmoq wó tû taí kô é nghut jáng, hai ahko ahkâng èq, Ngò, shí pé kut é hkyô lé taí kyo râ nghut lê. <sup>25</sup> Yohan byî é bapisma gi, ó yuq é ahko ahkáng mai nghut lê lhu? Mauhkûng mai lhu? A nghut jáng, byu chyáng mai lhu?" ga taú myî kat ri.

Haú hkûn, yhangmoq, chôm hpyê lhum kô é gi, "'Mauhkûng mai nghut lê.' nghú, nga-nhúng taí jáng le, 'Haú nghut le nhîng, haí mù, yhang lé a lumjîng kô é lhu?' ga râ nghut; <sup>26</sup> 'Byu chyáng mai nghut lê.' nghú jáng le, yhangmoq lhunglhâng bang gi, Yohan lé, myiqhtoi rayuq ga lumjîng bûm kô é nghut lê yanmai, haú bang lé, nga-nhúng gyuq râ lê nghut." gâ akô.

<sup>27</sup> Haú mù, yhangmoq gi, Yesuq lé, "Ngamoq a sé." ga tû taí akô.

Haú hkûn, Yesuq gi, "Haú jáng, Ngò le, hai ahko ahkâng èq shí pé kut é hkyô lé, nungmoq lé a taí kyo." ga, yhangmoq lé taí ri.

*Yuqzô Nhiktâng Lé Dangtú Yu É Hkyô*

<sup>28</sup> Yesuq xoq taí é gi, "Nungmoq hkâsu wó myit akô lhu? Byù rayuq gi, yuqzo í yuq wó ri. Yhang gi, ko sù yuq chyáng ê mù, 'Ngá zo ê, nàng, hkû-nyí



tsibiyiq hkyâm má mù ê zui aq.' ga taí jáng, <sup>29</sup> yuqzo haû gi, 'Ngò a kâm ê.' ga tù taí ri; nghut kôhang, htâng má, yhang gi, myit dum lhîng mù, ê bê nghut ri.

<sup>30</sup> Hau htâng, yhângwa gi, yhang zo tiq sù yuq chyáng ê mù, rajung za ga ê dum taí jáng, yuqzo haû gi, 'Ê râ, âwa!' ga yín yû kôhang, a ê kut ri.

<sup>31</sup> Haú nhiktâng mâ é hká yuq sheq, yhângwa ô nau é hkyô lé kut sù nghut ri lhú?" gâ ri.

Haú hkûn, yhangmoq gi, "Ko sù nghut ri." ga tù taí akô.

Haû mù, Yesuq gi, yhangmoq lé, "Ngò, nungmoq lé teng za taí kôlé, kang guq bang eq shiwa myhî pé gi, Garai Gasâng é mingdán má, nungmoq a wàng shimá, wang ló nyi bùm kó râ nghut lhê.

<sup>32</sup> Hkâsu mù gâ le, Yohan gi, nungmoq chyáng lé jé mù, dingmán hkyô lé tûn shit kôhang, nungmoq gi, yhang lé a jíng kut akô nghut ri; nghut kôhang, haú kang guq bang eq shiwa myhî pé gi, yhâng dang lé jíng akô nghut ri. Nungmoq gi, haú hkyô lé myang é nghut kôhang, myit a lhîng kô é htoq agó, yhang lé a lumjín shi kó nghut ri.

*Tsibiyiq Hkyâm Saí Bang Lé Dangtú Yu É Hkyô  
Mrk 12:1-12; Luk 20:9-19*

<sup>33</sup> Gotû dangtú lé gyô wú shi keq; hkyâm yhumsîng rayuq gi, tsibiyiq hkyâm ralhûm saí to mù, lhînghkyuq kyâm to luî, tsibiyiq wing pyik htoq râ donghkong dù to mù, machya ralhûm saí tô ri. Hau htâng, yhang gi, hkyâm haú lé, hkyâm saí zo bâng chyáng ngho byî to mù, gó ming shut e ló byuq bê nghut ri. <sup>34</sup> Kyôshu yoq jé jáng, yhang gi, yhang eq sêng é tsibiyiq shi ê yû râ matú, yhâng é

dui-nhâng zoshâng wuì lé, haû hkyâm saí zo bâng chyáng nhang kat ri.

<sup>35</sup> Haû hkyâm saí zo bang gi, dui-nhâng zoshâng wuì lé, lhom chyup yû kômù, rayuq lé gi, lhom nhuq bat, rayuq lé gi, lhom sat pyám, rayuq lé gi, luqgok èq lhom dú sat pyám, kut akô nghut ri.

<sup>36</sup> Hau htâng má, yhang gi, hî dam lhê htoq je myo shoq gotû dui-nhâng zoshâng wuì lé dum nhang kat le le, haû hkyâm saí zo bang gi, hí lhê bang lé su lhom dum kut akô nghut ri. <sup>37</sup> Ló htáng má, yhang gi, 'Ngá zo lé gi, yhangmoq lhom hkungga kó râ nghut lhê.' ga, yhang zo lé, haú bâng chyáng nhang kat ri.

<sup>38</sup> Nghut kôhang, haû hkyâm saí zo bang gi, yhang zo lé myàng kôjáng, 'Shí yuq gi, silí wunlí sing yù râ sù nghut lhê; lé keq, yhang lé sat pyám mù, yhâng é silí wunlí lé yu pyám byi sháng.' ga, rayuq eq rayuq taí lhûm bum akô nghut ri. <sup>39</sup> Haû mù, yhangmoq gi, yhang lé, chyup yû luí, hkyâm shinggan shut dú htoq kômù, sat pyám bekô nghut ri.

<sup>40</sup> Haû mù luí, tsibiyiq hkyâm yhumsîng lé jé é hkûn lé, haû hkyâm saí zo bang lé hkâsu kut nhô ngam akô lhú?" ga Yesuq myî ri.

<sup>41</sup> Haú hkûn, haû hkyangjong agyi pé eq suwún wuî gi, "Haû agè ashop bang lé gi, agè ashop é đông sat pyám râ nghut lhê. Haû tsibiyiq hkyâm lé gi, kyô shu yoq má, yhâng é gambùm lé byi râ bang lé, htot ngho byî pyám râ nghut lhê." ga, tû taí akô nghut ri.

<sup>42</sup> Haû jáng, Yesuq dum taí é gi, "Chyúmdang má, 'Yhûm saí bâng èq hkyin htoq pyâm é luqgok gi, htungchyûn mâ é ahkyak dik é luqgok dut bê.

Shí hkyô gi, haû Yhumsîng kut é nghut luî, nga-nhûng é myoq hí má mauhpo dut bê nghut ri.†

ga bo tô é lé, nungmoq a nghap wú kó lú?

<sup>43</sup> Haû mù, Ngò, nungmoq lé taí kôlé, Garai Gasâng é mingdán lé, nungmoq chyáng mai yù mù, hau é ashi wó zui râ byuhú lé byî pyám râ nghut lhê. <sup>44</sup> Luqgok haú má gyó záng é sù gi, gyuî gyop byuq râ nghut lhê. Luqgok hau èq gyó nhê záng é sù le, nhê pyeq pyâm é hui râ nghut lhê." gâ ri.

<sup>45</sup> Hkyangjong agyi pé eq Hparishe pé gi, haû Yesuq taí é dangtú pé lé wó gyo kôjáng, yhangmoq lé taí nyi é hkyô lé, sê gyô akô nghut ri. <sup>46</sup> Haû mù, yhangmoq gi, Yhang lé chyup yû râ hkyô ho nyi akô; nghut kôlhang, byu pé gi, Yhang lé, myiqhtoi rayuq ga myit lum to kô é yanmai, yhangmoq gi, haú bang lé gyuq akô nghut ri.

## 22

### *Myiháng Poî Dangtú Pé*

#### *Luk 14:15-24*

<sup>1</sup> Yesuq, dangtú pé dông yhangmoq lé dum taí é gi, <sup>2</sup> "Mauhkûng mingdán gi, yhumsîng yhangzô é matú myiháng poî hen lajâng to byî é hkohkâm rayuq eq du ri. <sup>3</sup> Hkohkâm hpó haû gi, yhang ji tô é bang, haû poî má lé lô râ matú, yhâng é dui-nhâng zoshâng wuì lé ê tsing taí nhang ri; nghut kôlhang, haú bang gi, a lé kut akô nghut ri.

<sup>4</sup> Hau htâng má, yhang gi, gotû dui-nhâng zoshâng wuì lé, 'Ngò haî le hen to bê; ngá é no eq xu-myum é gau-nyhaú pé lé sat mù, jung hkgangmó

† 21:42 Hkya-on 118:22-23

rì rì nghut to bê. Myiháng poí má lé lò keq hkoi nghû, haû ji tô é bang lé ê táí keq.' ga pyîng luî, nhang kat ri.

<sup>5</sup> Nghut kôlhang, haû ji to huî é bang gi, dang haú lé haî su a gyô ngàm kômù, rayuq gi, yohtung shut, rayuq gi, hpugá dinggá hkyô shut é byuq bekô nghut ri. <sup>6</sup> Ra-am dum nghut jáng, yhâng é dui-nhâng zoshâng wuì lé lhom chyup yû kômù, nhuq bat luî, sat pyám byî akô nghut ri. <sup>7</sup> Haû mù, hkohkâm gi, nhikjum yo luî, yhâng é gyezô pé lé, haû byù sat bang lé sat pyám nhâng mù, yhangmoq é myuq lé nyhê hkyô pyám nhang ri.

<sup>8</sup> Hau htâng má, yhang gi, yhâng é dui-nhâng zoshâng wuì lé, 'Myiháng poí gi, rì rì nghut to bê; nghut kôlhang, haû ji to huî é bang gi, lé râ a gingdán kó nghut ri. <sup>9</sup> Haû mù, hkyô kang pé má ê luî, myang é yuq hkangmó lé, poí má lé râ matú ê jì keq.' ga táí ri. <sup>10</sup> Haû jáng, dui-nhâng zoshâng haú bang gi, hkyô kang pé má htoq ê luî, myang é byù gè byù gang lunglhang lé ji tsîng yù kô é nghut mù, myiháng poí gi, bíng pé zung byíng bùm bê nghut ri.

<sup>11</sup> Nghut kôlhang, bíng haú bang lé, hkohkâm hpó, lé wang wú é hkûn, myiháng poí wàng hking a wut tô é byù rayuq lé, yhang byu-myang ri. <sup>12</sup> Haû mù, yhang gi, haú yuq lé, 'Buinùm hpó ê, nàng gi, myiháng poí wàng hking le a wut é nhîng, shí má hkâsu kut wang lo é lhú?' ga myi jáng, haú yuq gi, haî le a dat tû táí lo nghut ri.

<sup>13</sup> Haú hkûn, hkohkâm hpó gi, yhâng é dui-nhâng zoshâng wuì lé, 'Yhâng é hkyî loq má tui luî, haû ngaubyi ngàu nhap eq zuì kyik kyik shoq hpuzô

nyì râ nghut é shinggan mauchut hkaû má, dú htoq pyám keq.' gâ ri.

<sup>14</sup> Hkâsu mù gâ le, byù myo myo gi, ji yu é hui kôlhang, hkyin yù huí é bang gi, shaû ri." gâ ri.

*Kehtaq Lé Kang Kat Byî É Hkyô*  
*Mrk 12:13-17; Luk 20:20-26*

<sup>15</sup> Hau htâng má, Hparishe pé gi, htoq ló kômù, Yhâng é dang pé má mara chyup râ hpaqchyî dâ akô nghut ri. <sup>16</sup> Yhangmoq gi, Herut é byu pé eq rahá, yhangmoq é chángzô pé lé, Yesuq chyáng nhang kat akô. Haú bang gi, Yesuq chyáng lé jé kômù, "Sarâ ê, Nàng gi, tengmán sù nghut é eq, Garai Gasâng é hkyô lé, tengmán é dông mhoqshit é sù nghut é lé le, Nàng gi, ó haî ga râ lé le haî su a ngàm sù nghut é yanmai, ó yuq é myoqdong lé le a tê byi sù nghut é hkyô lé le, ngamoq sê lhê. <sup>17</sup> Haû mù, hkoséng Kehtaq lé kang kat byî le gi, ge lhê lhú? A gè lhú? Nàng, hkâsu wó myit é hkyô taî kyô wú aq." ga taî akô nghut ri.

<sup>18</sup> Yesuq kúm gi, yhangmoq é agè ashop hkyô lé sé byi mù, "Gegùn labyoq kut bang ê, nungmoq gi, haî mù, Ngo lé lé chyam wú akô lhú? <sup>19</sup> Kang kat râ ngùn htingchap rachap, Ngo lé byî wú keq." ga taî kat ri. Haú hkûn, yhangmoq gi, denari rachap yù byî akô. <sup>20</sup> Haû mù, Yhang gi, yhangmoq lé, "Shí má, ó yuq é alhô eq masat laiká dap tô ri lhú?" ga myi jáng, <sup>21</sup> yhangmoq gi, "Kehtaq é nghut ri." ga tû taî akô. Haû mù, Yhang gi, yhangmoq lé, "Kehtaq é lé gi, Kehtaq lé byi keq; Garai Gasâng é lé gi, Garai Gasang lé byi keq." ga taî kat ri.

<sup>22</sup> Haû su gâ é lé, wó gyo kôjáng, haú bang gi, maú byuq kômù, Yhâng chyáng mai htoq ló byuq bekô nghut ri.

*Saduke Pé, Yesuq Lé Myî Chyam É Hkyô*

*Mrk 12:18-27; Luk 20:27-40*

<sup>23</sup> Haú nyí má yhang, haú dum dui toq hkyô a joq gâ é Saduke pé gi, Yesuq chyáng lé jé kômù, dangmyi lé myî akô. <sup>24</sup> Yhangmoq myi kô é gi, "Sarâ ê, 'Myiwe wó é byù rayuq gi, zo dù a dap é za shi byuq é nghut jáng, yhanggu gi, yhangmâng é awut ashín xoq byi râ matú, yhâng rhat lé chui gon ra râ nghut lhê.' ga, nga-nhúng lé, Mosheq taí tô é nghut lhê. <sup>25</sup> Hí hpyang lé, ngamoq chyáng, gumang nhiktâng wùi nyhit yuq nyi akô. Lagám yuq gi, myiwe yù luí, zo dù a dap é za yhangmyi lé shi lhuí pyâm to bê nghut ri. <sup>26</sup> Haú eq rajung za, Lanong, Lalaq mai Lahkâ jé shoq, chuimó haú lé gon luí, ó le zo dù a dap é za shi ló byuq bùm bekô nghut ri. <sup>27</sup> Ló htáng má, myiwe myhí haú le châng shi ló byuq bê nghut ri. <sup>28</sup> Haú mù luí, haú dum dui toq é buinyì má, myiwe myhí haú gi, haú nhiktâng wùi nyhit yuq mâ é hká yuq é yhangmyi nghut râ lhuí? Hkâsu mù gâ le, yhang gi, haú nhiktâng wùi banshoq bâng é yhangmyi dut wú bê sù nghut ri." gâ akô.

<sup>29</sup> Haú hkûn, Yesuq gi, yhangmoq lé, "Nungmoq gi, Chyúmdang eq Garai Gasâng é wum-o a-tsam lé a sé kô é yanmai, hkyô nghoq akô nghut ri. <sup>30</sup> Haú dum dui toq é buinyì má gi, myi byi myi yú hkyô joq lo râ a nghut; yhangmoq gi, mauhkûng htoq mâ é maumang lagyô pé su dut byuq kó râ nghut lhê. <sup>31</sup> Shi é mai dum dui toq bang eq

séng luî, <sup>32</sup> Garai Gasang gi, 'Ngò gi, Abraham é Garai Gasang, Isak é Garai Gasang, Yakup é Garai Gasang nghut lhê.'✧ ga, nungmoq lé tai tô é lé, nungmoq a nghap wú kó l hú? Yhang gi, shi to bâng é Garai Gasang a nghut; dui nyi bâng é Garai Gasang sheq ru nghut lhê." ga tai ri.

<sup>33</sup> Byù moq mó gi, dang haû wó gyo kôjáng, Yhang mhoqshit é hkyô lé maú byuq bum akò nghut ri.

### *Ahkyak Dik É Jep É Tarâ*

*Mrk 12:28-34; Luk 10:25-28*

<sup>34</sup> Saduke pé lé, Yesuq lhoq zîm pyâm é hkyô lé, Hparishe pé wó gyo kôjáng, yhangmoq gi, Yesuq chyáng zup zîng lé bum akò. <sup>35</sup> Yhangmoq má bo é tarâ sará rayuq gi, Yesuq lé chyam wú é dông, <sup>36</sup> "Sará ê, jep é tarâ má, hká lhum gi, je ahkyak dik lhê l hú?" ga myî ri.

<sup>37</sup> Haû mù, Yesuq gi, "'Haû Yhumsîng náng é Garai Gasang lé, náng é myit nhiklhum banshoq, náng é asak woi-nyí lhum gón, nàng myit é hkyô banshoq èq, chyitdap râ lhê.'✧ gâ é nghut lhê.

<sup>38</sup> Tarâ haû gi, je hí lhum eq je ahkyak dik é lhum nghut lhê. <sup>39</sup> Hau htang lhum le haû eq du é nghut mù, 'Náng gûng lé nàng chyitdap é su, náng é chyangnâm mâ é bang lé le chyitdap aq.'✧ gâ é nghut lhê. <sup>40</sup> Tarâ haû í lhum gi, jep é tarâ banshoq eq myiqhtoi laiká banshoq é dangchyûng nghut lhê." ga, yhang lé tai kat ri.

### *Hkrisduq Gi, Ô Yuq É Yhangzo?*

*Mrk 12:35-37; Luk 20:41-44*

---

✧ 22:32 Htoq Ló 3:6 ✧ 22:37 Tarâ Pun 6:5 ✧ 22:39 Nhung 19:18

<sup>41</sup> Hparishe pé zup zîng to kô é hkûn, Yesuq gi, yhangmoq lé, <sup>42</sup> "Nungmoq gi, Hkrisduq eq séng luî hkâsu myit ngam akô lhú? Yhang gi, ó yuq é yhangzo nghut lhê lhú?" ga myi jáng, yhangmoq gi, "Dawiq é yhangzo nghut ri." ga tâ taî akô.

<sup>43</sup> Haû mù, Yhang gi, yhangmoq lé, "Haû hkûn, Dawiq gi, Woi-nyí dông mai, Yhang lé, 'Yhumsîng' ga, haî mù wut lhê lhú? Hkâsu mù gâ le, Dawiq taî é gi,

<sup>44</sup> 'Haû Yhumsîng Garai gi, ngá é Yhumsîng lé, "Ngò, náng é gumlau gye pé lé, náng é hkyiwa ô má tô pyâm é hkyíng jé shoq, Ngá é loqyo hkyam shut zung nyi shi aq." ga tâ ri. <sup>45</sup> Haû mù, Dawiq yhang lháng, Hkrisduq lé, 'Yhumsîng' gâ é nghut le gi, yhangzo za hkâsu ge nghut râ lhú?" ga tâ ri. <sup>46</sup> Haû mù, ó yuq le, dang rahkun lháng a wó tâ taî lo kô é nghut mù luî, haû nyí mai, ó yuq lháng Yhang lé dangmyi a wám myi lo kó nghut ri.

## 23

*Tarâ Sará Pé Eq Hparishe Pé Lé Sidiq Râ Hkyô*  
*Mrk 12:38-40; Luk 11:37-52; 20:45-47*

<sup>1</sup> Hau htâng, Yesuq gi, byù moq mó eq Yhâng é chángzô pé lé taî é má, <sup>2</sup> "Tarâ sará pé eq Hparishe pé gi, Mosheq é tanghkuq má zung akô. <sup>3</sup> Haû mù, yhangmoq mhogshit é hkyô chângjup lé, nungmoq châng kut ra kó râ nghut lhê. Nghut kôlháng, yhangmoq kut é dông gi, hkâkut kó; hkâsu mù gâ le, yhangmoq gi, yhangmoq taî é dông a kut kó nghut ri. <sup>4</sup> Yhangmoq gi, byu pé é goqsân má wòlai ke byi

✧ 22:44 Hkya-on 110:1



kôlhang, yhangmoq yhang gi, wò haú pé lé bo waq râ matú, loqnyhui lhang a kâm lhoq tuí kó nghut ri.

<sup>5</sup> Yhangmoq kut é hkyô lhungháng gi, byu pé myàng râ matú za kut shit é nghut akô; haú chyúmbun bo é showuî-htûng pé lé lhoq kô yù kômù, buhîng pé mâ é banbyaú pé lé lhoq hing yu akô nghut ri; <sup>6</sup> yhangmoq gi, poî pé mâ é réng é jowò pé eq tarajong pé mâ é ahkyak dik é zùng jang pé má, myàng zùng râ lé ô nau nyi akô; <sup>7</sup> yhangmoq gi, gai pé má lhom shi-kyâm yù kó râ eq, byu pé mai, yhangmoq lé, 'Rabai'\* ga lhom wut kó râ lé ô nau nyi bum akô.

<sup>8</sup> Nungmoq kúm gi, 'Rabai' ga wut râ lé hkâ-ô naù kó; hkâsu mù gâ le, nungmoq gi, sará rayuq za wó lhê nghut é htoq agó, nungmoq banshoq bang gi, gumang chyat ru nghut lhê. <sup>9</sup> Haú mù, myidâm htoq má, ó yuq lé le, 'âwa' hkâ-nghû kó; hkâsu mù gâ le, mauhkûng htoq mâ é Îwa rayuq za, nungmoq é Îwa nghut lhê. <sup>10</sup> Hau htoq agó, 'sarâ' ga wut râ lé, hkâ-ô naù kó; hkâsu mù gâ le, Hkrisduq za, nungmoq é Sará nghut lhê. <sup>11</sup> Nungmoq mâ é je gyaú sù gi, nungmoq é dui-nhâng zoshâng dut râ nghut lhê. <sup>12</sup> Hkâsu mù gâ le, yhumsing gùng lé waq toq sù ó yuq nghut kôle, lhoq nyhum pyâm é hui râ nghut lhê, yhumsing gùng lé lhoq nyhûm sù kúm gi, waq toq é hui râ nghut lhê.

<sup>13</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byu pé hí má, mauhkûng mingdán hkyô lé xaù tô akô; nungmoq yhang le a

---

\* **23:7** Aramaik dang dông rabai gâ é gi, sará gâ é lichyúm nghut lhê.

wàng kó, wàng nau nyì bang lé le a wàng nhâng kó nghut ri. <sup>14</sup> (Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, chuimó pé é yhûm-yò pé lé hpyoq zo hpyoq shuq é eq kyû hîng hîng dîng shit mhaû é bang nghut akô; haû mù, dam byî é je myo hui zo kó râ nghut lhê.)†

<sup>15</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, byù rayuq lé nungmoq é noqkuq htûng má wó lhoq lhik yû râ matú, myì hkyô, wuì hkyô, châng jón wún kômù, wó lhoq lhik yu é sù lé gi, nungmoq su ngaraì byù í tú shuì dut akô nghut ri.

<sup>16</sup> Hkyô-u she é myoqjit pé ê, nungmoq gi, dingnyé wó ri. Nungmoq gi, 'Noqkuq yhûm lé lang luì dakam é sù gi, haì a ra; noqkuq yhûm mâ é hîng lé lang mù dakam é sù kúm gi, châng ra bê.' ga lhaq taì akô. <sup>17</sup> Myoqjit é byù nâ pé ê! Haû hîng eq hîng lé lhoq yúnglhô é noqkuq yhûm gi, hká lhum je ahkyak lhê lú? <sup>18</sup> Hau htoq agó, nungmoq gi, 'Haû hkungga gyap lé lang luì dakam é sù gi, haì a ra, nghut kôlhang, haû hkungga zè lé lang mù dakam é sù gi, châng ra bê.' ga le, lhaq taì akô nghut ri. <sup>19</sup> Myoqjit pé ê! Haû hkungga zè eq hkungga zè lé lhoq yúnglhô é hkungga gyap gi, hká lhum je ahkyak lhê lú? <sup>20</sup> Haû mù, haû hkungga gyap lé lang luì dakam é sù gi, haû hkungga gyap eq hau é ahtoq má ke tô é zè banshoq lé lang luì dakam é sù dut bê nghut ri. <sup>21</sup> Noqkuq yhûm lé lang luì dakam é sù gi, haû noqkuq yhûm eq haú

† **23:14** Chyúmding ra-am má gi, bun zo 14 shì a bo é nghut lhê.

má nyi é Sû lé lang luí dakam é sù dut bê nghut ri.  
<sup>22</sup> Hau htoq agó, mauhkûng lé lang luí dakam é sù gi, Garai Gasâng é tanghkuq eq haú má zung é Sû lé lang luí dakam é sù dut bê nghut ri.

<sup>23</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, xunmân nghut é gau-tsáng shingtón, bantsái, hpakkyí pé mâ é xê gambùm ragambùm lé gi, byí nyi kômù, je ahkyak é tarâ nghut é, tarâ rap-rá hkyô, shogyo nhikmyin hkyô eq lhumzui hkyô pé lé gi, lhaí pyâm tô akô nghut ri. Hí lhum lé kut é su, htang lhum lé le kut râ lhê.  
<sup>24</sup> Hkyô-u she é myoqjit pé ê! Nungmoq, pyup lé gi, jân pyám kômù, gola-uq lé gi, myui pyâm akô nghut ri.

<sup>25</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, zo hkoq shuq góm pé lé ahtoq shut za chí yúng mù, ahte má gi, lú zo lú shuq é eq yhumsing maiwáng zat é myit byíng zan tô ri.  
<sup>26</sup> Hparishe myoqjit pé ê! Zo hkoq shuq góm é ahte lé hí chí yúng pyám keq, haú jáng, ahtoq le sân-yúng râ nghut lhê.

<sup>27</sup> Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, but hpyu tô é lup pé eq du akô; haú pé gi, ahtoq má wú yúng kôlhang, ahkaû má gi, mâng bup showui pé eq achayut é chângjup byíng tô é nghut ri. <sup>28</sup> Haú eq rajung za, nungmoq gi, byu pê hí má, ahtoq pyâm dingmán é su kut shit kôlhang, ahkaû má gi, gegùn labyoq kut é eq agè ashop é hkyô pé byíng zan tô ri.

29 Gegùn labyoq nghut é, tarâ sará pé eq Hparishe pé ê, nungmoq gi, dingnyé wó ri. Hkâsu mù gâ le, nungmoq gi, myiqhtoî pé é lup lé luptsuq tsuq kômù, dingmán bâng é lup pé lé mhón byi kôluî, <sup>30</sup> 'Ngamoq gi, ngamoq é îchyí îwa pé é ipyat má nyi âng é ru nghut le gi, haû myiqhtoî pé é sui lhoq shun é bang má, ngamoq bo lòm râ a nghut.' ga lhaq taí akô. <sup>31</sup> Haû su mù, nungmoq gi, haû myiqhtoî pé lé sat pyám bâng é awut ashín pé nghut é hkyô lé, nungmoq gùng nungmoq saksé hkam yu nyi akô nghut ri. <sup>32</sup> Haû mù, nungmoq é îchyí îwa pé hi tô é muzó lé, banshoq châng kut pán keq!

<sup>33</sup> Lhangmuì pé ê, duq htân lhangmuì amyû pé ê! Ngarai mîng é dam byi hkyô mai, hkâsu wó hfang lut kó râ lú? <sup>34</sup> Hau é yanmai, myiqhtoî pé, hpaqchyí bò bang eq chyúm sará pé lé, Ngò, nungmoq chyáng nhang kat râ nghut lhê. Haú bang mâ é ra-am lé gi, nungmoq lhom sat pyám mù, tapzîng má jén pyám kó râ nghut lhê; ra-am lé gi, nungmoq é tarajong pé má, nhuq bat kômù, ra-myuq htâng ra-myuq châng hkat zing-rî wún kó râ nghut lhê. <sup>35</sup> Hau é yanmai, haû dingmán sù Abelaq é sui mai hî luî, noqkuq yhûm eq hkungga gyap gyoro má nungmoq sat pyâm é, Berehkiq é yhangzo Zahkariq é sui jé shoq, myidàm htoq má shun pyâm é dingmán bang banshoq é sui gi, nungmoq é ahtoq má jé lô râ nghut lhê. <sup>36</sup> Ngò, nungmoq lé teng za taí kôlé, shí hkyô banshoq gi, ipyat shi é ahtoq má jé râ nghut lhê.

<sup>37</sup> Yerusalem ê, Yerusalem ê, myiqhtoî pé lé sat pyám pyám kut mù, náng chyáng nhang kat é bang

lé luqgok èq dú sat sat kut é myuq nàng ê, woqzìng gi, yhangzô pé lé, yhâng é dùng hkaû mã tsìng lhùng yu é su, nungzô pé lé, Ngò, hkâ-myhó dâm shui tsìng yù nàù kôlhang, nàng a dóng nghut ri. <sup>38</sup> Wú keq, nungmoq é yhùm gi, nungmoq é matú cham-chyuiyuè dut pyâm to berâ nghut lhê. <sup>39</sup> Hkâsu mù gâ le, Ngò, nungmoq lé taí kôlé, 'Yhumsing é myìng mai jé lé lo é Sù gi, hkungsô wó nyí sháng gaq.'\* ga, nungmoq a taí taí gi, Ngo lé wó myâng kó rá a nghut lo." gâ ri.

## 24

### *Ló Htâng Buinyì Má Dut Lò Râ Hkyô*

*Mrk 13:1-31; Luk 21:5-33*

<sup>1</sup> Yesuq gi, noqkuq yhùm mai htoq e ló é u lé, Yhâng é chángzô pé gi, Yhâng é nàm má huí lé lô kômù, haù noqkuq yhum é loqmú pé lé tûn shit akô. <sup>2</sup> Haù hkûn, Yesuq gi, yhangmoq lé, "Haù pé banshoq lé, nungmoq myang lhê a nghut kó lú? Ngò, nungmoq lé teng za taí kôlé, luqgok haù pé gi, rachâm htoq racham lháng a kê lhum loshoq, hpyoq hpyi pyâm é hui rá nghut lhê." ga taí ri.

<sup>3</sup> Yesuq gi, Tsanlun Bùm má zung tô é hkûn, haù chángzô pé gi, yhangmoq baù Yhâng chyáng lé jé kômù, "Haù hkyô pé gi, hkâ-nhám dut lò rá lú? Nàng gyó lé rá hkûn eq ló htâng buinyì má, hkasú é kumlhá htoq lô rá nghut lhê lú? Ngamoq lé taí kyô wú laq." ga, Yhang lé myí akô.

<sup>4</sup> Haù hkûn, Yesuq, yhangmoq lé tû taí é gi, "Nungmoq lé, ó yuq èq le a wó shuí nghoq sháng gaq, sidiq nyi keq. <sup>5</sup> Hkâsu mù gâ le, 'Ngò gi, haù

\* 23:39 Hkya-on 118:26

Hkrisduq nghut lhê.' ga, Ngá myîng lé lâng é byù myo myo pô htoq lô mù, byù myo myo lé hkyô shuí nghoq kó râ nghut lhê. <sup>6</sup> Nungmoq gi, majan dut nyi é hkyô eq majan eq sêng é danglám pé lé, wó gyo kó râ nghut lhê; nghut kôlhang, hkâgyuq dàn kó. Haú hkyô pé gi, dut lò râ za nghut lhê; nghut kôlhang, ló htâng é buinyì gi, a nghut shi. <sup>7</sup> Byù ra-myû eq ra-myû, mingdán ralhum eq ralhum majan zân lhûm lò kó râ nghut lhê. Jowò myo myo má, mutmó gyó é pé eq layàng nún é pé dut lò râ nghut lhê. <sup>8</sup> Haú pé gi, wúhke jamjau hkýo é apûn awang za ru nghut ashî.✧

<sup>9</sup> Haú hkûn, nungmoq gi, zing-rî é eq sat pyâm é hui zo râ matú, ap pyâm é hui kó râ nghut lhê. Byù myû lunglhang bang gi, Ngá é yanmai, nungmoq lé a nguì kut kó râ nghut lhê. <sup>10</sup> Haú u lé, byù myo myo gi, lumjîng myit lé tô pyâm kômù, rayuq eq rayuq a nguì lhum dut é htoq agó, rayuq eq rayuq ap pyâm lhum kó râ nghut lhê. <sup>11</sup> Hau htoq agó, myiqhtoi pyoq pé myo myo pô htoq lô kômù, byù myo myo lé hkyô shuí nghoq kó râ nghut lhê. <sup>12</sup> Agè ashop é hkyô myô jat lo é yanmai, byù myo myô é chyitdap myit gi, kân ló byuq râ nghut lhê; <sup>13</sup> nghut kôlhang, jîhtûm jé shoq wó hkam jân nyi é sù gi, hkyi yu é hui râ nghut lhê. <sup>14</sup> Byù myû banshoq má saksé dut râ matú, haú mingdán eq sêng é gabú danglù lé, mingkan gón má hko kyo râ nghut lhê. Hau htâng má sheq, ló htum buinyì jé râ nghut lhê.

<sup>15</sup> Haú mù luí, myiqhtoi Danielaq dông mai taí tô é eq rajung za, 'haú lhoq hten lhoq hpyoq é achag

achyut hkyô'☆ gi, chyoiyúng jowò má shap tô é lé, nungmoq myàng kó râ nghut lhê. (Chyúmlaika nghap sũ gi, sê gyo sháng gaq). <sup>16</sup> Haú hkũn, Yuda mau má nyi é bang gi, bùm pé shut hfang doq ló kó sháng gaq. <sup>17</sup> Yhumhkũng htoq má nyi tô é sũ gi, yhúmkaũ mâ é zè haì lé le, a ló gyó wang yù lo sháng gaq. <sup>18</sup> Yò má nyi tô é sũ gi, yhâng é buhíng lé a ló taũ yu nyi lo sháng gaq. <sup>19</sup> Haú buinyi pé má, zogúng dut é myiwe eq naú huq ashî nghut é înu wuì gi, gyai yhang wuîhke jamjau kó râ nghut lhê. <sup>20</sup> Haú nungmoq hpâng rá buinyi gi, gyoqmyò,\* a nghut jáng, Bánno buinyi má a ang rá matú, kyûdũng nyi keq. <sup>21</sup> Hkâsu mù gâ le, mingkan lé joq é hkũn mai ahkuî jé shoq, hkâ-nhám le a dut wú shí é wuîhke jamjau mó gi, haú buinyi pé má dut lò râ nghut lhê; haú sũ é hkyô gi, htàngnũng má hkâ-nhám le dum dut lo rá a nghut. <sup>22</sup> Buinyi haú pé lé lhoq shaú pyâm é za a nghut le gi, ó yuq le asak wó lut rá a nghut; nghut kôlhang, Garai Gasang èq hkyin yù hui bâng é matú gi, buinyi haú pé lé, lhoq shaú pyám byi rá nghut lhê. <sup>23</sup> Haú ahkyíng má, byù rayuq yuq mai, nungmoq lé, 'Wú keq, shí má Hkrisduq nyi ri.' ga, haú a nghut jáng, 'Wú keq, Yhang hê má nyi ri.' ga taí jáng, nungmoq hkâjíng kó. <sup>24</sup> Hkâsu mù gâ le, Hkrisduq pyoq pé eq myiqhtoi pyoq pé pô htoq lô mù, wó dut é nghut jáng, hkyin yù hui bang lé lháng, wó lhoq ngoq shoq ga, kumlhá mó pé eq laklaí kumlhá pé lé kut shit kó râ nghut lhê. <sup>25</sup> Gyo keq, shí hkyô a dut shimá, Ngò, nungmoq lé taí kyô nyi gù nghut lhê.

---

☆ **24:15** Dan 9:27; 11:31; 12:11      \* **24:20** Israelaq mau má gi, gyoqmyò lé hkyô htoq le gyai wuîhke é ahkyíng nghut lhê.

<sup>26</sup> Haû mù, rayuq yuq èq, nungmoq lé, 'Yhang gi, yoso má nyi ri.' gâ jáng le, hkâ-ê kó; 'Yhang gi, shí gok hkaû má lúng tô ri.' ga jáng le, hkâjínng kó.

<sup>27</sup> Hkâsu mù gâ le, bui htoq hkyam má lhap hpyat é gi, bui wang hkyam má lháng jé shoq duqbó é su, haû Byu Yhangzo jé lé é hkûn le, dut râ nghut lhê. <sup>28</sup> Màng leq é jang má, langdâ pé, lé zîng bùm râ nghut lhê.

<sup>29</sup> Buinyi haú pé mâ é wuîhke jamjau lai eq yhang,

'Bui gi, noq byuq mù, lhamó gi, a tsô dut byuq râ nghut lhê;

kyî pé gi, mauhkûng mai byit gyó lo bùm mù, mauhkûng mâ é wum-o a-tsam pé gi, lhoq nhûn é huî bùm kó râ nghut lhê.'<sup>✧</sup>

<sup>30</sup> Haú hkûn, haû Byu Yhangzô é kumlhá gi, mauhkûng má htoq shit lô râ nghut mù, myidàm htoq mâ é byù myû lhunglháng gi, yón ngau bùm kó râ nghut lhê. Haû Byu Yhangzo gi, mauhkûng mai, mhut ji mù, hpungwup a-tsam mó eq le, hpungwup shingkâng eq le, gyó lé lo é lé, yhangmoq byu-myàng kó râ nghut lhê. <sup>31</sup> Hau htâng má, Yhang gi, Yhâng é maumang lagyô pé lé, tut htê mó èq nhang kat luí, yhangmoq gi, maumyî chyûn myi chyûn eq mauhkûng rahkyam mai, gó hkyam htum shoq mâ é, Yhang hkyin yu tô é bang lé shuí tsîng yù kó râ nghut lhê.

<sup>32</sup> Maihpáng gâm lé wú mù, mhoq yû keq; agàm mai a-nyuq nyún lô mù, ahaq htut lô jáng, bui nyé nám chyâng lò bê lé, nungmoq sê lhê. <sup>33</sup> Haû eq

✧ **24:29** Esai 13:10; 34:4



rajung za, shí hkyô banshoq† lé, nungmoq myàng kôjáng, Yhang gi, chyáng bê nghut mù, hkúmdong má lhang nghut nyí bê hkyô lé, nungmoq sé lo keq. <sup>34</sup> Ngò, nungmoq lé teng za tai kôlé, shí pyat mâ é byu pé a ban shi byuq shimá, haú hkyô pé† banshoq dut byuq râ nghut lhê. <sup>35</sup> Mauhkûng eq myigùng gi, a joq lo dut byuq râ nghut lhê; nghut kôlhang, Ngá é dang gi, ru joq nyí râ nghut lhê.

*Haú Buinyì Eq Ahkyíng Lé, Ó Le A Sé*

*Mrk 13:32-37; Luk 17:26-30, 34-36; 12:35-48*

<sup>36</sup> Buinyì eq ahkyíng haú lé gi, ó yuq le a sé; mauhkûng htoq mâ é maumang lagyô pé lhang a sé; haú Zo le a sé; haú Íwa za ru sê lhê. <sup>37</sup> Noaq é tsîn pyat má dut é su, haú Byu Yhangzo lé lo é hkûn le, dut râ nghut lhê. <sup>38</sup> Hkâsu mù gâ le, dowuì a dítng shí é buinyì pé má, byu pé gi, Noaq, wuì-sanghpo mó hkaú má wang é hkûn jé shoq, zo zo shuq shuq, myi byi myi yú, kut nyi bum akô nghut ri; <sup>39</sup> yhangmoq gi, dowuì dítng lô mù, yhangmoq banshoq lé ûm sat pyâm é hkûn jé shoq, haí dut lò râ lé, a sé kó dut bùm é su, haú Byu Yhangzo lé lo é hkûn le, dut râ nghut lhê. <sup>40</sup> Haú hkûn, yò má rahá nyi tô é byù í yuq mâ é rayuq gi, shuí yu é hui mù, rayuq gi, myit gyó to râ nghut lhê. <sup>41</sup> Luqluí chôm lhang nyi é myiwe í yuq mâ é rayuq gi, shuí yu é hui mù, rayuq gi, myit gyó pyâm to râ nghut lhê.

<sup>42</sup> Haú su mù, haú nungmoq é Yhumsíng gi, hká nyí jé lé lô râ lé, nungmoq a sê kô é yanmai, sidiq

---

† **24:33** Shí hkyô banshoq gâ é gi, Yesuq jé lé râ hí má dut râ hkyô pé lé tai é nghut lhê. † **24:34** Haú hkyô pé gâ é gi, Yerusalem noqkuq yhûm htên byoq râ lé tai é nghut lhê.

machya nyi keq. <sup>43</sup> Myín hká u má hkau sù jé lé lò râ lé, yhumsîng sê é ru nghut le gi, yhâng é yhûm má a wó hput wâng nhâng loshoq, yhang machya nyi râ nghut é lé, nungmoq sê gyô nyi keq. <sup>44</sup> Haû mù, nungmoq le rì rì nghut nyi keq; hkâsu mù gâ le, haû Byu Yhangzo gi, a bûn nùng má jé lé lô râ nghut lhê.

<sup>45</sup> Yhumsîng hpô é dui-nhâng zoshâng wuì lé, uphkâng râ eq ahkyíng jé jáng zoshuq gâm byi râ matú, yhumsîng hpô eq mù nhang tô é, lhumzui lui, hpaqchyî bo é dui-nhâng zoshâng gi, ó yuq nghut râ lhu? <sup>46</sup> Yhumsîng hpó dum taú lo é hkûn, haû su kut nyi láng é dui-nhâng zoshâng gi, hkungsô wó nyi ri. <sup>47</sup> Ngò, nungmoq lé teng za tái kôlé, yhumsîng hpó haû gi, yhâng é sutzé banshoq, dui-nhâng zoshâng haú yuq lé ap to râ nghut lhê. <sup>48</sup> Nghut kôhang, laqma mù, dui-nhâng zoshâng haú yuq gi, agè ashop sù nghut lui, 'Ngá é yhumsîng hpó jé lô râ gyai myáng ashî.' ga, yhâng é i-myt unghkaú má myit yù mù, <sup>49</sup> gotú dui-nhâng zoshâng luzúm wuì lé nhuq bat é htoq agó, î shuq wut bang eq rahá zo zo shuq shuq kut nyi é nghut le gi, <sup>50</sup> dui-nhâng zoshâng hau é yhumsîng hpó gi, yhang a myitngam tô é buinyi eq yhang a sê tô é ahkyíng má jé lô mù, <sup>51</sup> yhang lé jap pyám lui, gegùn labyoq kut bang hkâm zô é, ngaubyi ngàu nhap eq zuì kyik kyik shoq hpuzô nyi râ jowò má hkyô pyám râ nghut lhê.

## 25

*Zomyi Raxê Yuq Lé Dangtú Yu É Hkyô*

<sup>1</sup> Haú hkûn, mauhkûng mingdán gi, myibung yu chûng mù, lusik lé te yù râ ga, htoq e ló é zomyi raxê yuq eq pûng râ nghut lhê. <sup>2</sup> Haú bang má, ngo yuq gi, nhik a gyîng kó; ngo yuq gi, nhik gyîng akô nghut ri. <sup>3</sup> Haú nhik a gyîng é bang gi, myibung yu chûng kôlhang, xû a yu chûng kó nghut ri. <sup>4</sup> Nghut kôlhang, haú nhik gyîng é bang kúm gi, yhangmoq é myibung lé le, xû bo é bòng lé le yu chung akô nghut ri. <sup>5</sup> Lusik jé lé lô râ myáng nyi é yanmai, yhangmoq banshoq bang gi, yhup mui lò kômù, yhup myhî byuq bekô nghut ri.

<sup>6</sup> Myín gunggàm jé jáng, 'Lusik jé bê ô! Yhang lé te yù râ matú, htoq lé lô keq hkoi ô!' ga, garû é hte htoq lo ri.

<sup>7</sup> Haú hkûn, zomyi haú bang banshoq gi, toq lô mù, yhangmoq é myibung lé hen lajáng akô nghut ri. <sup>8</sup> Haú nhik a gyîng bang gi, 'Ngamoq lé, xû ratsuí byi kó laq; hkâsu mù gâ le, ngamoq é myibung shi ló nyi ri.' ga, haú nhik gyîng bâng chyáng dúng akô.

<sup>9</sup> Haú hkûn, haú nhik gyîng bang gi, 'Nungmoq eq ngamoq é matú ga jáng, luq râ a nghut. Haú mù, nungmoq é matú, xû ung bâng chyáng ê wui yù keq.' ga tû taî kat akô.

<sup>10</sup> Yhangmoq, xû wui e ló kô é hkûn, lusik gi, jé lé lô mù, haú rì rì hen tô é zomyi wui gi, yhang eq rahá myiháng poî má wang ló bekô. Hkum le myhî byuq bé nghut ri.

<sup>11</sup> Hau htâng má, hau htâng gyó tô é zomyi wui gi, tau jé lô kômù, 'Yhumsîng ê! Yhumsîng ê! Ngamoq lé, hkum hpóng byi laq ô!' ga taî akô.

<sup>12</sup> Nghut kôlhang, haû lusik gi, 'Ngò, nungmoq lé teng za taí kôlé, nungmoq lé ngò a sé.' ga tú taí kat ri.

<sup>13</sup> Haû mù luí, haû Byu Yhangzo jé lé râ buinyì eq ahkyíng lé, nungmoq a sé kô é yanmai, sidiq machya nyì keq.

*Dui-nhâng Zoshâng Sum Yuq Lé, Dangtú Yu É Hkyô*

*Luk 19:11-27*

<sup>14</sup> Mauhkûng mingdán gi, byù rayuq byìn we htoq râ hen nyì é nghut mù, yhâng é dui-nhâng zoshâng wuì lé wut yù luí, yhâng é sutzè lé ap byí to sù eq pung ashî nghut ri. <sup>15</sup> Yhang gi, yhangmoq é a-tsam má cháng luí, rayuq lé gi, ngùn ngo jói, rayuq lé gi, í jói, htâng rayuq lé gi, rajoí kut byí to mù, byìn we shut htoq ló byuq bê nghut ri. <sup>16</sup> Ngùn ngo jói wó yù sù gi, haú hkûn jáng htoq ló mù, hpugá gá luí, ngùn ngo jói wó myat yù bê nghut ri. <sup>17</sup> Haû eq rajung za, ngùn í jói wó yù sù le, í jói wó myat yù bê nghut ri. <sup>18</sup> Nghut kôlhang, rajoí za wó yù sù gi, htoq e ló mù, myigùng má du luí, yhâng yhumsíng hpô é ngùn lé haq myhup tô ri.

<sup>19</sup> Hau htâng tsómra myáng jáng, dui-nhâng zoshâng haú bâng é yhumsíng hpó gi, dum taû jé lô mù, yhangmoq é ngùn chyârâng lé, lo jep ri.

<sup>20</sup> Ngùn ngo jói wó yù sù gi, amyat ngo jói lé le yu lé lô mù, 'Yhumsíng ê, nàng, ngo lé, ngùn ngo jói ap tô é nghut lhê. Wú aq, amyat ngo jói wó ho jat yù bê.' ga taí ri.

<sup>21</sup> Haú hkûn, haû yhumsíng hpó gi, 'Arâ! Nghut bê. Nàng gi, kyet é eq lumgíng é dui-nhâng zoshâng nghut ri! Tiq é mù má lhang wó lum é sù nghut é

yanmai, ngò, nang lé, kô é mú lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taî ri.

<sup>22</sup> Haû eq rajung za, í joí wó yû sù le, lé lô mù, 'Yhumsîng ê, nàng, ngo lé ngùn í joí ap tô é nghut lhê. Wú aq, amyat í joí wó ho jat yù bê.' ga, lé taî ri.

<sup>23</sup> Haû hkûn, haû yhumsîng hpó gi, 'Arâ! Nghut bê. Nàng gi, kyet é eq lungíng é dui-nhâng zoshâng nghut ri! Tiq é mú má lháng wó lum é sù nghut é yanmai, ngò, nang lé, kô é mú lé le ap byi râ nghut lhê. Náng yhumsîng hpô é gabú hkyô má bo wang lòm aq hkoi!' ga tû taî ri.

<sup>24</sup> Hau htâng, rajoí wó yû sù le, lé lô mù, 'Yhumsîng ê, nàng gi, byù wui nghut mù, yhumsîng a hô tô é jang mâ é shù yù nau é htoq agó, yhumsîng, kyôshi a sân hkyô tô é jang mâ é tsîng yù nau sù nghut é lé, ngò sê lhê. <sup>25</sup> Haû mù, ngò gi, gyuq luî, htoq ê mù, náng é ngùn lé, myigùng má ê haq myhup tô é nghut lhê. Wú aq, shî gi, nàng é ngùn nghut lhê.' ga taî ri.

<sup>26</sup> Haû mù, yhumsîng hpó gi, yhang lé, 'Agè ashop é eq lagôn é dui-nhâng zoshâng ê! Ngò gi, yhumsîng a hô tô é jang mâ é shù yù nau é eq, yhumsîng, kyôshi a sân hkyô tô é jang mâ é tsîng yù nau sù nghut é lé, nàng sê to gù nghut le nhîng, <sup>27</sup> ngá é ngùn lé, ngò dum taû jé lô jáng, aráng eq amyat wó yû shoq, ngùn hpún kat jang má, haî mù a kat tô é lhú?

<sup>28</sup> Haû mù, haû ngùn rajoí lé, náng chyáng mai yù luî, raxê joí wó to sù lé, byî pyám nhâng râ nghut lhê. <sup>29</sup> Hkâsu mù gâ le, wó sù ó yuq lé nghut kôle, yhang agùn agó wó râ matú, jat byi râ nghut lhê.

A wó su chyáng mai kúm gi, yhang wó tô é lé lhang yu pyám byi shirâ nghut lhê. <sup>30</sup> Haû mù, haû akyû a bo é dui-nhâng zoshâng lé gi, ngaubyi ngaù nhap eq zuì kyik kyik shoq hpuzô nyi râ jowò nghut é, shinggan mauchut hkaû má dú htoq pyám keq.' gâ ri.

### *Sau Eq Bainám*

<sup>31</sup> Haû Byu Yhangzo gi, Yhâng é hpungwup shingkang mai, maumang lagyo lhunglhang bang eq rahá jé lé lo é hkûn, Yhâng é hpungwup shingkang bo é hkohkâm-tanghkuq htoq má zùng râ nghut lhê. <sup>32</sup> Haú hkûn, byù myû chângjup gi, Yhâng é hí má zîng lé lo bùm kó râ nghut mù, Yhang gi, sau zúng sù mai, sau eq bainám lé gotú tû kut gam hkoq é su, byu pé lé gam hkoq pyám râ nghut lhê. <sup>33</sup> Yhang gi, sau pé lé, loqyo hkyam shut, bainám pé lé, loqpaì hkyam shut kut, nyhi to râ nghut lhê.

<sup>34</sup> Hau htâng má, haû Hkohkâm gi, Yhâng é loqyo hkyam shut mâ é bang lé, 'Ngá Wâ chyáng mâ é shimân jeju hkam yu é hui bang ê, lé keq; mingkan lé hpan é hkûn mai, nungmoq é matú ga hen lajâng tô é muì mingdán má wang ló keq. <sup>35</sup> Hkâsu mù gâ le, Ngò zòmut é u lé, nungmoq, Ngo lé byi tso kô é nghut lhê; Ngò wuìshit é u lé, nungmoq, Ngo lé byi huq kô é nghut lhê; Ngò bíng kut wún é u lé, nungmoq, Ngo lé lhom hkulum yù kô é nghut lhê; <sup>36</sup> Ngò gùngchín dut é u lé, nungmoq, Ngo lé byi hut kô é nghut lhê; Ngò nõhpyo huì é u lé, nungmoq, Ngo lé wú gon kô é nghut lhê; Ngò htóng lúng é u lé, nungmoq, Ngo lé lé kum kô é nghut lhê.' ga táí râ nghut lhê.

<sup>37</sup> Haú hkûn, haú dingmán bang gi, Yhang lé, 'Yhumsîng ê, Nàng zòmút huí é lé, ngamoq, hkâ-nhám myàng luí, byi tsô wú é lú? Nàng wuìshit é lé, ngamoq, hkâ-nhám myàng luí, byi huq wú é lú? <sup>38</sup> Nàng bíng kut wún é lé, ngamoq, hkâ-nhám myàng luí, lhom hkulum wú é lú? Nàng gùngchîn dut é hkûn, ngamoq, hkâ-nhám byi hut wú é lú? <sup>39</sup> Nàng nòhpyo huí é lé le, htóng lúng é lé le, ngamoq, hkâ-nhám myàng luí, lé gon lé kùm wú é lú?' ga myi kó râ nghut lhê.

<sup>40</sup> Haú hkûn, haú hkohkâm gi, 'Ngò, nungmoq lé teng za taí kôlé, shí, Ngá gumang wui mâ é je tiq sù lé, nungmoq kut byí é hkyô haí le, Ngo lé kut byí é nghut bê.' ga tû taí râ nghut lhê.

<sup>41</sup> Hau htâng má, Yhang gi, Yhâng é loqpaí hkyam shut mâ é bang lé, 'Dingnyé wó é bang ê, Ngá chyáng mai gâng ló mù, nat Tsadán eq yhâng é maumâng pè é matú hen tô é, ahtum abyuq é myi má wang ló keq. <sup>42</sup> Hkâsu mù gâ le, Ngò zòmút é u lé, nungmoq, Ngo lé a byi tso kó; Ngò wuìshit é u lé, nungmoq, Ngo lé a byi huq kó; <sup>43</sup> Ngò bíng kut wún é u lé, nungmoq, Ngo lé a lhom hkulum yú kó; Ngò gùngchîn dut é u lé, nungmoq, Ngo lé, mebu a byi hut kó; Ngò nòhpyo huí é eq htóng lúng é u lé, nungmoq, Ngo lé a gon kó nghut ri.' ga taí râ nghut lhê.

<sup>44</sup> Haú hkûn, yhangmoq gi, 'Yhumsîng ê, nàng zòmút wuìshit é, bíng kut wún é, gùngchîn dut é, nòhpyo huí é eq htóng lúng é lé, ngamoq, hkâ-nhám myàng luí, a wú gon kut wú é lú?' ga taú myi kó râ nghut lhê.

<sup>45</sup> Haú hkûn, Yhang gi, 'Ngò, nungmoq lé teng za taí kôlé, shí bang mâ é je tiq sù lé, nungmoq, a kut

byî é hkyô haî le, Ngo lé a kut byî é nghut bê.' ga, yhangmoq lé tâi taî râ nghut lê.

<sup>46</sup> Haû mù luî, haú bang gi, ahtum abyuq mara dam byî é má wang ló kó râ nghut lê; haû dingmán bang kúm gi, ahtum abyuq é asak má wang ló kó râ nghut lê." ga Yesuq taî ri.

## 26

*Yesuq Lé, Sat Râ Da Kô É Hkyô*

*Mrk 14:1-2; Luk 22:1-2; Yhn 11:45-53*

<sup>1</sup> Yesuq gi, haú hkyô pé lé ban taî é htâng má, Yhâng é chángzô pé lé, <sup>2</sup> "Nungmoq sê tô é eq rajung za, í nyî lai é htâng má, Lhoqlhai Poî jé râ nghut mù, haû Byu Yhangzo gi, tapzîng má jén sat é hui râ matú, ap pyâm é hui râ nghut lê." ga taî ri.

<sup>3</sup> Haú u lé, hkyangjong agyi pé eq suwún wuî gi, Kayahpaq gâ é hkyangjong mó rayuq é yhumwàng má zup zîng to kômù, <sup>4</sup> Yesuq lé haq chyup yû râ eq sat pyám râ hkyô lé, hpyê lhûm bum akô nghut ri. <sup>5</sup> Nghut kôlhang, yhangmoq gi, "Byu pé gabyông lò kó abe, poî gyoro má gi, a kut shi sháng." ga, taî lhûm akô nghut ri.

*Yesuq, Xû Hut Gyun Huî É Hkyô*

*Mrk 14:3-9; Yhn 12:1-8*

<sup>6</sup> Yesuq gi, Behtani wà má nyi é manggâm dap wú sù Simún é yhûm má nyi tô é hkûn, <sup>7</sup> myiwe myhí rayuq gi, gyai hpaû é namngón xû bo é luq hpyû bông yu lé lô mù, Yesuq zo shuq nyi é hkûn, namngón xû haú lé, Yhâng é ulhum má hut gyun byî ri.



<sup>8</sup> Haú hkyô lé, haú chángzô pé myàng kôjáng, wú nhik-yo kômù, "Haî mù luî, haú lé aha agó kut pyâm lhê lhú? <sup>9</sup> Xú haú lé, ahpau myo myô êq ùng pyám mù, myùng bang lé byî le ge lhê mhaî!" ga taí kat akô.

<sup>10</sup> Yesuq gi, haú hkyô lé sé luî, "Haî mù, myiwe zo haú lé, i-myt lhoq myô nyi akô lhú? Yhang gi, Ngá é ahtoq má ge é hkyô kut bê nghut ri. <sup>11</sup> Haú myùng bang gi, nungmoq eq rahá hkâ-nhám le nyi râ nghut lhê; nghut kôlhang, Ngò gi, nungmoq eq rahá ayang nyi nyi râ sù a nghut. <sup>12</sup> Yhang, Ngá gûng má namngón xú hut gyûn é gi, Ngá gûng lé yhum râ matú, hen lajâng é hkyô nghut ri. <sup>13</sup> Ngò, nungmoq lé teng za taí kôlé, haú gabú danglù lé, mingkan gón hko kyô é jowò hkangmó má, yhang lé myit bûn é dông, yhang kut é hkyô shî lé, taí kyo bekô râ nghut lhê." ga taí kyo ri.

### *Yesuq Lé, Yudaq Êq Ung Zô Pyâm É Hkyô*

*Mrk 14:10-11; Luk 22:3-6*

<sup>14</sup> Hau htâng, haú chángzo raxe í yuq má bo é Yudaq Iskarut ga sù gi, hkyangjong agyi pê chyáng ê mù, <sup>15</sup> "Ngò, Yesuq lé nungmoq é loq má ap byî é nghut jáng, nungmoq, ngo lé haî byi kó râ lhú?" ga myî ri. Haú mù, yhangmoq gi, yhang lé ngùn denggá sum xê chap nghap byî akô. <sup>16</sup> Haú hkûn mai, Yudaq gi, Yesuq lé ap pyám râ hkyô ho nyi bê nghut ri.

### *Yhumsing É Myinzang*

*Mrk 14:12-26; Luk 22:7-23; Yhn 13:21-30*

<sup>17</sup> Múnchi a kat é Muk Zo Poî sâng-hi nyí má, haú chángzô pé gi, Yesuq chyáng lé lô kômù, "Nàng zo râ

Lhoqlhai Poî zoshuq lé, ngamoq hkâmá món to râ lhú?" ga myî akô.

<sup>18</sup> Haû mù, Yhang gi, "Myuq hkaû shut wang ló mù, byù rayuq chyáng ê luî, haú yuq lé, 'Ngá é ahkyíng chyáng bê; Ngá é chángzô pé eq rahá, Ngò, náng é yhûm má Lhoqlhai Poî kut râ nghut lhê.' gâ Sará taí ri nghû, ê taí keq." ga pying kat ri. <sup>19</sup> Haû mù, haû chángzô pé gi, Yesuq pying kat é eq rajung za ê taí kômù, Lhoqlhai Poî lé món to bekô nghut ri.

<sup>20</sup> Myinhtâng jé lô jáng, Yesuq gi, haû chángzo raxe í yuq eq rahá, zohpoq má zung tô ri. <sup>21</sup> Yhangmoq zô nyi bùm kô é u lé, Yesuq gi, "Ngò, nungmoq lé teng za taí kôlé, nungmoq mâ é rayuq sù gi, Ngò lé ap pyám râ nghut lhê." ga taí ri.

<sup>22</sup> Haú hkûn, yhangmoq gi, gyai gyô yón kômù, rayuq htâng rayuq, "Yhumsîng ê, ngò a nghut hkaî?" ga, Yhang lé chôm myî akô.

<sup>23</sup> Haú hkûn, Yesuq gi, "Ngò eq rahá, hkoq shí má loq lap bê sù gi, Ngo lé ap pyám râ sù nghut lhê. <sup>24</sup> Haú Byu Yhangzo gi, Yhang eq séng luî kê tô é eq rajung za, shî râ za nghut lhê. Nghut kôlhang, haú Byu Yhangzo lé ap pyám é sù gi, dingnyé wó ri; haú yuq gi, a hku lé le lhang, je ge ri." ga dum taí kat ri.

<sup>25</sup> Hau htâng, Yhang lé ap pyám râ sù, Yudaq gi, "Rabai ê, ngò a nghut hkaî?" ga myi jáng, Yesuq gi, "Nàng nghut ri." ga tû taí kat ri.

<sup>26</sup> Yhangmoq zô nyi kô é u lé, Yesuq gi, muk lé yù mù, jeju hkya-on luî, muk lé myhik hpé mù, "Shî gi, Ngá é gungsho nghut lhê; yù mù zo keq." ga taí uchyang, Yhâng é chángzô pé lé gàm byî ri.

27 Hau htâng, Yhang gi, góm lé le, yù mù, jeju hkya-on luî, yhangmoq lé byi mù, taí é gi, "Nungmoq banshoq bang, shuq keq. 28 Shí gi, yubak mara hkyut pyám byi râ, byù myo myô é matú htoq pyâm é, dangshikaq eq sêng é Ngá sui nghut lhê. 29 Ngò, nungmoq lé taí kôlé, ahkuî mai gi, Ngò, Ngá Wâ é mingdán má, nungmoq eq rahá tsibiyiq wing asik lé shuq é buinyì a jé jé, tsibiyiq wing lé dum shuq râ a nghut lo." ga taí ri.

30 Yhangmoq gi, hkya-on mahkôn ralhüm ban hkôn jáng, Tsanlun Bùm shut htoq e ló bekô nghut ri.

*Petruq He-ngik Râ Lé, Te Tai É Hkyô*

*Mrk 14:27-31; Luk 22:31-34; Yhn 13:36-38*

31 Hau htâng má, Yesuq gi, yhangmoq lé, "Nungmoq lhunglhâng bang gi, hkû-myîn yhang jáng, Ngá é yanmai, myit lingbat kó râ nghut lhê; hkâsu mù gâ le,

'Haú sau zúng sù lé, Ngò bat sat pyám mù, sau hpúng mâ é sau pé gi, lhoq pyo pyâm é hui kó râ nghut lhê.'<sup>✧</sup>

ga kê tô ri. 32 Nghut kôhang, Ngò gi, lhoq dui toq é huí htâng má, Galile mau shut, nungmoq é hí má e ló lánng râ nghut lhê." gâ ri.

33 Haú hkûn, Petruq gi, "Náng é yanmai, góbang banshoq myit lingbat kôhang, ngò gi, hkâ-nhám le myit lingbat râ a nghut." ga tú taí ri.

34 Yesuq gi, "Ngò, nang lé teng za taí lé, hkû-myîn yhang jáng, woq a tûn shimá, nàng, Ngo lé sum dâm he-ngik pyám râ nghut lhê." ga tú taí ri.

---

✧ 26:31 Zhk 13:7

<sup>35</sup> Nghut kôlhang, Petruq gi, "Ngò, Nàng eq rahá shî râ dut kôlhang, Nang lê ngò he-ngik pyám râ a nghut." ga saí taí ri. Haú chángzô pé góbang banshoq le, haú su ga châng taí bum akô nghut ri.

*Get-samane Gâ É Jowò Má Kyûdûng É Hkyô*  
*Mrk 14:32-42; Luk 22:39-46*

<sup>36</sup> Hau htâng má, Yesuq gi, Yhâng é chángzô pé eq rahá Get-samane gâ é jowò má ê kômù, yhangmoq lé, "Ngò, hé má ê mù, kyûdûng nyi é u lé, nungmoq shí má zùng lánq keq." ga taí ri. <sup>37</sup> Yesuq gi, Petruq eq Zebedi yhangzô nhik lé shuí chûng rì. Yhang gi, myit gyai a ngón é eq myit wui nhik hkyik dut lò bê nghut ri. <sup>38</sup> Hau htâng, Yhang gi, yhangmoq lé, "Ngò gi, shî râ í yhang myit yón nyi ri; nungmoq gi, Ngò su machyâ luí, shî má lánq nyi keq." ga taí ri.

<sup>39</sup> Yesuq gi, haú mai ratsuí zo sô ê mù, myigùng má ngóm gop to luí, "Áwa ê, wó dut é nghut le gi, góm\* shí lé, Ngá chyáng mai lhaí pyám byi laq. Nghut kôlhang, Ngò ô nau é đông a nghut, Nàng ô nau é đông sheq nghut sháng gaq." ga kyûdûng ri.

<sup>40</sup> Hau htâng, Yhang gi, Yhâng é chángzô pé chyáng dum taú lo le, yhangmoq yhup myhî to kô é lé lo myàng ri. Haú mù, Yhang gi, Petruq lé, "Nungmoq gi, hkyíng hkum rahkum za lhang, Ngò eq rahá a wó machya nyi kó lúh? <sup>41</sup> Gunlaú é a hui sháng gaq, machyâ luí, kyûdûng nyi keq. Haú woi-nyí gi, kâm nyi kôlhang, gungsho gi, wum nyhôm nyi ri." ga taí ri.

---

\* **26:39** Góm gâ é gi, Yesuq, jamjau hui râ hkyô eq shî râ hkyô lé, taí nau é nghut lhê.

42 Yhang gi, radàm dum ê mù, "Âwa ê, góm shî lé, Ngò a shuq é a wó lai râ nghut jáng gi, Nàng ô nau é dông nghut sháng gaq hkoi." ga kyû dum dúng ri.

43 Yhang dum taû lo le, yhangmoq gi, myoqkuq lai kê é yanmai, yhup myhî to lánng kê é lé, lo dum myàng ri. 44 Haû mù, Yhang gi, yhangmoq lé tô pyâm to mù, sum dâm nghû râ dâm dum ê luî, hí lé dúng é dang lé roq é dum dúng ri.

45 Haû mù, Yhang gi, haû chángzô pê chyáng dum taû jé lô mù, yhangmoq lé, "Nungmoq gi, ahkuî jé shoq yhup ngón nyi ashî kó lhu? Wú keq! Haû ahkyíng gi, jé bê nghut luî, haû Byu Yhangzo gi, yubak dap bâng é loq má ap pyâm é hui râ nghut bê. 46 Toq keq! Ló losháng hkoi! Ngo lé ap pyám râ sù gi, jé lé bê nghut ri." ga taî ri.

*Yesuq, Chyup Yû Huî É Hkyô*

*Mrk 14:43-50; Luk 22:47-53; Yhn 18:3-12*

47 Yesuq, dâng nyo nyi ashî u lé, haû chángzo raxe í yuq má bo é Yudaq gi, jé lé lo ri; haû hkyangjong agyi pé eq mingbyu é suwún wui chyáng mai nhang kat é bang nghut é, shâm eq dumbáng pé chung tô é byù moq mó le, yhang eq rahá nghut akô. 48 Yesuq lé ap pyám râ sù gi, haû bang lé, "Ngò, bopuq puq é sù gi, haû yuq nghut bê; Yhang lé chyup yû keq." ga kumhá byî tô ri. 49 Yudaq gi, Yesuq chyáng hkyê za ê mù, "Rabai ê, wángzán nyi lhê lhu?" ga taî luî, Yhang lé bopuq puq byî ri.

50 Haû hkûn, Yesuq gi, "Buinùm hpó ê, nàng kut râ muzó lé kut aq hkoi." ga tû taî kat ri.

Hau htâng, yhangmoq gi, hí shut huî ê luî, Yesuq lé chôm zuî zìng mù, chyup yû bekô nghut ri.

51 Haû mù, Yesuq eq rahá nyi bang mâ é rayuq gi,

shâm she htoq yû mù, hkyangjong mó é dui-nhâng zôshang é nohkyap lé pyoq hkyô kat byi bê nghut ri.

<sup>52</sup> Haû jáng, Yesuq gi, haû yuq lé, "Náng é shâm lé, xâng pyám aq; hkâsu mù gâ le, shâm shê sù gi, ó yuq nghut kôle, sham èq shî râ nghut lê. <sup>53</sup> Ngò gi, Ngá Wa lé dung jáng, Yhang gi, radá dâm, maumang lagyo dap pé raxe í dap htoq myo shoq nhang kat byi râ nghut é lé, nungmoq a sé kó lú? <sup>54</sup> Nghut kôlhang, haû su nghut é nghut jáng, shí hkyô dut lò râ nghut lê ga Chyúmdang pé má bò tô é hkyô gi, hkâsu wó dik lò râ lú?" ga taî kat ri.

<sup>55</sup> Hau htâng, Yhang gi, byù moq lé, "Nungmoq gi, damyaq rayuq lé chyup é su, Ngo lé chyup râ matú, shâm eq dumbáng pé chùng mù, lé lo akô lú? Ngò gi, nyí wuí, noqkuq yhûm má zùng mù, mhoqshit nyí kôlhang, nungmoq, Ngo lé a chyup yû kô é nghut lê. <sup>56</sup> Nghut kôlhang, shí su dut é hkyô pé banshoq gi, haû myiqhtoî pé kâ tô é hkyô pé lo dik râ matú dut é nghut ri." ga taî ri. Haû hkûn, haû chângzô pé banshoq gi, Yesuq lé tô pyâm to kôlú, hphang byo byuq bekô nghut ri.

*Yudaq Byìn Tú Wapdoq Má Jep Huì É Hkyô*

*Mrk 14:53-65; Luk 22:54-55, 63-71; Yhn 18:13-14, 19-24*

<sup>57</sup> Yesuq lé chyup yu é bang gi, haû tarâ sará pé eq suwún wuí zup zîng nyi é jang, hkyangjong mó Kayahpaq é yhûm má, Yhang lé shuí e akô. <sup>58</sup> Petruq gi, hkyangjong mó é yhumwàng hkaû má châng jé wâng shoq, we we mai Yesuq htâng châng tô ri. Yhang gi, hkâsu dut lò râ lé myàng nàu lú,

wâng hkaû má wang ê mù, zúng bang eq rahá zung tô ri.

<sup>59</sup> Haû hkyangjong agyi pé eq Yudaq byìn tú wapdoq mâ é góbang gi, Yesuq lé sat pyám nhâng râ matú, a têng é saksé ho nyi akô. <sup>60</sup> A têng é saksé myo myo htoq lô kôlhang, wó sat râ î é saksé a myàng kó nghut ri.

Ló htáng má, byù í yuq gi, lé lô kômù, <sup>61</sup> "Shí yuq gi, 'Ngò gi, haû Garai Gasâng é noqkuq yhùm lé lhoq hten pyám mù, sum nyí gyoro má dum wó saí lhê,' ga taí sù nghut ri." ga taí akô.

<sup>62</sup> Haú hkûn, haû hkyangjong mó gi, toq yap mù, "Nàng, haí le a tú taí luq? Shí bang, Nang lé mara hun nyi é saksé gi, hká dông nghut lhê lhú?" ga, Yesuq lé myí ri. <sup>63</sup> Nghut kôlhang, Yesuq gi, jit le a ga nyi tô ri.

Haú mù, hkyangjong mó gi, Yhang lé, "Haû rû dui nyi é Garai Gasâng é myìng lé lang luí, ngò, Nang lé myí wú lé: Nàng gi, Garai Gasâng é Yhangzo, Hkrisduq nghut lhê luq, ngamoq lé taí kyô wú aq." ga taí jáng, <sup>64</sup> Yesuq gi, "Nàng taí é eq rajung za nghut lhê. Ngò, nungmoq banshoq lé taí kôlé, nungmoq gi, ahkuí mai htâng hpyang má, haû Byu Yhangzo gi, a-tsam bo dik Su é lo-qyo hkyam má zung tô é lé le, mhuthtui ji mù, mauhkûng mai lé lo é lé le, nungmoq myàng kó rá nghut lhê." ga taí ri.

<sup>65</sup> Haú hkûn, hkyangjong mó gi, yhâng é bu lé lâng cheq pyám mù, "Yhang gi, Garai Gasang lé rhoí dang taí bê nghut ri! Nga-nhúng, hai saksé râ ashí lhú? Yhang, Garai Gasang lé rhoí dang taí é lé, nungmoq, ahkuí wó gyo bekô nghut lhê.

66 Nungmoq hkâsu wó myit akô l hú?" ga myi jáng, yhangmoq gi, "Yhang gi, shí gíng sũ nghut lhê." ga tũ taí akô nghut ri.

67 Hau htâng má, yhangmoq gi, Yesuq é myoq-dong má sôkan byé gyun luí, loqtsup èq htui byí akô nghut ri. Góbang gi, Yhang lé bo-pyuq pyuq byi luí, 68 "Hkrisduq Nàng, Nàng lé bat sũ ó yuq nghut é lé, myiqhtoi htoí wú aq." ga taí akô.

*Yesuq Lé, Petruq He-ngik Pyâm É Hkyô*

*Mrk 14:66-72; Luk 22:56-62; Yhn 18:15-18, 25-27*

69 Petruq gi, wâng hkaũ má nyi tô é u lé, dui-nhâng zoshâng myhí rayuq gi, yhâng chyáng lé jé mù, "Nàng le, haũ Galile byù Yesuq eq rahá nyi sũ nghut ri." ga taí ri.

70 Nghut kôlhang, Petruq gi, haũ bang banshoq é hí má yhang, "Nàng haí taí nyi é lé, ngò a sé." ga he kat ri.

71 Hau htâng, yhang gi, wâng hkúmdong shut htoq e ló le, haũ jowò má, dui-nhâng zoshâng myhí góyuq le, yhang lé myàng mù, "Shí yuq gi, Nazaret wà byù Yesuq eq rahá nyi sũ nghut ri." ga, haũ má é bang lé taí kat ri.

72 Haũ hkûn, yhang gi, "Byù haũ yuq lé, ngò a sé!" ga dakam é dông he pyâm ri.

73 Hau htâng razup zo má, haũ jowò má yap to bang gi, Petruq chyáng huí ê kômù, "Nàng le, haũ bang má bò sũ yhang nghut ri; náng é danghtê lé sê gyô ri." ga taí akô.

74 Haũ hkûn, yhang gi, yhânggùng yhang nhing luí, "Haũ yuq lé, ngò a sé." ga dakâm dang taí ri.

Haũ-u yhang, woq tũn bê nghut ri. 75 Haũ mù, Petruq gi, "Woq a tũn shi má, nàng, Ngo lé sum dâm



he pyám rã nghut lhê." ga, Yesuq, yhang lé taí é dang lé, myit bũn kat mù, shinggan shut htoq ê luí, gyai yhang ê ngau ri.

## 27

### *Yudaq Juíshi É Hkyô*

*Mrk 15:1; Luk 23:1-2; Yhn 18:28-32*

<sup>1</sup> Napsũn noq le, hkyangjong agyi pé banshoq bang eq mingbyu é suwũn wui gi, Yesuq lé sat pyám nhãng rã matú chôm myit hpyit yũ bekô nghut ri. <sup>2</sup> Haũ mù, yhangmoq gi, Yhang lé tuí yũ luí, shuí htoq ê kômù, mauzau Pilat chyáng ê ap byí akô nghut ri.

<sup>3</sup> Yesuq lé ap pyám é sũ Yudaq gi, Yesuq lé jéyáng doqđân é hkyô lé myang sé jáng, nungngham wó mù, haũ ngũn sum xê chap lé, hkyangjong agyi pé eq suwũn wui chyáng ló dum taũ byí ri. <sup>4</sup> Haũ mù, yhang gi, "Mara a bò Su é sui lé, ngò ap pyám bê nghut é yanmai, ngò mara wó bê." ga taí jáng, yhangmoq gi, "Haũ hkyô, ngamoq eq haí sêng lhê lhú? Haũ gi, nãng eq sheq ru sêng lhê." ga lhom taí kat akô nghut ri.

<sup>5</sup> Haũ mù, Yudaq gi, ngũn haũ lé, noqkuq yhúmhaũ má dú pyám to luí, htoq ló mù, yhang gũng yhang ê juíshi byuq bê nghut ri.

<sup>6</sup> Haũ hkyangjong agyi pé gi, ngũn chap haũ pé kui yũ luí, "Shí gi, sui hpau ngũn nghut lhê yanmai, alu sidek má a ge kat." ga taí akô. <sup>7</sup> Haũ mù, yhangmoq gi, tũngbaũ pê é lupdũng kut rã matú, au sai zo su é maumyí lé, ngũn hau eq wui hpyit yũ rã dõng, chôm myit hpyit to bekô nghut ri. <sup>8</sup> Hau é yanmai, ahkuí jé shoq, haũ jowò lé, sui myigũng

ga myhîng tô akô nghut ri. <sup>9</sup> Haû gi, "Haû Israelaq byu pé mai, Yhang lé gù hpyit tô é ngùn sum xê chap lé, yhangmoq yù mù, haû Yhumsîng Garai, ngo lé pyîng tô é eq rajung za, <sup>10</sup> haû au saí zo su é maumyî lé, yhangmoq wui yù bekô nghut ri." ga myiqhtoi Yeremiaq taí tô é dang lo dik é nghut ri.

*Yesuq Lé, Pilat Myî Jep Wú É Hkyô*

*Mrk 15:2-15; Luk 23:3-5, 13-26; Yhn 18:33 — 19:16*

<sup>11</sup> Haû u lé, Yesuq gi, mauzau hpô é hí má yap tô é nghut mù, haû mauzau hpó gi, Yhang lé, "Nàng gi, Yudaq byu pé é hkohkâm nghut lhê lú?" ga myi jáng, Yesuq gi, "Nàng taí é eq rajung za nghut lhê." ga tú taí ri.

<sup>12</sup> Haû hkyangjong agyi pé eq suwún wuî gi, Yhang lé, mara hûn kôjáng, Yhang gi, haí le a tú taí nghut ri. <sup>13</sup> Haû hkûn, Pilat gi, Yhang lé, "Yhangmoq, Nàng lé mara hûn saksé haû-í hkâm nyi kô é lé, Nàng a wó gyo lú?" ga saí myî ri. <sup>14</sup> Nghut kôlhang, Yesuq gi, dang rahkun lhang a tú taí é yanmai, haû mauzau hpó gi, gyai maú byuq bê nghut ri.

<sup>15</sup> Haû Lhoqlhai Poî u lé, mingbyû wui ô nau é má cháng luî, haû mauzau hpó gi, htóng byû rayuq yuq lé nhâng byî é htûng joq ri. <sup>16</sup> Haû u lé, a gè myîng htoq é htóng byû, Barabaq ga sù rayuq nyi ri. <sup>17</sup> Haû mù, byù moq mó zup zîng lò kô é hkûn, Pilat gi, yhangmoq lé, "Nungmoq é matú, hká yuq lé lhut byi nhâng nau akô lú? Barabaq luq? Haû a nghut jáng, Hkrisduq gâ é Yesuq lé luq?" ga myî ri. <sup>18</sup> Yhang haû su ga myî é gi, yhangmoq, Yesuq

lé manôn kôluî, yhâng chyáng lé ap byi kô é hkyô lé sê é yanmai nghut ri.

19 Pilat gi, tarâ jéyáng tingnyâng htoq má zung tô ashî hkûn, yhangmyi gi, "Haû mara a bò Sû lé, haî le hkâkut; hkâsu mù gâ le, hkû-nyî za lháng, yhup-moq má, haú yuq é yanmai, ngò tsómra hpuzô pyám bê nghut lhê." ga, yhâng chyáng dang pying kat ri.

20 Nghut kôlhang, haû hkyangjong agyi pé eq suwún wuî gi, Barabaq lé dúng htoq yû râ eq Yesuq lé sat pyám nhâng râ matú, shiwa byu pé lé wum byi bekô nghut ri.

21 Haû mauzau hpó gi, "Shî í yuq mâ é hká yuq lé, nhâng byi nhâng nau akô lhú?" ga myi jáng, yhangmoq gi, "Barabaq!" ga tû taî akô nghut ri.

22 Haû mù, Pilat gi, "Haû jáng gi, Hkrisduq gâ é Yesuq lé, ngò hkâsu kut râ lhú?" ga dum myî kat jáng, yhangmoq banshoq bang gi, "Yhang lé tapzîng má jén sat pyám aq!" ga dum tû taî akô nghut ri.

23 Nghut kôlhang, yhang gi, "Haî mù luî lhú? Yhang gi, hai mara kut shut bê lhú?" ga dum myî jáng, yhangmoq gi, htê mó èq, "Yhang lé tapzîng má jén sat pyám aq!" ga je riyhang garû lo bum akô nghut ri.

24 Pilat gi, hká dông le a dat kut lô é eq byu pé gabyông lò kó râ nghut é hkyô lé myàng luî, uchyam yù mù, shiwa byu pê hí má loq chi luî, taî é gi, "Shí yuq é sui gi, ngò eq haî a séng; nungmoq eq za ru sêng lhê." gâ ri.

25 Haû shiwa byù lhunglhâng bang gi, "Yhâng é sui gi, ngamoq eq ngamoq é yhangzo yhangshû pê

htoq má joq nyi sháng gaq." ga, dum tû taî kat akô nghut ri.

<sup>26</sup> Haú hkûn, Pilat gi, Barabaq lé nhâng byi bê nghut ri. Yesuq lé kúm gi, nhuq bat nhâng mù, tapzîng má jén sat pyám râ matú ap byî kat bê nghut ri.

*Yesuq Lé, Gyezô Pé Rhoi É Hkyô*

*Mrk 15:16-21; Yhn 19:2-3*

<sup>27</sup> Hau htâng, mauzau hpô é gyezô pé gi, Yesuq lé, mauzau hpô é yhumwàng mó hkaû má shuí wang ló kômù, Yhâng é lhîngkhyuq má, gyedap gón lé ji tsîng tô akô. <sup>28</sup> Yhangmoq gi, Yesuq é mebu hkyut pyám byi kôluî, zam zam ne é buhîng hut byi kômù, <sup>29</sup> zujanmaú ralhum saî yù kôluî, Yhâng é ulhum má tsung byî akô nghut ri. Yhangmoq gi, jàm-yang rahkat lé, Yhâng é loqyo loq má kat byi kômù, Yhâng é hí má hkyihput htuaq kôluî, "Yudaq byu pê é hkohkâm hpó ê! Chyung hîng xê hîng nyi sháng gaq ô!" ga, jihpoi dang taî akô. <sup>30</sup> Yhangmoq gi, Yhang lé sôkan byé gyun luî, Yhâng é loq mai jàm-yang lú yù mù, Yhâng é ulhum má dum bat bat kut akô nghut ri. <sup>31</sup> Yhangmoq gi, Yhang lé rhoi jihkyoi ban kut yù kôjáng, Yhang wut tô é buhîng lé hkyut yù kômù, Yhâng é mebu lé dum hut byi luî, tapzîng má jén sat pyám râ matú, Yhang lé shuí htoq e ló bekô nghut ri.

*Yesuq Lé Jén Pyâm É Hkyô*

*Mrk 15:22-32; Luk 23:27-43; Yhn 19:17-27*

<sup>32</sup> Yhangmoq htoq e ló nyi le, Kuruni myuq byû nghut é Simun ga sù lé myàng kômù, yhang lé, zik luî tapzîng waq nhang akô nghut ri. <sup>33</sup> Yhangmoq

gi, Golgahta gâ é jowò má jé e ló bekô nghut ri. Golgahta gâ é lichyúm gi, ugyap joq é jowò lé gâ é nghut lhê. <sup>34</sup> Haú má jé jáng, yhangmoq gi, Yesuq lé, hkô jung eq nyhò tô é tsibiyiq wing lé byi huq akô; nghut kôlhang, Yhang gi, haú lé chyam wú mù, a shuq byi kut pyâm ri. <sup>35</sup> Yhangmoq gi, Yesuq lé tapzîng má jén tap tô é htâng, Yhâng é mebu lé lháng, hkyîn shosé shé é đông gam yu pyâm byi akô. <sup>36</sup> Hau htâng, yhangmoq gi, haú jowò má zung to mù, Yhang lé zúng nyi akô nghut ri. <sup>37</sup> Yhâng é u htoq má, "SHÍ YUQ GI, YUDAQ BYU PÊ É HKOHKÂM, YESUQ NGHUT LHÊ." ga, Yhang lé mara hun é laiká kê tap tô akô. <sup>38</sup> Haú hkûn, Yhang eq rahá, damyaq í yuq lé le, Yhâng é loqpaí hkyam shut rayuq, loqyo hkyam shut rayuq kut, tapzîng htoq má jén tap tô akô nghut ri. <sup>39</sup> Hkyô sô lai ló é bang gi, nyhap é đông u-ngut ngut mù, taí kô é gi, <sup>40</sup> "Noqkuq yhûm lé hpoyoq pyám luí, sum nyi gyoro má dum wó sai lhê ga Sû ê! Nàng, Garai Gasâng é Yhangzo nghut le gi, Náng gûng nàng hkyi yù luí, tapzîng mai gyó lo wú aq mhaí!" ga akô nghut ri.

<sup>41</sup> Haú eq rajung za, hkyangjong agyi pé, tarâ sará pé eq suwún wuí le, Yhang lé rhoí jihkyoí kut mù, taí kô é gi, <sup>42</sup> "Shí yuq gi, góbang lé hkyi yù sù nghut kôlhang, Yhânggùng yhang gi, a wó hkyi yù nghut ri myhi-nhung! Yhang gi, Israelaq byu pê é hkohkâm nghut lhê là! Ngamoq wó lumjîng râ matú, Yhang, tapzîng mai gyó lo wú sháng gaq. <sup>43</sup> Yhang gi, Garai Gasang lé lumhkaú sù nghut lhê mù, Garai ô nau é sù nghut le gi, ahkuí Yhang lé hkyi yù sháng gaq; hkâsu mù gâ le, Yhang gi, 'Ngò, Garai Gasâng é Yhangzo nghut lhê.' ga taí ri." ga

bum akô nghut ri. <sup>44</sup> Haû eq rajung za, Yhang eq rahá tapzîng má jén to huî é damyaq í yuq le, Yhang lé rhoi dang taî akô nghut ri.

*Yesuq Soqkâng Byit É Hkyô*

*Mrk 15:33-41; Luk 23:44-49; Yhn 19:28-30*

<sup>45</sup> Nyí-káng raxe í hkyíng mai myinhâng sum hkyíng jé shoq, ramau gón mauchut tuq dut byuq bê nghut ri. <sup>46</sup> Myinhâng sum hkyíng kô má, Yesuq gi, "Eloi, Eloi, lama sabakhtani?" ga, htê mó eq garû kat ri. Haû é lichyúm gi, "Ngá Garai ê, Ngá Garai ê, Nàng, haî mù, Ngo lé tô pyâm tô lhê lhu?" gâ é nghut ri.✧

<sup>47</sup> Haû nâm má yap tô é bang ra-am gi, haû lé wó gyo kôjáng, "Yhang gi, myiqhtoi Eliyaq lé wut nyi ri." ga taî akô.

<sup>48</sup> Haû hkûn jáng, yhangmoq mâ é rayuq gi, din e ló mù, wuìmaù lé é yu ri. Yhang gi, haû lé tsibiyiq wing chyîn má jum yù luî, jàm-yang má tuî tap mù, Yesuq shuq râ matú yhun byî ri. <sup>49</sup> Góbang gi, "Yhang lé, Eliyaq, lé hkyi yu lhê laq, nga-nhúng chôm láng wú sháng." ga taî akô nghut ri.

<sup>50</sup> Haû hkûn, Yesuq gi, htê mó eq dum garû kat luî, Yhâng é soqkâng byit bê nghut ri.

<sup>51</sup> Haû u lé, haû noqkuq yhûm mâ é pán-gyang gi, ahtoq mai a-ô í hkyam byáng goq byuq bê nghut ri. Myigùng le nún lô mù, luqgok pé le goq byuq bê nghut ri. <sup>52</sup> Lup pé gi, bóng lô mù, shi byuq bê é chyoiyúng bang myo myo gi, lhoq dui é hui akô.

<sup>53</sup> Haû bang gi, Yesuq dum dui toq é htâng, lup mai htoq lô kômù, chyoiyúng myuq\* má wang ê luî, byù

✧ **27:46** Hkya-on 22:1 \* **27:53** Chyoiyúng myuq gâ é gi, Yerusalem wà mó lé gâ é nghut lhê.

myo myô hí má htoq shit akô nghut ri.

<sup>54</sup> Shô up gyezau hpó eq, yhang eq rahá Yesuq lé zúng nyi é bang gi, layàng nún é eq dut lo é hkyô banshoq lé myàng kôjáng, gyuq dân kômù, "Yhang gi, gè gè yhang, Garai Gasâng é Yhangzo nghut ri-nhung!" ga taí akô nghut ri.

<sup>55</sup> Myiwe wuì myo myo le, we we mai wú nyi bum akô. Haú bang gi, Yesuq râ é má garúm râ matú, Galile mau mai Yhang htâng châng lé é bang nghut akô. <sup>56</sup> Haú bang má, Magadalaq wà mâ é Mariq, Yakuq eq Yose nhiktâng é yhângnu Mariq eq Zebedi é yhangzô nhiktang é yhângnú pé le bo akô nghut ri.

*Yesuq Lé, Myhup Pyâm É Hkyô*

*Mrk 15:42-47; Luk 23:50-56; Yhn 19:38-42*

<sup>57</sup> Myinhâng jé lô jáng, Yesuq é chángzo dut bê nghut é, sùt wó sù, Aramahti myuq byù Yosep ga sù lé lo ri. <sup>58</sup> Yhang gi, Pilat chyáng é mù, Yesuq é gungsôm lé ê dung jáng, Pilat gi, yhang lé byi râ matú hkunmó hkyô kat bê nghut ri. <sup>59</sup> Yosep gi, gungsôm lé yù mù, pán yúng eq htup yup lui, <sup>60</sup> luqgok lé kyùng tô é, yhâng é lup sik hkaù má ê kat tô ri. Hau htâng, yhang gi, luphkum má, luqlông eq lhêng chì pyâm to lui, ló byuq bê nghut ri. <sup>61</sup> Magadalaq wà mâ é Mariq eq goyuq Mariq gi, lup hí má zung tô akô nghut ri.

*Lup Zúng É Hkyô*

<sup>62</sup> Haú Hên Lajang Buinyi laí é htâng nyí lé, hkyangjong agyi pé eq Hparishe pé gi, Pilat chyáng é mù, <sup>63</sup> "Yhumsing ê, Yhang, asak dui nyi ashí hkûn, 'Sum nyí nghù râ buinyi má, Ngò dum dui

toq lô râ.' ga, haû byù mhaú taí é dang lé, ngamoq bûn nyi lhê. <sup>64</sup> Haû mù, haû sum nyí nghû râ buinyì jé shoq, lup lé rago za zúng nhang to aq. Haû a nghut jáng, Yhâng é chángzô pé, màng lé lé hkaû yu lô mù, Yhang shi é mai dum dui toq lô bê ga, byu pé lé taí kó râ nghut lhê. Shî, lô htâng dàm mhaû é hkyô gi, sâng-hi dàm htoq je wui râ nghut lhê." ga, lé taí akô nghut ri.

<sup>65</sup> Haú hkûn, Pilat gi, "Nungmoq sê é dông, lup lé haí a dut loshoq, gyezô pé lé zúng nhang to keq." ga tû taí kat ri. <sup>66</sup> Haû mù, yhangmoq gi, ê luí, lup lé gau shoq ga, luqgok má dizik htung mù, lup zúng byû nyhi to bekô nghut ri.

## 28

### *Dum Dui Toq Lo É Hkyô*

*Mrk 16:1-8; Luk 24:1-12; Yhn 20:1-10*

<sup>1</sup> Bánno buinyì lai jáng, rabat é sâng-hi nyí maubó zó má, Magadalaq wà mâ é Mariq eq goyuq Mariq gi, lup má é wú râ ga, e lô akô.

<sup>2</sup> Haú hkûn, layàng mó nún lo ri; hkâsu mù gâ le, Yhumsîng Garaí é maumang lagyo rayuq gi, mauhkûng mai gyó lé lô mù, lup má ê luí, haû luqlong lé tu lheng mù, hau ahtoq má zung tô ri.

<sup>3</sup> Yhâng é isâm gi, lhap su duqbó mù, Yhâng é mebu gi, gyo su hpyu zan tô ri. <sup>4</sup> Zúng nyi é bang gi, yhang lé lûm wú gyuq kômù, pyik pyik nán luí, shî gùng su dut bùm bekô nghut ri.

<sup>5</sup> Haû maumang lagyo gi, myiwe haú nhik lé, "Hkâgyuq kó! Haû tapzîng má jén sat huí é Yesuq lé, nungnhik ho nyi kô é lé, ngò sê lhê. <sup>6</sup> Yhang gi, shí má a nyi lo; Yhang taí tô é eq rajung za, lhoq dui



toq é hui bê nghut ri. Yhang lé lheq é jowò lé, lé wú keq. <sup>7</sup> Haú mù, hân taú ló luí, Yhâng é chángzô pé lé, 'Yhang, shi é mai lhoq dui toq é hui bê nghut ri; nungmoq é hí má, Galile mau shut ló láng berâ. Nungmoq, Yhang lé, haú má ló myâng kó râ nghut lhê.' nghû ló taí kyo keq. Nungnhik lé, ngò taí é lé matsîng chûng keq." ga taí kat ri.

<sup>8</sup> Haú mù luí, myiwe myhí haú nhik gi, gyuq kôlhang, gyai gabú é myit èq lup mai hân taú ló mù, Yhâng é chángzô pé lé ló taí kyo râ matú, din ló bê nghut ri. <sup>9</sup> Haú hkûn, Yesuq gi, radá dâm yhangnhik lé lhom tê mù, "Wángzán nyí kó sháng gaq." ga taí ri. Haú mù, yhangnhik gi, huí ê luí, Yhâng é hkyî má po zing to mù, Yhang lé noqkuq akô. <sup>10</sup> Haú hkûn, Yesuq gi, yhangnhik lé, "Hkâgyuq kó. Ngá é gumang wuì lé, Galile mau shut e ló keq nghû ló taí kyo keq; haú má, yhangmoq, Ngo lé myàng kó râ nghut lhê." ga taí kat ri.

### *Zúng Nyi É Gyezô Pé Taí É Danglù*

<sup>11</sup> Myiwe haú nhik hkyô má ru nghut nyi ashí le, lup zúng é gyezô pé ra-am gi, myuq hkaú má wang ló mù, dut lai lo é hkyô banshoq lé, haú hkyangjong agyi pé lé ló taí kyo akô nghut ri.

<sup>12</sup> Haú hkyangjong agyi pé gi, suwún wuì eq huí lhum luí, hpyê lhúm é htâng má, haú gyezô pé lé, ngùn myo myo tsup byi mù, <sup>13</sup> "Myín lé, ngamoq yhup myhî tô é hkûn, Yhâng é chángzô pé lé lô mù, mâng lé, lé hkaú yu ló bekô nghut ri.' nghû taí keq.

<sup>14</sup> Shí hkyô lé, haú mauzau hpó wó gyô é nghut jáng, yhang myit ngón shoq, ngamoq taí râ nghut lhê; haú hkûn, nungmoq gi, hai manghkáng a htoq râ nghut lhê." ga taí kat ri. <sup>15</sup> Haú mù, gyezô pé

gi, ngùn haú pé lé yù luí, yhangmoq lé taí kat é eq rajung za kut bekô nghut ri. Haú su mù, haú hkyô gi, Yudaq byu pé má taí pyo myhîn ló bê nghut mù, ahkuí jé shoq taí nyi bum akô nghut ri.

*Chángzô Pé Kut Râ Sasana Muzó*

*Mrk 16:14-18; Luk 24:36-49; Yhn 20:19-23; Lagyo 1:6-8*

<sup>16</sup> Hau htâng má, haú chángzo raxe rayuq gi, yhangmoq lé, Yesuq ê nhang tô é Galile mau mâ é bùm shut e ló bekô nghut ri. <sup>17</sup> Yhangmoq gi, Yesuq lé myàng kôjáng, noqkuq akô; nghut kôlhang, ra-am gi, a dê jing kó nghut ri. <sup>18</sup> Hau htâng, Yesuq gi, yhangmoq chyáng lé lô mù, "Mauhkûng eq myigùng htoq mâ é ahkáng ayá banshoq, Ngo lé byí to bê nghut lhê. <sup>19</sup> Haú mù, nungmoq gi, htoq ê luí, byù myû chângjup lé, Ngá é chángzô pé dut nhâng mù, haú Íwa, Yhangzo, Chyoiyúng Woinyí é mying lang luí, wui-myhup hkám byi mù, <sup>20</sup> nungmoq lé, Ngò hkunmó hkyô tô é lhunglhang lé châng kut râ matú, yhangmoq lé mhòqshit keq. Ngò gi, mingkan pyat htûm é hkûn jé shoq lhang, nungmoq eq rahá ru nghut nyí râ nghut lhê." ga pying tô ri.

# **Chyoiyúng chyumlaiká: dangshikaq asik; Zaiwa**

## **New Testament in Zaiwa**

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

### **Copyright Information**

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

### **The New Testament**

in Zaiwa

**© 2009, Wycliffe Bible Translators, Inc. All rights reserved.**

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

---

PDF generated using Haiola and XeLaTeX on 11 Nov 2022 from source files  
dated 29 Jan 2022

23f9fc55-a8a4-59ef-9513-707ec336b0ee